

LUKA

Kaviyak o Colai Ayeet Luka

1 ¹ Tipoliz o kareezin, eteyeedit baale ol ci meelik kaal baal agooni ɗaatinai ɗina e. ² Eteyeedit niigi kaal baal aduwaket ageet ol baal icinit niigi alya keberene ugeec kaal nicoko ɗaati agoonine e. Arak kaal nicoko cinenta niigi, makacin waanice uuwayit niigi zɔɔz nico. ³ Nyakarɗatoui o adikir, kiiya zin buk naana kedemeza kaal nicoko dook juruɗ ɗinti wun ɗɔɔt. Inoko zin kayeedekin naana ineet warage ci kazedan kaal nicoko. ⁴ Kagoon zin nɔko o, ka ga niina gi ween didi baal edemezu laadun e juruɗ.~

Aduyai tiryani o Jɔn

⁵ Baale irkitowe baal eene Erod alaan o looc o kazi Judiya e, anyak eet ci kazi Zakeriya ceen alaan ci miliny ceeze o Joowo. Niini borit ci ol o kazi Abija o goon alinjɗi ceeze o Joowo. Zakeriya anyak ɗaa ci kazi Ilizibez ceen buk niini borit ci ol o alinjɗi ceeze o Joowo. ⁶ Ma waanice abaak Zakeriya kibeen Ilizibez baayiz ci abon ɗume o Joowo, ma azooni niigi dook lotinok o Joowo. ⁷ Maje nɔɔgo akom dol cigeec, eeci waanice Ilizibez awɔ koliin zee makacin iziti niigi dook matuwo.

⁸ Ma iitene oman izi waɗi ci Zakeriya ka kook kilinjɗi ceeze o Joowo eo goon anyone niigi lijɗi laadun. ⁹ Aɗera ol nɔɔno keere uneɗ goon agooni maadico ka kook kutururek karkar goo ɗaa taabinto. Ook ni niini ceeze o Joowo eecito. ¹⁰ Maje ol dook aɗarye ceez bitaala ɗinti ona akɔ arureke niini karkar goo o.

¹¹ Mazi ɗaan akɔ arurek Zakeriya karkar goo nɔko, iyyak toonnyaiti ci Joowo nɔɔno, ma aku abil ɗino taabinto libire ci azo o.

¹² Mazi acin Zakeriya nɔɔno nɔko, ɔɗɗole ɗɔɔt ele.

¹³ Bar anek toonnyaiti naci nɔɔno ne, “Zakeriya, ma aɗolinan gaga, eeci kanyaakin kaviyak Joowa. Iziiwun Jooi ɗaryiin unun. Aritakin ɗijeere ɗaa cune kazi Ilizibez noko logoz. Zin mazi aritai, katek zaar ci kazi ne Jɔn. ¹⁴ Atalne katin niina tiryante cin o, ma buk atalne ol ci meel. ¹⁵ Eeci niini ɗijeere titiny ɗɔɔt ɗume o Joowo. Ma alaɗ awot nyaan been neen. Akunak ɗijeere nɔɔno Vɔɗjizi o Joowo ɗaan aavi yaatin keɗa nɔko. ¹⁶ Alama katin niini ol ci meel ole o Israyil ka kivita kiziiyit Manyi ween Jook uneɗ. ¹⁷ Arayai katin niini ɔwa ɗaati Manyi, ma anyak ɗoyiz ci abil kiyo baal anyak nyakanani o kazi Ilija e. Arom bodo katin niini dol ki baatigeec ɗaatodoi. Abadaan ɗijeere niini ol o alaɗ azooni zɔɔz o Joowo kivita kabaabanit baabaninok ci ol o abon. Aku ɗijeere atom niini ol ka kidimdimanit eleeti kereec kuni o Manyi.”

¹⁸ Ma abedeke Zakeriya toonnyai nico anek ne, “Ka zin yo naana kaga zɔɔz nico een didi o ku? Inoko naana ki ɗaa onan kidikirta naaga dook kizita matuwo.”

¹⁹ Ma abedeke toonnyaiti nɔɔno anek ne, “Aneeta Gabriyal o goon kabil ɗume o Joowo neen naci. Nɔɔno neen o itoonanan aneet ka kiiya kuduwayin ineet zɔɔz ci abon noko. ²⁰ Zɔɔz naci katin didi abil to iitene o arek Jooi, bar zin giye o alaɗ atuwe zɔɔz ci kaduwakin o, alagunyan rak Jooi inoko ineet aat calaɗ azooz zee been iiten ci abilni zɔɔz naci to.”

²¹ Agooni gi naci ceeza eecito, maje ol ona eel bitaala e ɗaan are Zakeriya nɔko. Bar alaɗ aga niigi gi ci alam nɔɔno ɗinti reen ceeza eecito o. ²² Mazi akɔ aduɗnak niini bitaalin, alaɗaan azoozek nɔɔgo, eeci alagonye aati. Enico ele agaac niigi icinun Zakeriya ceeza eecito gi ci itoona Jooi. Ma azoozek niini nɔɔgo azeene doon.

²³ Mazi akɔ aɗorneke iinya ci lijɗi onin ceeze o Joowo, imiire ook olɔ. ²⁴ Ma iinyaye ci miliny nɔko obona ɗaa onine Ilizibez anyawo, ma aavi ceeza nɔko nyelowe tur calaɗ aduɗnak bitaalin.

²⁵ Ma aduwa Ilizibez gi ci azi ne, “Nicini deten ci anyan Jooi. Aarawan niini aneet alyaan baal kawoye koliin e.”

Aduyai tiryani o Yesu

²⁶ Mazi akɔ een Ilizibez nyelowe ci anyayin torkonon, itoona Jooi bodo toonnyai o kazi Gabriyal kiiyak kutur o kazi Nazaret abil looce o kazi Galili. ²⁷ Anyaak niini molok ci Joowo dole ci kazi Meri ci agam nɔɔno eeti ci kazi Josev ka kiriyi kizi ɗaa cin. Ma eeti ci kazi Josev noko dole ci dol ci alaan o kazi Devid. ²⁸ Ma akunak toonnyaiti Meri, ma aku azaa anek ne, “Abona? Amayuwin Jooi ineet.”

²⁹ Mazi azii Meri zɔɔz nico, anyawun ɗoliin ɗɔɔt. Ma abiir ɔɔ zooze ci azaawi toonnyaiti nɔɔno o.

³⁰ Ma anek toonnyaiti nɔɔno ne, “Meri. Ma anyei ɗoliin gaga, eeci iyyayin deteni o Joowo ineet. ³¹ Anyake ɗijeere, ma ookca logoz. Katek zin ɗijeere nɔɔno zaar ci kazi Yesu. ³² ɗijeere niini titiny ɗɔɔt. Ma awe kizi ɗeerti Jook o adikir. Anyek ɗijeere Jooi nɔɔno kizi alaan ci adikir kiyo baale jijitine Devid e. ³³ Ma een ɗijeere niini alaan ci ol o Israyil nɔko kodot, ma alaɗ alaazet cine o aɗorneke nɔko been neen.”

³⁴ Ma anek Meri toonnyai ne, “Inoko naana ɗaan keen dole ci ɗaai. Ka zin yo kanyak dole ku?”

³⁵ Ma abedeke toonnyaiti nɔɔno anek ne, “ɗaan akunakin Vɔɗjize o Joowo. Buk ɗoyizi o Joowo ɗaan aavi ɗaaton. Zin giye nico awe ɗijeere dole naci kizi ɗeerti Joowo. ³⁶ Cin di atenoi unun kazi Ilizibez baal azi ol ne, Alaɗaan bodo ɗijeere niini arit e. Inoko anyawun niini nyelowe torkonon ci anyayin kizi matuwoc nɔko ³⁷ Eeci akom gi ci akomnek Jook ɗaati agooni.”

³⁸ Ebedeke ni Meri nɔɔno enek ne, “Keen naana gabaren ci Joowo. Anyek kutuguwozeyan gi naci kiyo ona aduwakan o labak.” Enico ɔɔto toonnyaiti ci Joowo noko ɗim.

Eerononek Meri Ilizibez

³⁹ Ma iinya ci miliny nɔko itija Meri, ma ayiik akɔ kuture o abil biyene looce o kazi Judiya. ⁴⁰ Mazi akɔ arum korok o Zakeriya, azaawun Ilizibez. ⁴¹ Mazi azii Ilizibez zaawinet ci azaawi Meri nɔɔno o, ɔɔɔmo dole keɗa. Ma akunak Ilizibez Vɔɗjizi o Joowo.

⁴² Ma agereny molowe ci appe azi ne, “Amayukin Jooi ineet kujuk ɗaai dook, ma buk amayuk Jooi dole ci anyei keɗa noko. ⁴³ Ma naana keen ɗeneen ci akɔ ma akunakan niina yaati Manyi onan aneet ceeze can o? ⁴⁴ Uyene akɔ mazi olla kazii zaawinet unun e, ɔɔɔmo dole keɗa talniinta enico ele. ⁴⁵ Amayuwin zin Jooi ineet, eeci atu niina zɔɔz baal aduwakin niini ineet e abil didi ɗijeere to.”

Beniin o Meri anaati Jook

⁴⁶ Ma aben Meri beniin ci azi ne, “Kanaati Jook zinize onan dook. ⁴⁷ Atalne ziniz cane o ŋaaten Jook ween ruguzoi onan, ⁴⁸ eeci aadawan niini aneet gabaren onin o keen celbez labak. Inoko zin waanico zee been iinyaye ci avu e utuyan bulowa ci ŋaan avu e dook aneet kizi ŋaa ci amayukan Jooi, ⁴⁹ eeci agoonekan Jooi o anyak dɔyiz dook aneet kaal ci adiŋɔŋ ɔɔɔt. Nɔɔɔn neen o awɔ doon. ⁵⁰ Ayelza niini gi o awucneke ɔl o aŋole nɔɔɔn bulok ki bulok. ⁵¹ Eyeliza niini dɔyiz ci ibaati ogin, ma azaan ɔl o adɔŋ eeleeti baabaninowe ugeec. ⁵² Ma iinane alaat o loocu dak, ma adɔŋ ɔl o celbezik kɔɔt ki taden. ⁵³ Anyerizan niini ɔl o adak magizeeti kaale ci abon, ma anyek ɔl ween arɔk kɔɔt katamaatit. ⁵⁴ Atirit niini ɔl o Israyil een gabara ogin kiyo baale aterkedek niini jijitigaac e. ⁵⁵ Baale enek Jooi nɔɔɔɔ ne, Awucnekan katin Ibrayim kibeen dɔl ci dɔl ogin dook nɔkɔ kodot.”

⁵⁶ Ma arome Meri ki Ilizibez ŋinaante nyelɔwe iyyu. Itiŋa ni imiire ook ɔlɔ.

Tiryani o Jɔn

⁵⁷ Mazi avɔ aŋorneke iinya o Ilizibez nyayiinto, otowa niini logoz. ⁵⁸ Mazi azii atenowa kibeen ɔl o abaawɔ ki nɔɔɔɔ tirten o anyek Jooi nɔɔɔn, ataltɔ buk niigi dook kibeen Ilizibez ɔɔɔt ele.

⁵⁹ Mazi akɔ een dole iinya turge, ivita niigi ka kivita keteedit nɔɔɔn kul keere uneɛŋ Juz. Ma arɔɔŋ kakatek atenowa dole zaar o baatin kazi Zakeriya. ⁶⁰ Bar azi yaatine ne, “Akɔm, kazi zaar cigin ne Jɔn.”

⁶¹ Ma anek ɔl nɔɔɔn ne, “Atenowe ugooc dook akɔm eet ci anyak zaar nicoko.” ⁶² Ijinit ni niigi baati doleco azeeɛne doon ka keteyeɛdak nɔɔɔɔ zaar ci arɔɔŋ kakatek dole.

⁶³ Ma ajin Zakeriya ɔl kanycek nɔɔɔn warage ci ka keteyeɛdi dole zaar, ma aku ayeet azi ne “Kazi zaar cigin ne Jɔn.” Ma abiiir nɔɔɔɔ dook ooti ɔɔɔt ele. ⁶⁴ Enico ele ɔge Zakeriya aati kɔzɔz labak, ma anaat Jook. ⁶⁵ Ma anyaaak zɔz nɔɔɔɔ ɔl o abaawɔ ki nɔɔɔn dook ŋoliin, ma adala kaviyawa nicaga looc o Judiya abil biyene dook. ⁶⁶ Ma ɔl dook baal iziiyit kaviyak nicoko e, abaaban niigi zinzeetine ɔɔɔt, ma ajinɔ anɔ ne, “Ma dim tiŋeere dole nicini abil ku?” Azi nɔkɔ o, eeci aga niigi dɔyizi o Joowo didi aavi ŋaatin.

Beniin o Zakeriya

⁶⁷ Iiyak ni Vɔŋɔzi o Joowo Zakeriya ceen baati Jɔn o, ma adiŋɔŋ niini Jook beniinta azi ne, ⁶⁸ “Abon kanaat Manyi ween Jook o Israyil. Iiyak niini ɔl ogin, ma ɔga nɔɔɔɔ kabaayitɔ yaak. ⁶⁹ Anyaayet niini ageet ruguzoi ci adikir ceen dole ci dɔl o Devid ween gabaren onin. ⁷⁰ Uduwa niini zɔz nɔɔɔɔ nico baale laadun nyakaŋanete ogin azi ne, ⁷¹ ka kiiya korogozet niini ageet modeni, kibeen dɔyize o ɔl o amarninet ageet dook. ⁷² Zin giye nico eyeliza niini gi o awucneke jijitigaac nɔɔɔn, ma buk aada niini gi baal aterkedek niini nɔɔɔɔ e. ⁷³⁻⁷⁴ Baale eterkedek niini jijitinai Ibrayim zɔz ci ka keelayet modeni, ma anyet niini ageet kilinŋiŋtozek nɔɔɔn kɔkɔm ŋoliin. ⁷⁵ Ma buk anyet ageet kobonta ŋume onin ŋinti ŋaan rak karogni noko dook. ⁷⁶ Maje niina Jɔn dole onane awe katin izi nyakaŋan ci Jook o anyak diŋɔŋon dook. Eeci arayne rak katin niina Manyi ɔowa ka dimdimanek nɔɔɔn gɔl onin ⁷⁷ Aduwai tiŋeere niina ɔl ogin zɔz o ka korogozɔ Jooi nɔɔɔɔ gole o ka kaarai niini nɔɔɔɔ baciinok ugeec. ⁷⁸ Agɔɔn Jooi onai nɔkɔ o, eeci areezet niini ageet, ma iina nɔɔɔn ziniz. Itoona tiŋeere niini ŋeerin kiiya kuduna kiyo gɔɔn aduŋna ii ririwona o ⁷⁹ Ma anyaaak tiŋeere niini vooritin ɔl dook o aavtiz muura daayiza. Ma amadet tiŋeere niini ageet kɔzɔz tɔp gole ci ganonto.”

⁸⁰ Maje dole iroktai juruŋ kɔkɔk kak Vɔŋɔzi o Joowo. Mazi akɔ adikir, itiŋa ook balala, ma akɔ abaak ŋinaante zee been iiten baal aku akanan liŋliŋon onin ole o Israyil e.

Tiryani o Yesu

2 ¹ Ma iinyaye niceke itoon alaani o Rom adikir kazi Agostos molok kook ole o loocok ogin dook ka keteyeede ɔl o abaak loocowe o abal niini dook zaara. ² Akanai yeedinet ci zaaru noko iinyaye o eeɛ Kiriniyas alaan o abal looc o kazi Siriya. ³ Imiirtozek ni ɔl dook kuturyok ugeec ka gɔɔn eeɛti kook keteyeet zaar kuture onin ele.

⁴ Itiŋa ni Josev kuture o kazi Nazaret abil looce o kazi Galili, ook kuture o kazi Bezilem looce o kazi Judiya ŋaabaal aritan alaani o kazi Devid e. Akɔ niini ŋinaante o, eeci een niini borit ci tatok o Devid. ⁵ Orkorit ni niini kibeen Meri o agam ka kiriyi. Maje Meri anyake. Avɔ niigi dook ka kɔɔt keteyeedit zaar ŋinaante. ⁶ Mazi avɔ arum Bezilem, amun Meri dole. ⁷ Otowa ni niini logo onin een abuu, ma abuŋ rumanen, ma abayek looc luwawa giye ceen taava gɔɔn eeɛni arte ci maalawu, eeci akɔm ŋinti ka kɔɔt katanguze ɔoorya.

Avu acin ɔl o tuwawinto Yesu

⁸ Ma iitene nice anyak ɔl ci tuwawinto ci gɔɔn abek eeza baal looce nice tuuwa. ⁹ Ma akunak toonnyaiti ci Joowo nɔɔɔɔ. Ma ayelzak Jooi nɔɔɔɔ diŋɔŋon onin ŋaati atarani nɔɔɔɔ baal, makacin ɔtɔŋolte niigi looc ɔɔɔt ele.

¹⁰ Bar anek toonnyaiti ci Joowo noko nɔɔɔɔ ne, “Má aŋolinu looc gaga. Eeci kakunakuŋ ka kiiya kuduwayuŋ igeet zɔz ci abon ci ka katalɔi ɔl dook ɔɔɔt. ¹¹ Itiryai waanico kuture o Devid ruguzoiti cunooŋ. Niini Kiristo ween Manyi onai. ¹² Gɔl zin ci ka agayi zɔz nico een didi neen ce. Ɔtɔ zee mazi ajowanu dole o abuŋe rumanen, ma abawonek taava o, nɔɔɔn neen.”

¹³ Taman nɔkɔ anai toonnyawa ci Joowo meelik boyoŋyoŋ, ma aromonek toonnyai ona oowu e. Ma abene niigi dook anaat Jook azi ne, ¹⁴ “Kanaatit Jook o aavi tammu tadena. Abil ganɔn loota ole o areez niini.”

¹⁵ Mazi avɔ amiiri toonnyawa avɔ tammu tadena, izitɔ ɔl ci tuwawinto o ne, “Kɔɔtɔ di Bezilema ka kɔɔt kicinit gi ci agooni aduwaket Jooi o.”

¹⁶ Iyiyit ni niigi ɔt Bezilema, ma avɔ ajowa Meri kibeen Josev. Maje dole abawonek looc taava. ¹⁷ Mazi avɔ acin ɔl ci tuwawinto noko dole, uduktak niigi Meri kibeen Josev zoozok ona aduwak nɔɔɔɔ toonnyaiti o Joowo akati dole e dook. ¹⁸ Maje ɔl dook o azii kaal ci aduwa ɔl ci tuwawinto noko, abiiir nɔɔɔɔ ooti kaale nicoko ɔɔɔt ele. ¹⁹ Maje bar Meri abaaban kaal nicoko dook, ma azooni ziniza. ²⁰ Ma amiiri ɔl o tuwawinto ŋaati abeni beniinok ci anaati Jook kaale o azii kibeen kaale o acin niigi, eeci didi eelit tɔ ebaal aduwaki nɔɔɔɔ toonnyaiti e.

²¹ Mazi adica dole iinya turge, eteedit ɔl nɔɔɔn kul keere uneɛŋ Juz. Ma akanek nɔɔɔn zaar ci kazi Yesu ebaal aduwaki toonnyaiti o Joowo nɔɔɔɔ iŋaan buk Meri kanyawɔ e.

Anyaayak Yesu ceez o Joowo

²²⁻²⁴ Mazi izi iiten o gōon avo ataabi ol Jook ŋaati aritan dole eo aduwan lotinowa o Mosis, ɔt Josev been Meri ceeze o Joowo ka kɔt kataabit Jook yeelaye ceen ram karabɔŋ een joroye ceen ram ci yeela o korgu. Ma buk avoyi niigi dole ka kɔt kanycek nɔnɔ Jook eo ayeedine lotinowe o Joowo azi ne, “Anycek logɔz ween abuunya Jook ka kiziti niigi dɔl cigin alinŋhonek nɔnɔ.”

²⁵⁻²⁶ Maje waanice iinyaye niceke anyak eet ci kazi zaar ne Simiyan ci abaak Jerusalema. Niini eet ci abon, ma adiŋɔŋan Jook ɔɔt. Ma aavi Vɔŋizi o Joowo ŋaatin, ma anek nɔnɔ ne, “Alaŋ niina adaai rak iŋaan cin Kiristo ween ruguzoi o ka kitoona Jooi.” Ma giye nico areyi waanice niini ka kicin ruguzoi o ka kiiya korogoz ol o Israyil. ²⁷ Ma iitene nice ooyi Vɔŋizi o Joowo nɔnɔ ceeze o Joowo. Ma ako arumɔ niini ki Josev been Meri avoyi niigi dole ceeze o Joowo ka kɔt kutuguzek nɔnɔ kaal o aduwa lotinowa o Joowo. ²⁸ ɔdɔŋ ni Simiyan dole azeene, ma anyek Jook zany azi ne, ²⁹ “Manyi, Inoko nyan kadaak labak. Katalne ɔɔt, eeci utugu gi baal aterkedekan e. ³⁰ Kicina naana keberene ogan ele ruguzoi o itoona niina ka kiiya korogoz ol loota. ³¹ Utugu niina gi nico kicin modena dook. ³² Ma ruguzoi niki vooritin ci ka keyelek moden o alaŋ een Juz gɔl unun, ma anyaak ol o Israyil titinyɔn.”

³³ Ma abiir Meri kibeen Josev ooti kaale ci aduwak Simiyan dole noko. ³⁴ Ma amayuk Simiyan nɔɔɔ, ma anek niini Meri ne, “Aŋera Jooi dole nico o ka kɔdɔŋ ol o agama nɔnɔ, ma iinane ol o abor nɔnɔ ole o Juz. Ayelza tiŋeere niini Jook, ma bar abor nɔnɔ ol ci meel tiŋeere. ³⁵ Zin giye nico abɔryai tiŋeere baabani o gerze aroodi zinzeetine ci ol ci meel. Maje niina Meri giye nico katin akati culum ɔɔt ele kiyo anyei tuben ziniza o.”

³⁶ Buk ŋinaante anyak ŋaa ceen matuwoc ceen nyakaŋan ci kazi zaar ne Ana. Niini tinati eet ci kazi Vanuwel ceen borit ci ol o kazi Acar. Ariyi ol nɔnɔ, ma anyak kibeen eet irkitok torgerem nɔko adaak eti. ³⁷ Ma aavi niini kizi boye nɔko irkitok eet wec ki tiin wec (84). Ma ŋaan kotoŋ niini ceez o Joowo been neen. Adiŋɔŋan gōon niini Jook baalinok ki waazinok ŋaryiinta ŋaati alaŋ adayin. ³⁸ Ma iitene ci baal anyaake Josev ki Meri dole ceez o Joowo neke, iya buk Ana oromozek nɔɔɔ ŋinaante, ma anaat niini Jook Ma azɔɔz kaal ci akati dole. Aduwak niini kaal nicoko ol dook o are Jook ka korogoz ol o Israyil.

Amiironek Josev ki Meri been Yesu Nazaret

³⁹ Mazi avo adica Josev kibeen Meri kaal o aduwa lotinowa o Joowo dook, imiiriye niigi ɔt kuture uneŋ kazi Nazaret abil looce o kazi Galili. ⁴⁰ Maje dole iroktai juruŋ kɔdɔk ma ageny ɔɔt, ma aavi mayuwenet o Joowo ŋaatin.

Aavi Yesu ceeze o Joowo

⁴¹ Gōon irkitok dook avo Josev kibeen Meri Jerusalema iitene o gōon aloten ol o Juz ka kaadai niigi iiten baal avarɔŋi toonnyaiti o Joowo ceezi ugeec e. ⁴² Mazi ako een Yesu irkitowa amɔtɔ ram, ooti Josev kibeen Meri nɔnɔ Jerusalema bodo eo gōon avoyi niigi laadun. ⁴³ Mazi ako adicai iinya ci lotento noko, itinŋaza niigi abada kɔrɔk. Maje bar te Yesu otoŋozek looc Jerusalema calaŋ baatine ki yaatin aga ŋaan aavi niini Jerusalema o. ⁴⁴ Bar abaaban niigi anɔ ne, “Coma aavito ole baal ɔkɔra ki nɔɔɔ noko.” Ma adica niigi iiten codoi calaŋ arumɔne ki Yesu nɔko zee makacin oroŋit niigi nɔnɔ ole ugeec een atenok kibeen ole ween laŋotigeec. ⁴⁵ Ma ŋaan kojokta niigi nɔnɔ, ma vurta imiirtozek niigi Jerusalem ka kɔt koroŋit nɔnɔ ŋinaante. ⁴⁶ Mazi avo adica niigi iinya iyyu rooŋinta, ivita ojokta nɔnɔ arome kibeen ol o gōon ademzek ol lotinok ceeze o Joowo. Aziirar niini nɔɔɔ, ma buk ajin niini nɔɔɔ zoosok. ⁴⁷ Maje ol dook ci azii zoosok ci abarzek niini nɔɔɔ genyiza noko, abiir ooti ŋaatin ɔɔt. ⁴⁸ Mazi acin baatine ki yaatin nɔnɔ arome kibeen ol nicoko nɔko, ibiirit buk nɔɔɔ ooti ɔɔt. Ma anek yaatine nɔnɔ ne, “Dole onan, agooneket gi nico naa? Cin di, aneeta kibeen baatun aviryet zinzeeti ŋaatin ɔɔt, ma kagenygenya karoŋnyin.”

⁴⁹ Ma abedeke Yesu nɔɔɔ anek ne, “Kodi! Naa te ako zee ma agenygenyu aroŋnyan o? Alaŋ agawu kaave naana ceeze o baaba ŋina o?” ⁵⁰ Bar niigi alaŋ aga keŋ ci zɔɔz ci aduwa niini noko akati inin.

⁵¹ Enico uduna Yesu iya orkorit ki nɔɔɔ ɔt Nazareta. Ma azii niini nɔɔɔ kaale o aduwak niigi nɔnɔ kutugu dook. Maje yaatine azooni kaal nicoko dook ziniza. ⁵² Ma aroktai Yesu juruŋ, ma buk ageny ɔɔt. Ma atalne Jooi kibeen ol buk ŋaatin.

Uuwayi o Jɔn o oonyi

3 ¹⁻² Ma iinyaye niceke anyek Jooi Jɔn ween ŋeerti Zakariya kook kuduwak ol zɔɔz onin balala. Maje waanice irkitowa ci abali alaani o Rom kazi Tibiriyas looc nice dook izi amɔnki tur. Buk enice ele Pantas Pailat alaan ci looc o kazi Judiya. Maje Erod alaan ci looc o kazi Galili. Maje gotɔnnya o kazi Pilip alaan ci ŋino kazi Itoriya kibeen ŋino kazi Tirakonitis. Maje Lisanas alaan ci abal ŋino kazi Ebilin. Maje Anas kibeen Kayavas niigi alaati ci adikir ceeze o Joowo Jerusalema. ³ Ma azɔɔ Jɔn waanice loocok o ajɔŋɔ ki liil o kazi Jordan dook. Uuwawek niini ol zɔɔz ci azi ne, “Otoŋit oŋe ugooc. Abadaak gɔl o Joowo. Ivita abadiit mony ka otoonye, ka kaara Jooi oŋe ugooc.”

⁴ Ma uuwayi o Jɔn aku kibil ebaal ayeedi nyakaŋani o kazi Izaya e, azi baale niini ne, “Anyak katin eet ci agereny balala azi ne, Idimdimantek Manyi gɔl onin. Amadek nɔnɔ golok ogin keelit tɔp. ⁵ Golowa o lukudik dook abon aronek tɔdɔwa kiziti kiltoŋe kataadjai. Maje biyen dook abon alibe kiziti rabrabe. Maje golowa o ŋɔlŋɔlik abon agooni keelit tɔp. Maje golowa ween coorom abon agooni kigirgirit. ⁶ Ka zin kicin tiŋeere ol dook rogzen o Joowo.”

⁷ Mazi waanice uuwak Jɔn nɔko, ivitak ol ci meel nɔnɔ ka kiiya kotoony niini nɔɔɔ. Ma anek niini nɔɔɔ ne, “Igeet dɔl ci kokonyawu koko! ŋeneen ci ilotuŋ igeet ka odokonyit bornet noŋe ci Joowo ka kiiya tiŋeere neke o? ⁸ Abon zin agoonu kaal ci abon ci ayelza gi ci utuntu niiga kaal o ger didi. Má bar anonu ne, Keegina dɔl ci dɔl o Ibrayim. Didile kaduwakuŋ igeet, Jooi anyak dɔyiz ci ookci biyen nicoko kiziti dɔl ci Ibrayim labak. ⁹ Eelnu niiga kiyo keena o. Olla zin inoko meleyi o payiin o Joowo erɔwɔ ka keecawuŋ loota kiyo keeca keet o. Gōon zin laadun keet calaŋ arek kebere ci abon, ateedjak looc, ma akanonek goo.”

¹⁰ Mazi azii ol zɔɔz nico, ijimit niigi nɔnɔ anek ne, “Abon zin yo inoko kagoona naa?”

¹¹ Ma abedeke Jɔn nɔɔɔ anek ne, “Ma anyak eeti rumanne ram, abon anyek codoi gɔn ci amaarum. Ma anyak eeti dayiin, abon buk aada gɔnɔgi.”

¹² Ma avunak Jɔn ol o gōon alot meeri ka kivita kotoonye. Ma ajin niigi nɔnɔ anek ne, “Alaan o demziinto, duwayet di buk gi ci abon ka kutuguza naaga.”

¹³ Ma abedeke Jɔn nɔɔɔ anek ne, “Má alotanu ɔla meeri ci appe kujuk o aduwakuŋ alaata o akumawo.”

¹⁴ Ma buk ajin takirnya ogen nɔnɔ anek ne, “Mayo buk naaga kutuguza naa? Duwayet di buk gi ci ka kutuguza naaga.”

Ma abedeke J̄on n̄oogo anek ne, “Má aamanu ol guruc olezeta. Buk má aanyu ol oogi gaga n̄oko vol̄ona. Anycek zinzeeti keleento ki guruc ci liñliñon cunoon̄o o.”

¹⁵ Mazi giye baal waanice arewi ol kuni o Kiristo, ako mazi uuwak J̄on kaal nicoko, abaabanit niigi zinzeetine an̄o ne, “Bar boñ n̄ici Kiristo o kare naaga ol o Israyil neen.”

¹⁶ Enek ni J̄on n̄oogo ne, “Inoko kuunyuj̄ naana igeet maami doon, bar zin iima ñaan aku eeti ci adikir or̄oot kujukan aneet yo nuun een caava ogin zoonu alañ kaganona ki aneet ñaati koborcane. Oony zin tiñeere niini ol oogi ñaatunoon̄o V̄onjize o Joowo, maje oogi apayek goo. ¹⁷ Keel naaga ñaatin kiyo labina o. Anyak zin niini aziita keet ci uurtane labi, ma arek ñoot, ma arek labi kebere piim. Ma avaat tinyonyu gooye calañ aditi been neen.” ¹⁸ Ma uwayek J̄on ol kaviyak o Joowo golowe ci meelik ger.

^{19–20} Ma iinyaye niceke aama alaani o kazi Erod got̄oni ñaa cin kazi Erodiyas. Ma buk waanice aḡoon niini kaal ci ger meel. Ob̄orak ni J̄on Erod kaal o ger aḡoon niini dook kibeen buk gi ci aamane niini got̄oni ñaa o. Enico acabun Erod J̄on, ma azaac bodo niini gerzitin onin giye ci acabi n̄oogo o.

Tonyenet o Yesu

^{21–22} Mazi ako oony J̄on ol dook, iya buk Yesu. Ma buk oony J̄on n̄oogo. Mazi ñaan aanye n̄oko, okole tammu taden, ma akunak V̄onjizi o Joowo n̄oogo kiyo yeelac o. Ma aku tammu tadena m̄oloyi ci azi ne, “Een niina ñeeran onan kareezin neen. Katalne naana ñaatun or̄oot ele.”

Jijitigi Yesu

²³ Mazi ako een Yesu irkitowa eetoma kamoto, akata niini liñliñon onin. Ma anyek ol n̄oogo kizi ñeerti Josev ween ñeerti Eli, ^{24–38} Eli ween ñeerti Mazat, Mazat ween ñeerti Livai, Livai ween ñeerti Melci, Melci ween ñeerti Janai, Janai ween ñeerti Josev, Josev ween ñeerti Mataziyas, Mataziyas ween ñeerti Amos, Amos ween ñeerti Nayum, Nayum ween ñeerti Isili, Isili ween ñeerti Nagai, Nagai ween ñeerti Maaz, Maaz ween ñeerti Mataziyas, Mataziyas ween ñeerti Simin, Simin ween ñeerti Josec, Josec ween ñeerti Joda, Joda ween ñeerti Joonana, Joonana ween ñeerti Resa, Resa ween ñeerti Zarubabel, Zarubabel ween ñeerti Selitul, Selitul ween ñeerti Neri, Neri ween ñeerti Melci, Melci ween ñeerti Adi, Adi ween ñeerti Kosam, Kosam ween ñeerti Elmadam, Elmadam ween ñeerti Eer, Eer ween ñeerti Jasuwa, Jasuwa ween ñeerti Eliyesar, Eliyesar ween ñeerti Jorim, Jorim ween ñeerti Mazat, Mazat ween ñeerti Livai, Livai ween ñeerti Simiyan, Simiyan ween ñeerti Juda, Juda ween ñeerti Josev, Josev ween ñeerti Jonam, Jonam ween ñeerti Iiyakim, Iiyakim ween ñeerti Meleya, Meleya ween ñeerti Mena, Mena ween ñeerti Mataza, Mataza ween ñeerti Nazan, Nazan ween ñeerti Devid, Devid ween ñeerti Jesi, Jesi ween ñeerti Obed, Obed ween ñeerti Bowaz, Bowaz ween ñeerti Salmon, Salmon ween ñeerti Nacon, Nacon ween ñeerti Aminadab, Aminadab ween ñeerti Adimin, Adimin ween ñeerti Arini, Arini ween ñeerti Ezron, Ezron ween ñeerti Periz, Periz ween ñeerti Juda, Juda ween ñeerti Jakob, Jakob ween ñeerti Aizak, Aizak ween ñeerti Ibrayim Ibrayim ween ñeerti Tera, Tera ween ñeerti Nayor, Nayor ween ñeerti Seruk, Seruk ween ñeerti Reyu, Reyu ween ñeerti Pelek, Pelek ween ñeerti Eber, Eber ween ñeerti Cela, Cela ween ñeerti Kenan, Kenan ween ñeerti Aravazad, Aravazad ween ñeerti Cem, Cem ween ñeerti Nowa, Nowa ween ñeerti Lamek, Lamek ween ñeerti Matasela, Matasela ween ñeerti Inok, Inok ween ñeerti Jaret, Jaret ween ñeerti Maayalil, Maayalil ween ñeerti Kanan, Kanan ween ñeerti Inos, Inos ween ñeerti Sez, Sez ween ñeerti Adam, Adam ween ñeerti Joowo.

Acinnyai Yesu

4 ¹ Ma abada Yesu liile o Jordan ñaati abizni t̄oc ki V̄onjizi o Joowo, ma akoyi V̄onjizi n̄oogo balala. ² Ma ako anyak niini ñinaante iinya eet ram ci acinan Loryen n̄oogo. Iinyaye niceke dook akom niini gi ci adak been neen. Mazi ako adica niini iinya nicoko, adawun magiz.

³ Iiyak ni Loryen n̄oogo, ma aku anek ne, “M̄a di een ñeerti Joowo didi, towo di be nico kizi dokoc.”

⁴ Ma abedeke Yesu n̄oogo anek ne, “Azi waragewi o Joowo ne, Alañ eeti ci deer arogni dokoc doon.”

⁵ Bodo akoyi Loryen n̄oogo be tadena, ma ako ayelek n̄oogo lak codoi ñor n̄oko looc kibeen moden ci loocu noko dook. ⁶ Ma anek Loryen n̄oogo ne, “Cin di. Ñaan kanyin alaazet ci abale moden ci loocu nico noko dook, eeci kaala nicigi dook anycozeyan aneet. Olla te m̄a karoon̄ kanyek eet oma, kanyi labak. ⁷ Inoko zin m̄a adiññanan aneet, kanyin koca ineet bal kaal nicoko dook kizi cugun.”

⁸ Abedeke Yesu n̄oogo anek ne, “Azi waragewi o Joowo ne, Idiññanit Manyi ween Jook unoon̄, ma buk abon aliñliñoneku n̄oogo doon.”

⁹ Enico ooyi Loryen Yesu Jerusalema, ma ako at̄odi ceez o Joowo, ma akoyi zee been ñinti āorneke e, ma ako anek ne, “M̄a een ñeerti Joowo didi, kul di ñina taak t̄odo. ^{10–11} Eeci azi waragewi o Joowo ne, Ñaan itoona Jooi toonnyak ogin ka kivita katabuñtawin niigi ineet calañ iinai looc kurukin biyen z̄o.”

¹² Abedeke Yesu n̄oogo anek ne, “Azi waragewi o Joowo ne, Má acina Jook ween Manyi unun.”

¹³ Mazi ako odotiz Loryenti cinanowe ci acinan Yesu noko, otoñek niini n̄oogo looc ot̄o, ook bodo ere ḡol oma ci ka kabadake Yesu.

Akana Yesu liñliñon onin Galiliya

¹⁴ Abadaak ni Yesu Galili d̄oyize o V̄onjiz o Joowo. Ma aziikne kaviyawa ogine looc nice dook. ¹⁵ Ma ademez niini ol ceezine o Juz lotento, ma atitiny ol dook n̄oogo.

Abor ol o Nazaret Yesu

¹⁶ Zin iyyak Yesu Nazaret ñinbaal aroktan niini. Ma aku ako ceeze o lotento iitene o yubzento kazi Sabit eonin ḡoon akoyi laadun. Ñinaante itija jena ka kekebek ol warage o Joowo. ¹⁷ Ma anyek ol n̄oogo warage o nyakanjan o kazi Izaya. Mazi akol warage, ajowa ñino ayeedi azi ne, ^{18–19} “Aavi V̄onjizi o Joowo ñaatan, eeci eñerawan niini aneet ka kuduwak ol o amaata z̄o o abon. Itoonanan niini aneet ka kiiya kuduwak ol o acabje ḡol o ka k̄oogjai niigi, ka buk k̄okol ol o ruben kebere, ka kiiya koboroc ol o agide k̄oozo labak, ka kiiya kuduwak ol irkit o ka korogoi Jooi ol ogin.”

²⁰ Onyook ni Yesu warage, ma anyek eet o alihliq ceeze o lotento, ma aavi niini loota. Maje ol ci aavtiz ceeza o agelem niigi dook nɔɔɔ. ²¹ Ma anek Yesu nɔɔɔ ne, “Eelit didi zoowawa ci aduwa waragewi ci Joowo noko waanico tɔ, kiyo aziinuu noko.”

²² Ma anaat niigi dook nɔɔɔ, ma abiiir nɔɔɔ; ooti zoowowe ci amadi aduwa niini noko. Ma ajino niigi maany ano ne, “Mayo niini alañ een ɲeerti Josev gi?”

²³ Ma anek Yesu nɔɔɔ ne, “Kaga ɲedet arooɲnyu uduktayan olit unoɲ gɔɔn aziyu ne, Mā een akim, rogoz niina ele unun maany. Ma buk arooɲnyu enektayan ne, Tugu buk kaal baal kaziinɲa agoon Kapernama e kuture cina o ɲina. ²⁴ Didile kaduwakun igeet, akom laadun nyakanan ci adinɲan ol kuture onin ele.

²⁵ Iziiktaɲ di juruɲ! Baale irkite o nyakanan o kazi Ilija anyak ɲaai ci bɔi een Israyil meel ger. Ma waan o eene lɔɔci kɔr irkitok iiyu kibeem nyelowe tɔrkɔɔm e, adak ol tarjo ci appe looce nice dook. ²⁶ Bar Jooi ɲaan kitoon Ilija kook ɲaawe codoi ɲaane nicoko, ma bar itoon niini nɔɔɔ kook ɲaawe ci bɔi oman ci abaak kuture o kazi Zarepaz looce o kazi Sidon. ²⁷ Buk baale irkite o nyakanan o kazi Ilica, anyak ol ci meel ger een Israyil amɔɔr dɔbanɛ. Ma ɲaan korogoz Jooi codoi ɲaatineɲ, ma bar waanice ako arogoz niini eet o kazi Naaman baal abaak looce o kazi Siriya e doon.”

²⁸ Mazi azii ol ci aavtiz ceeze ci lotento noko zoowok nicoko, otoborit nɔɲ. ²⁹ Enico itingazo niigi jena, ma aduɲnan Yesu ceeza ɲina, ma avoyi nɔɔɔ zee been kutur uneɲ abil be tadena ka kɔɔt kujuktek nɔɔɔ ɲolol ɲinaante. ³⁰ Bar Yesu aara ele nɔɔɔ korogena nɔɔ, otɔɔ.

Aara Yesu miniɲit ci Loryento eete oman

³¹ Ook ni Yesu kuture o aavi Galiliya kazi Kapernam, ma ako ademɛz ol ceeze o lotento ɲinaante iitene o yubzento kazi Sabit. ³² Ma abiiir ol ooti demziinte cin o, eeci demziin cine o anyak dɔyiz. ³³⁻³⁴ Maje ceeze ci lotento noko anyak eet ci anyak miniɲit ci Loryento. Ma agerɛny miniɲit nici eete nico azi ne, “Yesu o Nazaret, arooɲ ɲaatinaaɲ naa? Akun ka ija uulalet? Kagayin naana ineet nɔɔɔ akun Joowa.”

³⁵ Ma agerɛnyek Yesu miniɲit ci Loryento noko anek ne, “Jawɔ tiv! Duna bitaala eete nico!” Uruyi ni miniɲit nici eet nico looc ol korogena ɲina, ma aduɲnak bitaalin kɔkɔm gi ci ger agoonek eet nico.

³⁶ Mazi ako acin ol gi nico, ibiirit nɔɔɔ ooti ɔɔɔt ele, ma ano ne, “Mayo dim zɔɔz taz nici ci azɔɔzeke niini miniɲ ci Loryento dɔyiza, ma aduɲnan o?” ³⁷ Ma aziikne kaviyawa o akati Yesu looc nice dook.

Arogoz Yesu ol ci meel amɔɔr

³⁸ Enice udun Yesu ceeze o lotento ook ole o Saiman. Maje inyik o Saiman anyak ele bariton ɔɔɔt. Uduktak ni ol Yesu mɔɔriz ci inyigo noko. ³⁹ ɲinaanto ook Yesu, ma abil kuwen ci ɔɲɲe ɲaa noko libira, ma azoozek mɔɔriz nico kudunak bitaalin. Enico ele uduna didi mɔɔrizi nici bitaala, ma ɲaaz inyik ci Saiman noko jena, ma alihliqek nɔɔɔ dayiin.

⁴⁰ Ma yomana mazi ako ii loota, anyaaktak ol Yesu ol dook o amɔɔr moorizok keɲti dook. Ma aku ataadek niini azeem nɔɔɔ dook, ma arogi niigi dook moorizowe ugeec pocoɔ. ⁴¹ Ma buk aara niini miniɲ ci Loryento ole ci meel, ma agerɛny miniɲa azi ne, “Een niina ɲeerti Joowo didi.” Maje Yesu agerɛnyek nɔɔɔ kajaktɔ, ma didi ajaki niigi, eeci aga niigi nɔɔɔ een Kiristo o are ol o Juz neen.

⁴² Ma ɲeere ririwɔna itiya Yesu ook tuuwa niini doon. Ma arɔɲ ol nɔɔɔ zee mazi avɔ ajowa nɔɔɔ, orooɲit kalamit nɔɔɔ kaavu calañ awɔ ɲaatineɲ o. ⁴³ Bar anek Yesu nɔɔɔ ne, “Abon kakɔ kuuwai kaviyak o abon akati baliin o Joowo kuturyowe ogen buk, eeci nici gi baal laadun itoonakan Jooi aneet e neen.”

⁴⁴ Ook ni uuwak niini ceezine o lotento looce o kazi Judiya dook.

Awa Yesu nuyak o oowu

5 ¹ Ma iitene oman abil Yesu liil o kazi Genezaret otoga. Ma avunak nɔɔɔ ol ci meel zee ma ajuko, eeci arɔɲ niigi kiziiyit zɔɔz o Joowo. ² Ma acin Yesu kavoolet ceen ram eel dɔwɔna. Maje ol ci detiinto o udunta ɔɔt otoonyit cabayet. ³ Ma ako Yesu atɔɔt kavoolete nicoko o Saiman. Ma anek Yesu nɔɔɔ ne, “Toyooteyan di liil kedeyai dɔwɔna kidicilim.” Aavu ni niini kavoola ɲinaante, ma ademɛz ol.

⁴ Mazi ako adotiz niini demziinta, enek Saiman ne, “Tɔyɔɔt kavool kook boloca ka ɔɔt ujuktek cabayet cugooc o liil ɲinaante ka agamit kuluk.”

⁵ Ma abedeke Saiman nɔɔɔ anek ne, “Manyi, ɲaan ona kadetina baalin dook e, akom gi ci kagamana kina. Bar zin giye o aduwaket niina, ɲaan kacinana bodo.” ⁶ Mazi avɔ ajuk niigi cabayet didi, agamit kuluk ci meel ɔɔɔt kook zee ma arɔɲ atɛet cabayet. ⁷ Makacin alakada niigi gɔɔɲgi o aavtiz kavoole o abil dɔwɔna e ka kivita kitiritit nɔɔɔ. Ma avu abitiz niigi kavoolet dook ramantiya tɔc ci arɔɲ adode. ⁸ Mazi acin Saiman gi nico, iiya akati kozoɲti looc Yesu ɲuma, ma anek nɔɔɔ ne, “Manyi, deyai ɲaatan, eeci keen naana eet ci ger oɲenu.”

⁹ Ma abiiir Saiman kibeem gɔɔɲgi ci ɔrkɔr ki nɔɔɔ o ooti tet kuluge ci meelik agama niigi noko. ¹⁰ Buk Jemis kibeem Jɔn ween lɔɔz o Zebedi o gɔɔn adete kibeem Saiman abiiir ooti giye nico.

Ma anek Yesu Saiman ne, “Mā anyei ɲoliin. Inoko alaɲaan bodo adeti niina kuluk, bar akatai waanico ka detek ol Jook.”

¹¹ Utugurtak ni niigi kavoolet dɔwɔn, ma ɲinaante otɔɲtek kaal ugeec dook looc, oneec Yesu.

Arogoz Yesu eet ci anyak mɔɔriz o gidan

¹² Mazi akunak Yesu kutur oma, iiya eeti ci amɔɔr mɔɔriz o gidan ɔɔɔt. Mazi acin niini Yesu, aavu loota kɔpɔkɔk, ma ilalek nɔɔɔ anek ne, “Manyi, Mā arooɲ rogozan kizi maya, rogozan.”

¹³ Ma adɔɲa Yesu aziit, ma uum nɔɔɔ, ma anek ne, “Karooɲnyin rok. Inoko zin rogo.” Enico ele urugun didi niini mɔɔrize onin.

¹⁴ Iricanek ni Yesu nɔɔɔ enek ne, “Mā ako aduwai eet oma gi nico, bar iyiik kataman bitɔ yelek ele alaan o gɔɔn anyek Jook kaal o ataabi ol ka kagawin niini ineet obona. Biti zin buk taabinet o gɔɔn orogi eeti mɔɔriza kiyo aduwa lotinowa o Mosis o, ka kagayin ol urugu didi.”

¹⁵ Bar enico adala kaviyawa o Yesu ɲinite dook ɔɔɔt, ma avunak ol ci meel nɔɔɔ ka kivita kiziiyit zoowok ogin, ka buk korogozte niigi moorizowe ugeec. ¹⁶ Maje Yesu ako gɔɔn balala lak ci meelik ger, ka kook kaɲarowɔ ɲinaante niini doon.

Arogoz Yesu eet ci ɲanyɲany

¹⁷ Ma iitene oman ademez Yesu ol. Maje ol o kazi Parici kibeen ol o gɔɔn ademzek ol lotinok aavtiz buk niigi to ɲinaante. Avu niigi kuturyowe o Galili dook ki kuturyowe o Judiya dook been Jerusalema. Maje Yesu arogoz ol o amɔɔr dɔyize o Vɔɲiz o Joowo. ¹⁸ Ivitak ni nɔɔnɔ ol ci adɔɲa eet ci ɲanyɲany kuwena. Arɔɔɲ niigi kooti nɔɔnɔ ɲaati Yesu ceeza eecito, maje ol ceeza eecito meele ger. ¹⁹ Mazi acin niigi gɔl kaɲkaɲ nɔkɔ giye o meelini ol ceeza, ootodi eet ci amɔɔr noko ceez taden, ma avɔ abɔr ceez kuwet, ma abɔrane nɔɔnɔ ceez tadena kolocak looc ol kɔrgena ɲaati ona aave Yesu o. ²⁰ Mazi acin Yesu tuwen cineen o, enek niini eet ci ɲanyɲany noko ne, “Laɲo, aaryai baciinowa ugune.”

²¹ Mazi azii ol o Parici e kibeen ol o demziinto zɔɔz nico, abaabanit niigi izito ne, “Ma dim niini ɲeneen ci aduwa zɔɔz ci ayayizi Jook noko? ɲeneen ci anim kaara baciinok? Aara ri baciinok Jooi doon. Amomoz ri eeti nici Jook.”

²² Maje Yesu aga baabani cineen o nɔkɔ, ma anek nɔɔgo ne, “Ako ma abaabanu kaal nicoko nɔkɔ o naa? ²³ Mayo aboke jaɲ kenek ne, Aaryai baciinok ugune, yo da kenek ne, Tiɲa jena, to? ²⁴ Inoko zin abon kayelekuɲ naana ɲeerti Eeto kanyei dɔyiz ci kaarane baciinok loota ɲina.”

Enek ni niini eet ci ɲanyɲany noko ne, “Kanekin ne, Tiɲa jena. Doma kuwen cun o. Bitɔ olɔ.”

²⁵ Enico ɛle itiɲa eeti o ɲanyɲany e jena nɔɔgo keberen ɲina. Odoma kuwen onin ona ɔɲɛ e, ɔtɔɔ ɲaati anaati Jook, ook olɔ.

²⁶ Mazi acin niigi gi nico, ibiirit nɔɔgo dook ooti. Ma anaati Jook ɲoliinta, ma anɔ ne, “Kicinit zin kaal ci ateedet biye waanico.”

Awa Yesu eet ci kazi Livai

²⁷ Ma vurtu udun Yesu ceeza ook bitaala. Ma acin eet ci kazi Livai ci gɔɔn alot meeri aavi ɲaa onin gɔɔn alinɲiɲi. Ma anek Yesu nɔɔnɔ ne, “Nowawan.” ²⁸ Ma iɲaaz Livai kodotek kaal ogin dook ki liɲliɲon onin buk looc, ma ano Yesu. ²⁹ Ma ako agoonek Livai Yesu dayiin ci meelik ole onin, ma awa buk niini gɔnɔgi oogi ci meelik ole o meeryo been buk ol oogi. Ma avɔ azɔlɔ niigi dook ki Yesu. ³⁰ Maje bar ol ogeɲe ole o Parici kibeen gɔnɔgi o gɔɔn ademzek ol lotinok o Mosis anyori giye nico, ma ajin niigi nuyak o Yesu anek ne, “Ma dim niiga azolonu ki ol ci alot meeri o been ol ci oɲenu o naa?”

³¹ Mazi azii Yesu gi nico, ebedeke niini nɔɔgo enek ne, “Gɔɔn ol ci akɔm mɔɔriz ɲaatineen alaj arɔɔɲ akim. Bar zin gɔɔn arɔɔɲ akim ol o amɔɔr doon. ³² Alaj zin naana kakun o ka kiiya kotowa ol ci abon, bar kakunai ol o anyak baciinok ka keteedɔ niigi baciinok ugeec.”

Ajin ol Yesu gi ci akati zɔɔz o gɔɔn ooɲni ol dayiin

³³ Ma anek ol ogen Yesu ne, “Gɔɔn nuyawa o ɲon ooɲ dayiin, ma aɲarye ka kidinɲinonit Jook. Buk nuyawa o Parici agɔɔn nɔkɔ. Maje bar nuyawa cugune o alaj agɔɔn nɔkɔ. Adake gɔɔn niigi, ma awode iinya dook labak o naa?”

³⁴ Ma abedeke Yesu nɔɔgo anek ne, “Mā ɲaan eeti o rociinto aavito o, alaj rak bacowa ooɲ dayiin. ³⁵ Bar zin tiɲeere ma iiya iitene o aaryane niini ɲaatineen, enice ɲaan ooɲ niigi dayiin kibeen woden.”

³⁶ Ma aduwak Yesu nɔɔgo yabziin oma anek ne, “Akɔm laadun eet ci areec rum ci colai ka kubutani gɔn ci reen. Mā agɔɔn niini nɔkɔ, uulali koca niini rum ci colai o gaga nɔkɔ, eeci rum ci colai o kibeen gɔn ci reen o alaj agano. ³⁷ Akɔm buk eet ci arek iira buru ci reen. Mā agɔɔn niini nɔkɔ, ade koca iirana, ma alip buru kuɲuute iirana, ma akoloz niini iira kibeen buru buk. ³⁸ Abon zin aronek iirana buru ci colai. ³⁹ Inoko zin bar ol ogen areez demziin uneen reen doon, ma alaj arɔɔɲ niigi demziin ci colai o. Anɔ niigi ne, Abon demziin onaɲ reen.”

Zɔɔz ci akati iiten kazi Sabit

6 ¹ Ma iitene o yubzento kazi Sabit ɔtɔɔ Yesu, ma ako abatak maneen ci labinu. Ma aduula nuyawa ogine labi, ma aɲinya azeenen, ma adak. ² Mazi acin ol o Parici nɔɔgo agɔɔn nɔkɔ, ijinit enektek ne, “Agoonu gi calaj aziikneket lotinowa kutuguz iitene nico o naa?”

³ Ma abedeke Yesu nɔɔgo anek ne, “ɲaan da niiga ekeebit waragewe o Joowo zɔɔz baal agɔɔn alaani o kazi Devid kibeen ol ogin ɔrkɔr waanbaal adayi nɔɔgo magiz e? ⁴ Iitene nice ako niini ceeze o Joowo, ma ako adoma ɲɔken o gɔɔn ataabi ol Jook, ma adak, ma anyek buk oogi ol ogin ɔrkɔr. Agayu niiga waanice ɲɔken niceke alaj eeti ci gaga adak, bar adak alaata o agam ceez nice doon. ⁵ Mazin naana ɲeerti Eeto keen Manyi ci iiten o yubzento neen.”

⁶ Bodo iitene ceen Sabit oman ook Yesu ceeze ci lotento, ma ako ademez ol ɲinaante. Maje eeti ci ɲɔkɔm aziiti ci azo o aavi buk ɲinaante. ⁷ Ma adet ol o Parici kibeen alaata o gɔɔn ademzek ol lotinok o Mosis Yesu ka kicinit karabɔɲ arogoz niini ol iitene ceen Sabit o, eeci arɔɔɲ niigi gɔl ci ka kagamti nɔɔnɔ. ⁸ Maje Yesu aga baabanok cigeecik o nɔkɔ, ma anek niini eet ci ɲɔkɔm aziiti noko ne, “Tiɲa jena. Ija. Bil ol kɔrgena ɲaato.” Itiɲawa ni eeti, ma aku abil ol kɔrgena.

⁹ Enek ni Yesu nɔɔgo ne, “Kajinuɲ di iget. Ma lotinowa ogaac aziikneket kutuguz naa iitene ceen Sabit o? Kutuguz kaal ci abon, yo da kutuguz kaal ci ger? Korogozit eet, yo kuruyit da kadaak?” ¹⁰ Ma agelem niini nɔɔgo dook. Ma anek eet ci ɲɔkɔm aziiti o ne, “Zolan aziit cun o.” Mazi azolan niini aziit, obona aziiti onine labak. ¹¹ Bar enico otoborit niigi nɔɲ ɔrɔɔt, ma abaaban niigi dook gi ci ka kutuguzek Yesu.

Aɲera Yesu toonnyak ween amɔtɔ ram

¹² Ma iitene oman ook Yesu be tadena ka kook kaɲarowɔ. Ma ako adica baalin dook ɲaryiinta ɲinaante. ¹³ Mazi ako aaliz tammu, otowa niini nuyak ogin, ma aɲera ɲaatineen ol ceen amɔtɔ ram, ma akanek nɔɔgo zaar ci kazi toonnyak. ¹⁴⁻¹⁶ Ma zin ol ci baal aɲera niini noko Saiman o akanek niini zaar o kazi Pitɔr, ki gɔtɔni Saiman Pitɔr o kazi Andoru, ki Jemis, ki ɲon ween gɔtɔni Jemis, ki Pilip, ki Bartalamu, ki Matiyu, ki Tomaz, ki Jemis ween ɲeerti Alvayoz, ki Saiman baal gɔɔn oorine looc onin akumawe o Rom e, ki Judaz ween ɲeerti Jemis, ki Judaz Iskariat baal ka kiiya kataalɔi Yesu e.

Ademze Yesu, ma arogoz ol moorizowe

¹⁷ Mazi abada Yesu kibeen nuyak ogin be tadena, iiya ibil niini ɲaaten raco. Ma avunak nɔɔnɔ nuyawa ci meel nuyawe ogin. Maje buk ɲinaante anyak ol ci meel avunak nɔɔnɔ looce o kazi Judiya, kibeen Jerusalema, kibeen kuture o kazi Tayor been Sidon o abil liiltoga. ¹⁸ Avunak niigi Yesu ka kiiya kiziiyit zɔɔz onin. Ma buk arɔɔɲ ka korogozte niigi moorizowe ugeec. Buk ol o agit

vonjizowa o Loryento avunak nɔɔɔ, ma arogoz niini nɔɔɔ. ¹⁹ Ma arawone ol dook nɔɔɔ ɲaati uumi, eeci anyak doyiz ci aduɲa alye cin o ci arogni ol dook.

Aduwa Yesu mayuwenet been nɔɔ ci kol

²⁰ Ma agelem Yesu nuyak ogin, ma anek ne, “Amayuktewu niiga o amaanu, eeci baliin o Joowo izi cunooɲ. ²¹ Amayuktewu niiga o adakuɲ magizeeti inoko, eeci katin anyernu. Amayuktewu niiga o aluyu inoko, eeci katin ararnu. ²² Amayuktewu niiga ɲaati amarninuɲ ol igeet, ma atookuɲ, ma adomnyuɲ, ma anekuɲ ne, Eeginu gerzete giye o atuyaɲ niiga aneet ɲeerti Eeto. ²³ Atalto zin ma avunakuɲ kaal ci eel nɔkɔ. Iitene nice orogomit talniinta, eeci itanonekuɲ igeet vɔyita ci appe ɔɔɔt tamma. Eeci buk baale jijitigeec agoonek nyakananet kaal nicoko. ²⁴ Bar zin izi nɔɲa wole ɲaatunooɲ igeet ol o eeginu botoro inoko, eeci uulawu niiga arɔkzet unooɲ loota ɲina. ²⁵ Izi nɔɲa wole ɲaatunooɲ igeet o anyernu inoko, eeci katin adakuɲ magizeeti. Izi nɔɲa wole ɲaatunooɲ igeet o ararnu inoko, eeci katin aluyu tildik tildik. ²⁶ Izi nɔɲa wole ɲaatunooɲ igeeta o gɔɔn adiɲɲinanuɲ ol dook inoko, eeci baale buk jijitigeec adiɲɲinan nyakananet o voloɲo nɔkɔ.”

Ereezit ol o amarninuɲ

²⁷ Ma anek Yesu nɔɔɔ ne, “Inoko zin kanekuɲ ne, Ereezit ol o amarninuɲ igeet. Utuguzek niiga nɔɔɔ kaal ci abon. ²⁸ Abaricek niiga ol o gɔɔn atoryuɲ utugeti ci amadi. Buk ijintek Jook ol o gɔɔn agoonekuɲ kaal ci ger. ²⁹ Mā arukin eeti voret co, towek bodo voret co. Mā akɔyi eeti rum cun malkinto, má abornei nɔɲ, bar anyek bodo rum oma labak. ³⁰ Anyek ol dook kaal ci olla ala niigi ɲaatun. Mā akɔyi eeti gi cun, má bodo ajin ka kabadakin. ³¹ Utuguz ol juruɲ kiyo buk arooɲnyu niiga nɔɔɔ kutuguzuɲ igeet juruɲ o.

³² Mā areezu niiga ol o gɔɔn areezuɲ igeet doon, utuguzu koca niiga gitaz ci abon o? Akɔm kina! Eeci ol o oɲenu areez buk niigi ol o gɔɔn areez nɔɔɔ. ³³ Mā agooneku kaal ci abon ol o gɔɔn agoonekuɲ igeet kaal ci abon doon, utuguzu niiga gitaz ci abon o? Akɔm kina! Eeci ol o baciinowu agɔɔn gɔɔn buk niigi nɔkɔ. Alaɲ zin niiga ka waan eelit kiyo niigi o. ³⁴ Mā anyeku ɲabolo ol o ka tiɲeere bodo kabadakuɲ igeet kaal nicoko doon, utuguzu koca niiga gitaz ci abon o? Akɔm kina! Eeci ol o oɲenu anyek buk niigi gɔɔɔgi o oɲenu ɲabolet ka bodo tiɲeere kabadake nɔɔɔ. ³⁵ Bar zin naana karooɲnyuɲ igeet eerezit ol o amarninuɲ. Utuguzek nɔɔɔ kaal ci abon. Anycek ol ɲabolet labak. Má zin bar bodo areyu nɔɔɔ ka kabadakuɲ, eeci ɲaan tiɲeere aruwonekuɲ igeet vɔyita ci appe, ka buk iziti niiga dɔl ci Jook o tammo. Areez niini ol o alaɲ anyek nɔɔɔ zany kibeen buk ol o agɔɔn kaal o ger. ³⁶ Abon awucnekuɲ ol igeet kiyo buk awucneku niiga Jook ween baatunooɲ o.”

Má apayeku ol gerzitin

³⁷ Ma amena Yesu demziinte onin azi ne, “Má apayeku ol gerzitin karabɔɲ akanu ol oogi zɔɔza, ka buk calaɲ apayekuɲ Jooi igeet gerzitin. Otonit ol o gɔɔn agoonekuɲ igeet kaal ci ger, ka buk kotoɲeyuɲ Jooi igeet kaal o ger agoonu. ³⁸ Anycek ol kaal labak, ka buk kanyuɲ Jooi igeet kaal o arooɲnyu. Ma kaala ci anyuɲ Jooi igeet o meelee ɔɔɔt kujuk kaal o anyeku niiga ol oogi. Mā ayabzaku eet kaal kizi kidice, ayabzakuɲ buk Jooi igeet kaal kizi kidice. Mazi ayabzaku eet kaal kizi meelee, ayabzakuɲ buk Jooi igeet kaal kizi meelee.”

³⁹ Ma aduwak Yesu nɔɔɔ zɔɔz ci anek ne, “Akɔm laadun eet ci ruben buk ci ayit gɔɔn ci ruben kiyo niini o. Mā agɔɔn niini nɔkɔ, iinak koca niigi dook look. ⁴⁰ Akɔm gɔɔn laadun eet ci ɲaan ademze ci adikir kujuk alaan o ademez nɔɔɔ. Bar zin ma idica niini demziin onin, ɲaan aku atobo niini buk kibeen alaan o ademez nɔɔɔ.

⁴¹ Naa zin rican gi ci abil keberece ci gotonon o, ma bar alaɲ abaaban rak gi ci appe abil keberece cun o? ⁴² Ku anei gon oma ne, Jai kaarawin gi ci anyei kebereca o, ma gi ci appe abil keberece cun o alaɲ rak aara naa? Zin niina ci adiɲɲinan ele vɔlɔɲa o aara rak gi ci appe abil keberece cun o ɔɔwa, zee mazi icino juruɲ, bitɔ zin aara gi ci abil keberece ci gotonon e.”

Keet kibeen kebere ogin

⁴³ Ma azi bodo Yesu ne, “Akɔm gɔɔn laadun keet ci abon ci abiirna kebere ci ger. Alaɲ buk keet ci gerze abiirna kebere ci abon. ⁴⁴ Gɔɔn laadun kaga naaga keet keberene ogin abiirna. Alaɲ eeti adoca keberec ci moneeco keete ceen karadac, ma alaɲ buk adoca eeti gemenyɔ keene ceen bila. ⁴⁵ Ma eeti ci abon aduwa kaal ci abon kaale o anyak niini zinize onin abon. Maje eeti ci gerze aduwa kaal ci ger kaale o anyak niini zinize onin ger. Eeci ɔɔɔgi aduwa kaal o anyak zinize eeci.”

Ol ceen ram eenyet ceezi

⁴⁶ Ma azi bodo Yesu ne, “Ma dim gɔɔn niiga awuyaɲ aneet aziyu ne, Manyi, Manyi, maje ɲaato alaɲ arooɲnyu utuguz kaal o kaduwakuɲ o naa? ⁴⁷⁻⁴⁸ Ma zin eeti ci iyyayan aneet, ma iziik zɔɔz onan, ma ozooti, atobo niini kibeen eet ci eenyet ceez kutur ɔɔwa. Ada niini looknya kizi wunte kal, ma aruwek zɔɔren looc kodoyit kak, ma iitir ceez kitiirwani kɔɔk. Mayo nuun aku tawani ci appe, alaɲ ceez cine noko aruk looc, eeci eenyeci niini kɔɔk kak ɲaati kutul. ⁴⁹ Maje eeti ci azii zɔɔz onan, ma alaɲ azooni, atobo niini kibeen eet ci eenyet ceez cin kɔkɔm zɔɔren, ma alaɲ aruwek azane looc kodoyit, ma alaɲ buk iitir ceez kitiirwani ka kɔɔk. Mazi aku tawani, aruyi ceez nico looc enico ele, ma oyoki kuulale ɔɔɔt ele.”

Arogoz Yesu gabaren ci alaan ci takirnyawu

⁷ ¹ Mazi ako adotiz Yesu zoowowe nicoko, ɔɔɔ ook kulture o kazi Kapernam. ² Maje ɲinaante anyak alaan ci takirnya o Rom. Alaani nici anyak gabaren cin areez ɔɔɔt. Maje gabarenti nici amɔɔr ɔɔɔt ele kizi daayizoi. ³ Mazi azii alaani nici kaal o agɔɔn Yesu, itoonun niini ol oogi ole o Juz mayan kɔɔt kutuya Yesu ka kiiya korogoz gabaren cin o. ⁴ Ivitak ni niigi Yesu, ma avu ilalek nɔɔɔ ɔɔɔt ka kiritit eet nico. Anek niigi nɔɔɔ ne, “Eeti nici eet ci abon ɔɔɔt. Agano ɲaati atirte niina nɔɔɔ. ⁵ Eeci areezet niini ageet Juz ɔɔɔt ele. Nɔɔɔ neen o eenyacaket ageeta ceez onaaɲ gɔɔn lotento ɲina o.”

⁶ Itiɲa ni Yesu orkorit kibeen nɔɔɔ. Mazi avo ajɔɲoz kɔɔk, itoona bodo alaani laɲotigin oogi kiiya kenektek Yesu ne, “Manyi, má bai amila ele gaga, eeci alaɲ aganonu ɲaati akunake kɔɔk can o. ⁷ Ma buk alaɲ naana alya kaganona ɲaati kakunakin ineet. Olla zin duwa zɔɔz ci aduwa ka korok gabarenti cane o. ⁸ Buk ɲaatan ele anyak alaat oogi ci adikir ɲaatan. Ma buk bodo naana kadikir takirnyaye ogan. Mā kanei co ne, Bitɔ kete, ako. Mā kawa oma kanei ne, Ija ɲaato, aku. Mā buk kaduwai gabaren gi ci kanei ne, Tugu gi nico, agɔɔn.”

⁹ Mazi azii Yesu zɔɔz nico, ibiir nɔɔnɔ ɔɔ ɔɔɔɔ. Ma abuuɔ ɔl ona anowa nɔɔnɔ e, ma anek ne, “Didile kaduwakuɔ igeet, ɲaan ɔɔɔn laadun kojowa eet ci anyak tuwen nɔkɔ. Yo nuun een ole o Israyil ele ɲaan kojowa eet ci abil nɔkɔ.” ¹⁰ Mazi amiiri ɔl ona itoona alaani e ɔlɔ, amada gabaren o amɔɔr e oroga.

Aɲaani Yesu ɲeerti ɲaa ci bɔi daayiza

¹¹ Taman nɔkɔ itija Yesu ook kuture o kazi Nayin. Maje buk nuyawa ogine kibeen ɔl ci meel ano nɔɔnɔ. ¹² Mazi awowonek niini kutur, urumtɔ ki ɔl ci atik eet ci adaai avɔyi dawiiin. Maje logoti ci adaai noko adoye ɲaati yaatin tɔr nɔkɔ. Bodo buk yaatine alya ɲaa ci bɔi. Ivitak ni ɔl ci meel ole o kuturo ɲaa nico ka kivita kozooztek nɔɔnɔ. ¹³ Mazi acin Manyi Yesu ɲaa nico, uwucek niini nɔɔnɔ, ma anek ne, “Má alu gaga.” ¹⁴ Ook ni niini, ma akɔ uum kuwen ci ona atiki ɔl logo ci adaai noko, ma eel ɔl ci ona atik nɔɔnɔ o. Ma azi Yesu ne, “Logoz, kanekin ne, Tiɲa je.” ¹⁵ Enico ele, itija logoti ona adaai e, ma azɔɔz. Anyek ni Yesu nɔɔnɔ yaatin.

¹⁶ Ma akunak ɔl dook ɲoliin ɔɔɔɔ. Ma anaat niigi dook Jook anɔ ne, “Eyelizyayet nyakanjani ci anyak dɔyiz ci appe.” Maje bodo ɔl ogen anɔ ne, “Iiya Jooi ka kiiya korogoz ɔl ogin.”

¹⁷ Ma adala zɔɔz nica looc o Judiya dook kibeen buk kuturyok o aɲɔɲɔ.

Itoonek Jɔn o oonyi Yesu toonnyak

¹⁸ Ivita ni uduktak Jɔn nuyawa ogine kaal o agɔɔn Yesu dook, ma awa niini ɔl ram ɲaatineɲ. ¹⁹ Ma itoon nɔɔɔɔ kɔɔɔ kijinit Yesu kenektek ne, “Ma dim een eet baal ka kitoonayet Jooi e neen, yo kereya da eet oma ci ɲaan aku?”

²⁰ Ivitak ni nuyawa nicigi Yesu, ma avu anek ne, “Itoonanet Jɔn o oonyi ka kivita kijintin ineet kenekteyin ne, Ma dim een eet baal ka kitoonayet Jooi e neen, yo kereya da eet oma ci ɲaan aku?”

²¹ Maje ɲaati ona azɔɔzɔne niigi ki Yesu noko, arogoz Yesu ɔl ci meel amɔɔr moorizok keɲti dook, kibeen ɔl ci anyak miniɲ o Loryento, ma akɔl ɔl ci ruben meelik kebere kicintɔ. ²² Ebedeke ni Yesu nuyak ci Jɔn een ram noko enek ne, “Imiirtozek Jɔn. ɔɔɔ uduktak kaal ci ona acinu, ma aziɲɲu noko. ɔl o ruben icintɔ. ɔl o ɲɔɔlik ɔɔɔzɔ tɔp labak. ɔl o amɔɔr mɔɔrɔz o gidarɔ orogita. ɔl o adiiti iina iziikɔ. ɔl o adaai itijagazɔ daayiza korogit bodo. Maje kaviyawa o abon uuwawonek ɔl o amaati. ²³ Amayuk zin Jooi eet ci atuyan aneet kaale o kagoon dook.”

²⁴ Mazi amiiri toonnyawa ci Jɔn noko, ijin Yesu ɔl o arome ki nɔɔnɔ zɔɔz ci akati Jɔn anek ne, “Baale avoyu ɲaati Jɔn balala e, arooɲnyu da ɔɔt icinit naa? ²⁵ Arooɲnyu ɔɔɔt icinit arte ci amɔɔni ɲɔɔti? Yo da arooɲnyu ɔɔɔt icinit eet ci aborcek rumanɔ ci alina? Bar kanɔ alaɲ een neen, eeci ɔl ci anyak rumanɔ ci alina abaak ɔɔɔn niigi ceezine o adikir alaatu. ²⁶ Yo da arooɲnyu ɔɔɔt icinit nyakanjan? Kanekuɲ zin ne, Icintu zin da didi niiga eet ci adiɲɲiɲ kujuk bar nyakanjan. ²⁷ Eeci Jɔn nica nyakanjan baal azɔɔz Jooi waragewe onin e neen, baal azi ne, Kitoon katin toonnyai onan karayai ɲaatun, ka kiiya kidimdimaneyin ɔl unun.

²⁸ Kanekuɲ zin ne, Jɔn niini nyakanjan ci titiny kujuk ɔl dook. Maje eeti ci abaak baliinte o Joowo mayo nuun celbez niini ɔɔɔɔ, adiɲɲiɲ niini ɔɔɔɔt kujuk Jɔn.”

²⁹ Mazi avɔ azii ɔl dook kurum buk ɔl o alot meeri zozok ci aduwa Yesu o, agaac niigi bar da zɔɔz o Joowo baal oonyi Jɔn nɔɔɔɔ e zɔɔz ceen didi. ³⁰ Maje bar ɔl o Parici kibeen ɔl o ɔɔɔn ademzek ɔl lotinok o Mosis otoborit niigi ɔl o Joowo akati nɔɔɔɔ, ma abor toonyenet ɲaati Jɔn.

³¹ Izi ni Yesu ne, “Kayo ɔl ci ɔɔ nico noko kotobozek gitaz? ³² Atobɔ bɔɲ niigi kibeen dɔl o miliny ɔɔɔn amici kɔrɔk bawuca o, o ɔɔɔn ma anek ogene ɔɔɔɔɔ ne, Karuwekuɲ kidoret, bar niiga alaɲ arooɲnyu orogomit. Kabena beniin o daayizo, bar niiga alaɲ arooɲnyu utuluz. ³³ Baale ma aku Jɔn e, alaɲ niini nyaan awot, ma buk alaɲ adak dayiin ci adak ɔl dook o. Ma aziyu niiga ne, Anyak Jɔn miniɲit alya. ³⁴ Kiiya naana ɲeerti Eeto, ma kaku kadake, ma kawode. Bodo aziyu ne, Icinit di eet nico. Anyak alem, ma abaaki, ma eeginɔ laɲoten kibeen ɔl o alot meeri ki ɔl o baciinowu. ³⁵ Ayelzai zin genyizi o Joowo keleeme ole o agama nɔɔnɔ dook.”

Aavi Yesu korge o Saiman ween Pariciwen

³⁶ Otowo ni eeti ceen Pariciwen kazi Saiman Yesu ka kɔɔt kadaktɔ ki nɔɔnɔ ole onin. Ook ni Yesu ɲinaante. ³⁷ Maje kuture nice anyak ɲaa ceen waɲɲyai. Mazi azii niini Yesu aavi ole o eet ween Pariciwen, iya anyaa ketezewoc ci anyak karacoc. ³⁸ Ma aku abilnek niini Yesu eci bawuco. Ma alu olla murur nɔkɔ zee makacin aparantozek tilalɔ cigine o Yesu zɔɔ. Ma eeya tilalɔ Yesu zɔɔne imane, ma acoco nɔɔnɔ zɔɔ, ma aduuteke buk nɔɔnɔ karacoc zɔɔ. ³⁹ Mazi acin eeti ceen Pariciwen noko gi nico, abaaban niini doon ziniza izi ne, “Mate eeti nici kizi nyakanjan didi, aga waan ɲaa ci uum nɔɔnɔ noko ɲaa ci baciinowu.”

⁴⁰ Enek ni Yesu nɔɔnɔ ne, “Saiman, anyak gi ci karoɔɲ kuduwayin.”

Ma abedeke niini nɔɔnɔ anek ne, “Duwayan labak, alaan o demziinto.”

⁴¹ Ma anek Yesu nɔɔnɔ ne, “Anyak baale ɔl ceen ram ci adoma guruc eete oman ka katin kuruktek niigi nɔɔnɔ. Eeti codoi ɲaatineɲ adoma guruc ceen kaboot tur (500). Maje eeti ceeni adoma guruc ceen eet ram kamɔɔtɔ (50). ⁴² Alaɲaan ni ɔl nici anim kuruktek guruc nicoko eet baal adoman niigi guruc e. Makacin otoɲek niini nɔɔɔɔ guruc calarɔ ajin bodo.”

Ma ajin Yesu Saiman anek ne, “Mayo inoko ole ceen ram noko ɲeneen ci areez nɔɔnɔ ɔɔɔɔt?”

⁴³ Ma abedeke Saiman nɔɔnɔ anek ne, “Ecan kazi ne, Areez nɔɔnɔ ɔɔɔɔt eeti o ooɲnek guruc o meelik e.”

Enek ni Yesu nɔɔnɔ ne, “Aleema zin didi.”

⁴⁴ Enico ubuude Yesu, ma acin ɲaa, ma anek Saiman ne, “Acin yo ɲaa nico? Uyen ma kakunakin naana ineet ole unun e, akɔm maam ci anyan ka kotoonyi zɔɔ. Maje bar ɲaa nici inoko iya otoonyan zɔɔ tilaloye ogin, ma eek bodo kodoyit kotire cin o. ⁴⁵ Buk uyene niina keere onai ɲaan talawan cocowan ɲalyamoc. Maje bar ɲaa nici inoko iya ococowan zɔɔ ɲin ona kakune e dook.

⁴⁶ ɲaan buk uyen niina vuudan ɔɔ maala. Maje bar niini inoko iya uvuudan zɔɔ karacoca. ⁴⁷ Kanekin zin ne, Ma reezinet cine o ayelza gi o aaryai nɔɔnɔ baciinowa ogine meelik. Bar zin eeti ci aaryai ɲaatin baciinowa ci miliny alaɲ anyak reezinet ci appe.”

⁴⁸ Enek ni Yesu ɲaa ne, “Aaryai baciinowa ugune.”

⁴⁹ Mazi azii ɔl ci ona adake kibeen nɔɔnɔ o zɔɔz nico, ijintɔ izitɔ ne, “Ma dim niini ɲeneen ci ka kaara baciinok o?”

⁵⁰ Maje Yesu anek ɲaa ne, “Uruguzin ineet tuwen unune. Tɔ yaak.”

Ŋaai ci ɔrkɔr kibeen Yesu

8¹ Ma bodo iinyaye ogen ook zɔɔp Yesu kuturyok o adikir kibeen o miliny buk, uuwak kaviyak o baliin o Joowo. ɔrkɔr niini kibeen nuyak ogin een amɔtɔ ram. ² Buk Ŋaai baal aara niini miniŋ o Loryento ŋaatineeŋ e kibeen Ŋaai baal arogoz niini mɔɔrizɔi e ɔrkɔr kibeen nɔɔnɔ. Ma Ŋaai nicigi awɔyi Meri o looc o kazi Magdala baal aara Yesu ŋaatin miniŋ o Loryento een torgerem e. ³ Ki Jowana ween Ŋaa o eet o kazi Cuza o alinŋinonek alaan o kazi Erod, ki Susana, been Ŋaai oogi ci meel ci goon atirit niigi Yesu kibeen nuyak ogin guruce o ajowa niigi kaale ugeec.

Zɔɔz ci ayabzonek eet ci aɗowe

⁴ Mazi avɔ alotak kɔle ci meel Yesu kuturyowe dook, iiya uduwak niini nɔɔgo yabziin ci anek ne, ⁵ “Anyak baale eet ci ako ɗowen mana. Mazi ako aɗowe, iitazak ɗowo ogene gɔl keŋ, ma arɔc ɔl zɔɔne, ma avu avera kibaali. ⁶ Bodo ɗowo ogen iinak ŋinti een biyen. Mazi ako aduŋna, araabjai taman nɔkɔ, eeci akom tɔɔ nicoko nyonac ci ka kurukteke ɗowo agerɔ looc. ⁷ Bodo ɗowo ogen iinak bila kɔrgen, ma iŋaaz niigi dook kibeen bila zee makacin eedit bila nɔɔgo calaŋ abiiir. ⁸ Maje ɗowo ogen iinak tɔɔ ci abon, ma iroktai zee makacin ibiirito juruŋ, ma anyaa goon vokonti codoi kebere ci meelik ger.”

Mazi adica Yesu yabziin nico, enek nɔɔgo ne, “Mā anyaku iin, iziiyit zɔɔz nico juruŋ.”

Abɔra Yesu keŋ ci yabziin nico

⁹ Mazi ajin nuyawa Yesu keŋ ci yabziin nico, ¹⁰ abedeke niini nɔɔgo anek ne, “Anyozzeyuŋ igeet genyizi ci ka agayi zoozok o baliin o Joowo aroodi. Maje bar ɔl oogi aduyak olla nɔɔgo zoozowa nici gole ci yabziinto, ka mā azii, alaŋ aga keŋti cigeec.

¹¹ Keŋ zin ci yabziin nico neen ce. Ma ɗowo zɔɔz o Joowo neen. ¹² Ma ɗowo ci iinak gɔl keŋ o, atobɔ ki ɔl o goon azii zɔɔz o Joowo. Ma bar taman nɔkɔ aku Loryen, ma aara zɔɔz nico zinzeetine ugeec ka calaŋ atuwe ka korogit. ¹³ Ma ɗowo ci iinak tɔɔ ceen biyen o, atobɔ niigi kibeen ɔl o goon azii zɔɔz o Joowo, ma agam talniinta, bar alaŋ ako zɔɔz nici zinzeetine ugeec juruŋ. Ma atuwe niigi ŋintimiliny nɔkɔ. Mazi aku gi ci acina nɔɔgo tuwente cineeŋ o, ooŋ niigi tuwen, ma amiiri bodo ki vurut. ¹⁴ Ma ɗowo ci iinak bila kɔrgen o, atobɔ niigi kibeen ɔl o goon azii zɔɔz o Joowo, ma atuwe, maje bar bodo ŋaato iinon zinzeeti ugeec kaal o loocu, ki arɔkzet, been kaal o arɛez niigi kutuguzɔ loota ŋina zee makacin acabit kaala nici nɔɔgo calaŋ tuwen cineeŋ o ako ki taden. ¹⁵ Ma ɗowo ci iinak tɔɔ ci abon o, atobɔ niigi kibeen ɔl o goon azii zɔɔz o Joowo, ma azooni juruŋ zinzeetine ci abon. Ma amena niigi tuwente uneeŋ zee ma alinŋinonek Jook juruŋ gole ci abon.

Zɔɔz ci ayabzonek lamba

¹⁶ Akom zin laadun eet ci atokol lamba, ma bodo abun kodooca, karabɔŋ arek kerca loota. Bar kanɛ atokol niini lamba, ma arek ceez kɔrgen ka kataraan ceez dook, ka mā avunak ɔl ceez, acin niigi looc juruŋ. ¹⁷ Zin mā anyak gi ci inoko aroodi, katin ayelzai kiziiye. Buk mā anyak gi ci abunɛ, katin ayelzai kicine, ma adenyai juruŋ vooritina.

¹⁸ Abon zin niiga aziiknu zɔɔz o Joowo juruŋ. Eeci eeti ci aga zɔɔz o Joowo azaaconek nɔɔnɔ kizi appe. Maje bar eeti calaŋ zɔɔz o Joowo aga, ma bar abaaban niini kizik aga ci miliny, aamnyai koca bar ŋaatin ci miliny noko kavu nɔkɔ dook.”

Gotɔnɔgi Yesu kibeen yaatin

¹⁹ Mazi avɔ avunak Yesu gotɔnɔgja kibeen yaatin, akoma gɔl ci ka kurumtɔi niigi been nɔɔnɔ, eeci meele ɔl ɔrɔɔt. ²⁰ Iiya ni enek eeti oman Yesu ne, “Yaatin kibeen gotonogu bitaala. Arɔɔŋ kicintin ineet.”

²¹ Ma abedeke Yesu nɔɔgo dook anek ne, “Yaai kibeen gotɔnɔga neen ɔl o azii zɔɔz o Joowo, ma azooni.”

Ajaŋan Yesu ŋɔɔt

²² Ma iitene oman enek Yesu nuyak ogin ne, “Kabaaktozek di liil baagit.” Otoodit ni niigi kavool ɔtɔɔz. ²³ Mazi ŋaan awɔ liil keŋa nɔkɔ, eteeda Yesu ooŋnya. Ŋintimiliny nɔkɔ iiya ŋɔɔti ci appe ɔrɔɔt, ma apalpalanek maam kavool ci arɔɔŋ uup. Makacin iziti niigi tirinye ɔrɔɔt ele. ²⁴ ɔtɔ ni nuyawa ŋaati Yesu, ma avɔ iinŋa anek ne, “Manyi, Manyi, tiŋa je! Iiyayet daayizi!”

Ma iŋaaz Yesu jena, ma agernyek ŋɔɔt kibeen maam o apalpalani e kitivante. Ma ajaŋani didi tiv. ²⁵ Ma anek niini nuyak ne, “Tuwen cunooŋ o inoo?”

Ma abiiir nɔɔgo ooti tet, maje ŋaato anyak ŋoliin. Ma ajinɔ niigi maany anɔ ne, “Mayo eet taz nici? Meen nuun ŋɔɔt kibeen maam agernyek, ma azii nɔɔnɔ kajaŋante tiv!”

Arogoz Yesu eet ci anyak miniŋ

²⁶ Enice ɔɔtɔ Yesu kibeen nuyak ogin zee ma avɔ arum looc ci ajɔŋɔzɔ ki kutur o kazi Garazin o avenɔ ki Galili liil baagita. ²⁷ Mazi aduŋnak Yesu ɗowɔn ŋinaante, iiyak nɔɔnɔ eeti ci anyak miniŋ ci Loryento. Eeti nici awɔ ŋaɗinyiny nɔkɔ irkitok ci meel ger, ma buk alaŋ abaak ɔɔ, bar abaak vitenane o goon adawi ɔl ɔl o adaai. ²⁸ Mazi acin niini Yesu, egereny ɔrɔɔt ele, ma avaci ele looc nɔɔnɔ zɔɔne. Ma azi molowe ci appe ne, “Yesu ween ŋeerti Jook o adikir, arooŋ gitaz ŋaatan? Kilalekin ineet, má da apiranan.”

²⁹ Aduwa niini gi nico o, eeci egerenyek uyen Yesu miniŋ o Loryento kudunta ŋaatin. Lak ci meel ger ci goon agidi miniŋa nici nɔɔnɔ. Ma acap ɔl nɔɔnɔ azeen been zɔɔ ziiyi, bar atɛet niini ziik nicoko, ma awɔyi nɔɔnɔ miniŋa nici balala.

³⁰ Ma ajin Yesu nɔɔnɔ anek ne, “Kazi zaar cugun ne?”

Abedeke niini Yesu anek ne, “Kazi zaar cigan ne Kɔle.” Aduwa niini zɔɔz nico o, eeci anyak niini miniŋ ci Loryento meel alya. ³¹ Ma ilalek miniŋa nici Yesu ka calaŋ atooyek niini nɔɔgo ŋolol o miniŋu. ³² Maje ŋinaante anyak kɔcɔcɔbanen ci meel ger age be tadena. Ma ilalek miniŋa nicigi Yesu ka kanyek nɔɔgo kɔɔt kɔcɔcɔbanene nicoko. Agama ni Yesu zɔɔz cineeŋ o. ³³ Ma aduŋna miniŋa ci Loryento noko eete nico, ma avɔ kɔcɔcɔbanene. Ma avira kɔcɔcɔbanena nici tadena, ma avu iinak liil kutudude niigi dook lai.

³⁴ Ma adɔkɔny ɔl ci ona owa kɔcɔcɔbanen o, ma avɔ aduwak ɔl o kuturo kibeen ɔl maneeni gi nico. ³⁵ Ivita ni ɔl ka kivita kicinit gi ci agooni o. Mazi avunak niigi Yesu, amada eet ona aduŋna miniŋa o Loryento ŋaatin e aavi Yesu libira. Anyawun rum alya, maje buk ɔɔ onine obona labak. Ma anyak ɔl dook ŋoliin zooze nico ɔrɔɔt. ³⁶ Oobtek ni ɔl ona aavtiz tɔ e ɔl ci ona avu vurta o zɔɔz

ci arogzi Yesu eet nico o. ³⁷ Enektek ni ol dook o abaa looce ci kazi Garazin noko Yesu ne, “Tɔ looce cinaaŋ o”, eeci anyayit niigi ɲoliin ɔɔɔt. Enico otooɗun Yesu kavool, ɔɔɔ. ³⁸ Ilalek ni eeti ona aduɲna miniɲa ci Loryento ɲaatin noko Yesu enek ne, “Korkorit da.”

³⁹ Bar anek Yesu nɔɔɔ ne, “Akɔm! Miire. Bito ɔlo, ka bito duwak ol gi ci ona agoonekin Jooi noko.”

Ɔɔɔ ni eeti nici, ma akɔ azɔp kutur uneeɲ dook aduwak ol gi ci ona agoonek Yesu nɔɔɔ o.

Dole o Jairas kibeen ɲaa ci uum Yesu rum

⁴⁰ Mazi akɔ abada Yesu liil baagita, atalta ol ci meel nɔɔɔ, eeci uyen laadun are niigi dook nɔɔɔ. ⁴¹ Iiyak ni nɔɔɔ eeti ci kazi Jairas ceen alaan ci miliny ceeze o Juz lotento. Aku niini, ma akani kozoŋti looc Yesu ɲuma, ma ilalek nɔɔɔ ka korkorit kɔɔɔ ole onin. ⁴² Eeci anyak niini beenyin ci adoye ɲɔr nɔkɔ ci een irkitowa ci aritan amonki ram. Amɔɔr niini ɔɔɔt ele, ma ɔɔɔyayi ka kadaak.

⁴³ Ma awo Yesu o, adala ol nɔɔɔ libiro dook. Maje ole nicoko eecito anyak ɲaa ci amɔɔr ariik keɲ biye irkitok amɔɔt ram. Ma adica niini kaal ogin anyak dook akimanen, ma ɲaan kojowa akim ci arogoz nɔɔɔ nɔkɔ. ⁴⁴ Iiyak ni niini Yesu eci bawuco kole korgena ɲina, ma aku uum nɔɔɔ rum onin malkinto. Enico ele itivane keɲ onine ariike tiv.

⁴⁵ Ma ajine Yesu azi ne, “ɲeneen ci uumnyan o?”

Ma adanɲye ol dook zee makacin izi Pitɔr ne, “Manyi, ajine o, ma aliyenin ol libiro dook zee ma ajuko noko alaɲ acin?”

⁴⁶ Maje bar Yesu azi ne, “Anyak eet ci uumnyan tɔ, eeci kaga anyak ɔyiz ci uduna ɲaatan.” ⁴⁷ Mazi akɔ acin ɲaa Yesu agawun gi ci ona agoon niini o, iiya ɲoliinta kabarit, ma aku akani kozoŋti looc Yesu keɲa. Ma aduwak nɔɔɔ ol korgena ɲina gi ci aku uumi niini nɔɔɔ o, kibeen roget ci orogi niini enico ele o.

⁴⁸ Enek ni Yesu nɔɔɔ ne, “Beenyin, uruguzin ineet tuwen unune. Tɔ yaak.”

⁴⁹ Mazi ɲaan aduwa Yesu gi nico nɔkɔ, iiya eeti ci itoonyayi ole o Jairas. Ma aku anek nɔɔɔ ne, “Adaak beenyun. Má ɲaan amila alaan ci demziinto o gaga.”

⁵⁰ Maje buk Yesu azii gi nico nɔkɔ, ma anek Jairas ne, “Má anyei ɲoliin gaga, bar olla tuwo, eeci arogi tedec beenyun labak.”

⁵¹ Mazi akɔ arum Yesu kɔɔkɔ o Jairas, alamun niini ol dook ɲaati avoyi ceeza. Ma akoyi niini ceeza Pitɔr ki Jɔn ki Jemis ki baati doleco ki yaatin doon. ⁵² Maje ol dook alu, ma iinon dole. Ma anek Yesu nɔɔɔ ne, “Má aluyu gaga. Alaɲ dole adaai, olla ɔɲ labak.” ⁵³ Bar ararni niigi nɔɔɔ zooze nico, eeci aga niigi dole adaawa. ⁵⁴ Ma agam Yesu dole aziit, ma awo anek ne, “Dole, tiɲa je.” ⁵⁵ Ma abadaak dole vɔɲizi onine, ma ɲaaz enico ele. Ma anek Yesu nɔɔɔ ne, “Anycek dole gi ci adak.” ⁵⁶ Ma abiir baatin ki yaatin ooti ɔɔɔt ele giye nico, bar aricanek Yesu nɔɔɔ calaɲ aduwak ol oogi gi nico.

Itoon Yesu nuyak ween amɔɔt ram

⁹ ¹ Ma iitene oman otowa Yesu nuyak ween amɔɔt ram ɲaatodoi, ma anyek nɔɔɔ ɔyiz ci ka kɔɔɔkti miniɲ o Loryento ɔla, ma arogozi ol mɔɔrizoi. ² Itoonun ni nɔɔɔ kɔɔt kuuwayit baliin o Joowo, ma arogoz ol mɔɔrizoi. ³ Ma anek nɔɔɔ ne, “Ɔɔɔ kɔkɔm gi ci anyaku. Kɔkɔm keen ci omtinto, ki kaboot ci anyaku kaal, ki dayiin, ki guruc, ki rumane. ⁴ Mā ajowanu kɔɔkɔ ci atalnanuɲ ol, aavtiz ole nico zee been iiten ci awoyu kuture nico. ⁵ Mā ajowanu kutur calaɲ atalnanuɲ ol igeet, utuduɲta tɔɔɔ zɔɔne ka keyeliza gi nici gi o aborni niigi zɔɔɔ onan.”

⁶ Ɔɔɔɔ ni nuyawa, ma avɔ azɔp kuturyok ci meelik aduwak ol kaviyak o Joowo abon, ma buk arogoz ol ci amɔɔr vitenane niceke dook.

Abaraɲe Erod ɔɔ

⁷ Mazi akɔ azii Erod ween alaan o Galili kaviyak o kaal o agoon Yesu, abaraɲe nɔɔɔ ɔɔ ɔɔɔt ele, eeci azi ol ne, “Nicini Jɔn baal oony ol e neen itiɲa bodo daayiza.” ⁸ Maje bodo ogene azi ne, “Ilija gi abada tamma.” Maje ol ogen anɔ ne, “Nyakananete baal adaayito e itiɲa bodo daayiza.”

⁹ Ma azi Erod ne, “Baale kanyeya takiren keteeda Jɔn ɔɔ. Mazin bodo eet ɲaɲ ci kazii ɲaan agoon kaal nicoko o?” Oroonun ni niini kicin Yesu ɔɔɔt.

Adayiz Yesu ol ci meel ger

¹⁰ Mazi avɔ abada toonnyawa keronnya, ivita uduktak Yesu kaal baal avɔ agoon niigi o dook. Ma akoyi Yesu nɔɔɔ doon ɲaati ajɔɲɔɔ ki kutur o kazi Bezediya. ¹¹ Mazi avɔ azii kole Yesu ook ɲinaante, oneec buk niigi nɔɔɔ. Ma akɔ atalna Yesu nɔɔɔ dook. Edemzek ni niini nɔɔɔ zɔɔɔ o akati baliin o Joowo, ma buk arogoz ol ci amɔɔr ɲaatineen.

¹² Mazi akɔ atoltol ii loota yomana, ivitak nɔɔɔ nuyawa ogine een amɔɔt ram, ma avu anek ne, “Anyek ol kazaantozek korogjok ci ajɔn ɲina noko ka coma avɔ ajowa dayiin kibeen viten ci oogine ɲinaante, eeci ɲiniti een balal.”

¹³ Bar abedeke Yesu nɔɔɔ anek ne, “Anycek nɔɔɔ dayiin ci adak niiga alya.”

Ma abedeke niigi nɔɔɔ anek ne, “Kanyaka ɔken tur nɔkɔ kibeen kuluk ram. Aroonnyet te koota kataaltawa dayiin ci ka kadayit kole ci meel noko dook?” ¹⁴ Maje ol ci aavtiz ɲinaante o een maczet doon eet eetom lak ram ki eet amɔɔt lak tur (5000).

Ma anek niini nuyak ne, “Uduktak ol kaavtiyo loota. Anycek goon ol ceen eet ram kamɔɔt (50) kaavtiyo ɲaatodoi.”

¹⁵ Utuguzo ni toonnyawa eci ona aduwake Yesu nɔɔɔ o. ¹⁶ Odoma ni Yesu ɔken ceen tur noko kibeen kuluk ween ram e, ma agelem tammu taden, ma anyek Jook zany dayiine nicoko. Ma ateet, ma anyek toonnyak ka keɲeryek niigi kole dook. ¹⁷ Ma adake ol dook zee makacin ipiiyante, ma alota toonnyawa ɲodota ci anyigzai dayiine o zee ma abitiz gilanya amɔɔt ram.

Acuba Pitɔr zɔɔɔ o akati Yesu

¹⁸ Ma iitene oman mazi akɔ ajin Yesu Jook ɲaati aromen ki toonnyak ogin doon, ijin niini nɔɔɔ enek ne, “Ma dim inoko goon ol azi ne, Keen naana ɲeneen?”

¹⁹ Ma abedeke niigi nɔɔɔ anek ne, “Azi ol ogene ne, Een niina Jɔn o oony ol. Maje ol ogen azi ne, Een niina Ilija. Maje ogene anɔ ne, Een nyakananete baal reen e ci itiɲa bodo daayiza.”

²⁰ Ma ijin bodo niini nɔɔɔ anek ne, “Ma niiga aniyu ne, Keen naana ɲeneen?”

Ma abedeke Pitɔr nɔɔɔ anek ne, “Een niina Kiristo o itoonanin Jooi.”

²¹ Iricanek ni Yesu nɔɔgo gi ci anek ne, “Má avɔ zin aduwaku ɔl oogi zɔɔz nico been nɛn.”

Aduwa Yesu zɔɔz o daayiz onin ki ŋaazi onin

²² Ma anek Yesu toonnyak ogin ne, “Tiŋeere naana Ŋeerti Eeto kagide ɔɔɔt, ma abornan ɔl o Juz adikir, ki alaati o ceez o Joowo, been ɔl o gɔɔn ademzek ɔl lotinok o Mosis. Arukan tiŋeere niigi aneeta kadaak, ma iinyaye ceen iyyu kiŋaaz daayiza korok bodo.”

²³ Enek ni niini ɔl dook ne, “Má arɔɔŋ eeti konowan aneet, abon areyek nɔɔnɔ ele onine, ma abon agama giden ki piryakzet ŋaati anuyan niini aneet. ²⁴ Eeci eeti ci arɔɔŋ korogoz ele onin, bar akoloz. Maje eeti ci akoloz ele onin ŋaatan, bar arogz. ²⁵ Mayo zin inoko mā anyak eeti kaal o loocu dook, ma bar akoloz roget ci ele onin, bonat inoo? ²⁶ Mā anyak eeti ci anyak alyaan ŋaatan kibeem demziinte onan, buk tiŋeere naana Ŋeerti Eeto kanyei alyaan ŋaatin iitene ci kakune diŋdiŋonte onan, ki diŋdiŋonte o baaba, been diŋdiŋonte o toonnyak o tammo. ²⁷ Didile kaduwakuŋ iŋeet, anyak ɔl oogi ole ci aavtiyu ŋina noko calaŋ rak adaai zɛɛ ma alam acin niigi baliin o Joowo.”

Okcen o Yesu

²⁸ Mazi avɔ iinya ceen turge, ooyi niini Pitɔr ki Jɔn been Jemis be tadena ka kɔɔt kaŋaruyɔ ŋinaante. ²⁹ Mazi ŋaan aŋarye niini nɔkɔ, otowe ŋum onine, ma ookci rumanɛ ogine buk kizi vɔɔre per kataaraanet. ³⁰ Taman nɔkɔ ivita ɔl ceen ram, ma azɔɔz kibeem nɔnɔ. Ma ɔl nicigi Mosis kibeem Ilija. ³¹ Ayelzai niigi diŋdiŋonta, ma avu azɔɔz kibeem Yesu gi baal laadun akuni niini ka kiiya kadaai Jerusalema e. ³² Maje Pitɔr kibeem gɔnɔgi oogin. Mazi ŋaaz niigi ooŋnyai, bar acin Yesu otowe diŋdiŋonte onin kizi vɔɔr per, ma acin buk niigi ɔl ceen ram arome kibeem nɔnɔ. ³³ Mazi avɔ aŋerɔ Yesu ki ɔl nicoko, enek Pitɔr nɔnɔ ne, “Manyi, kavu te ŋina juruŋ inoko. Nyet keteenycawa kaal ceen ceezi kabili kɔr een iyyu, ka codoi kizi cun, codoi ci Mosis, codoi ci Ilija.” Aduwa buk Pitɔr zɔɔz nicoko kilek.

³⁴ Mazi ŋaan azi niini nɔkɔ, iyya diizoc ci appe, ma aku abuya nɔɔgo, ma anyak niigi ŋoliin diizoce nico ɔɔɔt ele. ³⁵ Ma aku diizoce nico mɔlɔyi ci azi ne, “Nicini ŋeeran onan kaŋera nɛn. Iziiyit zin niiga dook nɔnɔ.”

³⁶ Mazi ativani mɔlɔyi nici, acin nuyawa Yesu aavu niini doon. Ajaktɔ ni niigi ma ŋaan kuduktak eet oma iinyaye niceke kaal ci baal acin niigi o.

Arogz Yesu logo ci anyak miniŋit ci Loryento

³⁷ Mazi alocai niigi be tadena iitene ci ano gɔn o, ivitak kɔle ci appe Yesu. ³⁸ Ma agereny eeti oman kole nico eecitɔ azi ne, “Alaan o demziinto, kilalekin da cineyan ŋeeran can adoi tɔr nɔkɔ ce. ³⁹ Anyak gɔɔn miniŋit ci agam nɔnɔ kegereny ɔɔɔt tup nɔkɔ. Ma avaci looc kataval zɛɛ ma aduuv ɔtɔgi. Ma amena miniŋit nici agit nɔnɔ nɔkɔ, ma alaŋ arɔɔŋ kotoŋa been nɛn. ⁴⁰ Kilalei iiten baale nuyak ugun ka kaarya miniŋit nico, bar akomnek nɔɔgo ŋaati aarane.”

⁴¹ Ma anek Yesu nuyak ne, “Igeet ɔl ci akomnuŋ tuwen koko. Kayo koromte naana kibeem iŋeet zɛɛ been inin ka utuyo? Ka kemez zɔɔz cunooŋ zɛɛ been inin?”

Ma anek baati doleco ne, “Jai di ŋeerun ŋaato.”

⁴² Mazi ŋaan awoya dole nɔkɔ, avaci miniŋit nici nɔnɔ looc kir kataval, kabarit kedekedek. Ma agernyek Yesu miniŋit nico kuduna doleca. Orok ni dole, ma anyek Yesu nɔnɔ baatin. ⁴³ Ma abiir ɔl o aavtiz ŋinaante dook ooti dɔyize ci Joowo adikir noko.

Aduwa Yesu bodo zɔɔz ci akati daayiz onin

Mazi ŋaan abiir ɔl dook ooti kaale ci agɔɔn Yesu noko, enewun Yesu nuyak ogin ne, ⁴⁴ “Iziiyit di zɔɔz ci karoŋ kuduwayuŋ ce juruŋ. Iima naana Ŋeerti Eeto kanyononei azeen ci ɔl o deer.” ⁴⁵ Bar nuyawa alaŋ aga keŋ ci zɔɔz ci aduwak Yesu nɔɔgo noko, eeci waanice keŋ ci zɔɔz nico arɔɔdjai ka calaŋ niigi ajowa. Ma aŋole buk niigi ŋaati ajini nɔnɔ zɔɔz ci akati gi nico.

Ŋeneen ci adikir ŋume o Joowo?

⁴⁶ Ma eco adanɔi nuyawa niigi maany gi ci akati alaazet ŋaatineŋ anɔ ne, “Mayo dim ŋaatinai adikir ŋene?” ⁴⁷ Maje Yesu aga kaal ci eel zinzeetine ciŋeec o nɔkɔ. Odoma ni dole ci miliny, ma anyek kibil nɔnɔ libira. ⁴⁸ Ma anek nɔɔgo ne, “Ma eeti ci areez dole ci miliny kiyo nico noko zaare ogan, areezan buk koca niini aneet. Ma eeti ci areezan aneet, areez buk niini baaba o itoonanan aneet. Eeci eeti ci celbez ŋaatonooŋ, titiny bar niini ŋume o Joowo ɔɔɔt kujukuŋ iŋeet dook.”

⁴⁹ Ma anek Jɔn Yesu ne, “Manyi, kajowana iiten baale eet ci aara miniŋ o Loryento ɔla zaare ugun. Ma kalamnya nɔnɔ kibili gi nico, eeci niini alaŋ een eet cinai.”

⁵⁰ Ma anek Yesu nɔnɔ ne, “Má alamnyu nɔnɔ gaga, eeci eeti calaŋ amarninet ageet, niini eet cina.”

Abor ɔl Yesu kuture ci Samariya

⁵¹ Mazi ka kizi ŋinti ka kooyi Yesu tamma, itiŋa niini, ma atɛɛda gɔl zinize codoi tɔr nɔkɔ ook Jerusalema. ⁵² Ma itoon niini toonnyak karakte kɔɔt kuture ci abil looce o kazi Samariya ka kɔɔt koroŋtek niigi nɔnɔ ŋinti ɔŋe. ⁵³ Maje bar ɔl kuture nice alaŋ atalna nɔnɔ, eeci aga niigi nɔnɔ aku adicek akɔ Jerusalema. ⁵⁴ Mazi acin Jemis kibeem Jɔn gi nico, enektek niigi Yesu ne, “Manyi, alaŋ anyet kutuyawa goo tamma kiiya ka kotooz ɔl ci kutur nico noko naa?” ⁵⁵ Bar ookci Yesu, ma agernyek nɔɔgo zooze nico. ⁵⁶ Idicek ni ɔtɔ kuture oman.

ɔl ci arɔɔŋ koneec Yesu

⁵⁷ Mazi ŋaan awɔ Yesu ki nuyak gɔla nɔkɔ, iyya eeti oman, ma aku anek Yesu ne, “Karoŋ buk kunuwin naana ineeta. Olla ŋinti akɔye o, kɔrkɔr.”

⁵⁸ Ma abedeke Yesu nɔnɔ anek ne, “Anyak kireerwana looknya, ma anyak kibaali ceezi, maje bar naana Ŋeerti Eeto alaŋ kanyei ŋinti ka kaave loota ka kuyubuzi.”

⁵⁹ Ma anek niini eet oma ne, “Nowawan niina aneet.”

Bar abedeke eeti nici nɔnɔ anek ne, “Manyi, nyan rak kimiurozek kɔrɔk, eeci karoŋ kook kere baaba zɛɛ ma kiyaŋ naana aly.”

⁶⁰ Ma abedeke Yesu nɔnɔ anek ne, “Anyek ɔl ci adaai o kiyaŋit gɔnɔgi o adaai niigi maany. Ija niina ka bitɔ uwayek ɔl zɔɔz o baliin o Joowo.”

⁶¹ Ma anek bodo eeti oman nɔɔnɔ nɛ, “Manyi, Ɔaan ɲedet kaku kanuyin. Nyan zin rak kook ɔɔ ka kook kuduwak ɔl weet.”

⁶² Ma abedeke Yesu nɔɔnɔ anek nɛ, “Akɔm laadun eet ci akana keevin mana, ma bodo abuudi ki vurut ci anim keeva mana. Zin buk niiga mā agoonu nɔkɔ, alaɲ koca aganonu ki baliin o Joowo.”

Itoon Yesu bodo toonnyak oogi

10 ¹ Ma vurta ɲera Manyi Yesu ɔl ceen eet iyyu kamɔtɔ ki tiin ram (72). Ma itoon nɔɔgɔ karakte nɔɔnɔ ɔɔwa korkorit gɔɔn raman, raman, ka kɔɔt kuturyowe kibeen vitenane o ka kooyi niini dook. ² Ma anek niini nɔɔgɔ nɛ, “Anyak ɲinaanto manɛen ci meel ka keteede, bar zin ɔl ci teedinto o kidice ter. Ijinit zin eet o mano ka kitoona niini ɔl ci ka kivita keteedo. ³ Ɔɔtɔ zin. Olla naana kitoonun igeet ɔɔɔz kiyo aza o awɔ guzule kɔrgena o. ⁴ Má avoyu guruc, karabɔɲ een dayiin. Má avoyu buk caava. Má amilmilanu eleeti ɲaati azaayu ɔl oogi gɔla. ⁵ Ma avoyi korge ci avoyu, azaac rak ɔl ɔɔwa enektek nɛ, Abonanu ɔl ci korgu. Anyun Jooi ganɔn igeet ɔl ci kɔrɔk nico.

⁶ Mā een eeti ci korgu o o eet ci abon ganonto, ma areeza zaawinet cunooɲ o, anyak niini mayuwenet zaawinte cunooɲ o. Mazi bar alaɲ atalna eeti ci korgu o zaawinet cunooɲ ganonto o, abadakuɲ koca mayuwenet ci zaawinet cunooɲ o igeet ele. ⁷ Aavtiz zin korge ci eet ci ona atalnanun o doon. Má azobju korogjok ci meel. Ozolit ki nɔɔgɔ maam ki dayiin ci olla te anyun niigi igeet o. Eeci eet ci alinɲin abon aruwonek buk nɔɔnɔ vɔyita ci linɲin cin o. ⁸ Ma avoyu kuture ci atalnanun ɔl, olla dayiin ci anyaakuɲ niigi igeet o adayit. ⁹ Orogozit ɔl mɔɔrizɔi kuture nico. Buk enektek nɔɔgɔ nɛ, Izi baliin o Joowo aɲon ɲaatonooɲ. ¹⁰ Mazi anyak kutur ci avoyu ma alaɲ atalnanun ɔl, udunta bitaala ivitak gɔl, iziti zin nɛ, ¹¹ Mā een tuduwac ci looc cunooɲ agamnyet zɔɔ cigaacak o, ɲaan kajulakuɲ. Bar zin abon agayu gi o izɔi baliin o Joowo aɲon ɲaatonooɲ.”

¹² Ma anek Yesu nɔɔgɔ nɛ, “Didile kaduwakuɲ igeet, tiɲeere iitene ci roonnyo e apayek Jooi kutur ci abornun ɔl igeet neke gerzitin. Ma payiin nica tiɲeere appe ɔɔɔt kujuk payiin baal kutur o kazi Sodom e.”

Kuturyok o alaɲ atuwe

¹³ Ma azi Yesu nɛ, “Izi nɔɲa cugune wole kutur o kazi Korazin. Izi nɔɲa cugune wole kutur o kazi Bezediya. Mā da baal kutuguze kaal ci atɛet ɔl biye kuturyowe o kazi Tayor kibeen Sidon kiyo agooni ɲaatonooɲ ɲina noko, abadiit waan ɔl ugeec mony baal rɛena many zɛɛ ma aborcek daɲket eleeti, ma amek eleeti burtane ka keyelizta gi o otoɲti niigi ɔɲe ugeec. ¹⁴ Ma zin tiɲeere iitene ci payiinto e apayekuɲ Jooi igeet gerzitin ci appe ɔɔɔt kujuk Tayor been Sidon. ¹⁵ Ma niina Kapernam arooɲ buk daɲ ele bitɔ ki tammu taden. Bar zin tiɲeere ajukonei lɔtɔn o Loryento.”

¹⁶ Ma anek Yesu nuyak ogin nɛ, “Mā anyak eet ci aziɲnun igeet, aziɲnan buk niini aneet. Mā anyak eet ci abornun igeet, abornan buk niini aneet. Mazin eeti ci abornan aneet, abor buk niini baaba o itoonanan aneet.”

Abadaak toonnyawa Yesu

¹⁷ Zin abadaak toonnyawa ween eet iyyu kamɔtɔ ki tiin ram Yesu talniinta. Ma avu anek nɔɔnɔ nɛ, “Manyi, ma een nuun minin o Loryento aziɲnet ageeta ɲaati kagernyeka nɔɔgɔ kudunta zaare ugun.”

¹⁸ Ma abedeke Yesu nɔɔgɔ anek nɛ, “Ii, kicina didi Loryen iina tamma meleɔ kiyo gɔɔn abadi tammu o. ¹⁹ Ma naana kanyun igeet ɔyiz ci ka oroci kowanya kibeen kitɛen. Ma amogju ɔyiz o Loryento kɔkɔm ci ci ger agoononekuɲ igeet been neen. ²⁰ Bar zin má atalninu eeci aziɲnun minina o Loryento igeet, bar ataltɔ, eeci eteyeede zaara ugoocok tamma.”

Atalne Yesu

²¹ Ma enice ele anyawun Yesu talniin Vɔɲize o Joowo, ma azi nɛ, “Baaba, Manyi o tammu tadenu ki tɔɔɔ, katalne naana ɔɔɔt ɲaaton, eeci arɔɔde zɔɔz unun een didi ɔl o gɔɔn abaaban niigi kizik bar ageny, ma iya ayeleyu ɔl o celbez. Nɔɔnɔ zin neen baaba. Agoon gi nico gole o arooɲ niina.

²² Niina baaba anyan aneet kaal dook. Ma bar akɔm eet codoi ɲɔr nɔkɔ ci agayan aneet, bar agayan aneet niina baaba onane doon. Ma akɔm buk eet ci agayin ineet baaba, bar kagayin ineet naana ɲeerun doon kibeen ɔl o kaɲera naana ka keyelezawin ineet ɲaatineɲ.”

²³ Ubuut Yesu nuyak ogin, ma anek nɔɔgɔ doon nɛ, “Amayuwun Jooi igeet giye ci icintu niiga kaal ci acinu noko. ²⁴ Didile kaduwakuɲ igeet, baale nyakaɲaneta ki alaɲ ci meel arɔɔɲ kicinit kaal ci acinu niiga noko, ma bar ɲaan kicinit nɔkɔ been neen. Buk baale niini arɔɔɲ kiziyit kaal ci aziɲnu noko, bar ɲaan kiziyit been neen.”

Zɔɔz ci ayabzonek eet ci Samariya abon

²⁵ Ma iitene oman iya eeti oman ole o gɔɔn ademzek ɔl lotinok o Joowo arɔɔɲ ka kiiya kicina Yesu zɔɔza. Ma aku ajin nɔɔnɔ anek nɛ, “Alaan o demziinto, mayo kutugu gitaz ka kojowa roget o abil been neen?”

²⁶ Ma abedeke Yesu nɔɔnɔ anek nɛ, “Gɔɔn lotinowa o Joowo azi nɛ?”

²⁷ Ma abedeke niini Yesu anek nɛ, “Azi gɔɔn lotinowa nɛ, Reez Manyi ween Jook unun zinize unun dook, ki rogete unun dook, ki ɔyize unun dook, been baabaninte unun dook. Reez buk ɔl o abaawonu kiyo areez ele unun o.”

²⁸ Ma abedeke Yesu nɔɔnɔ anek nɛ, “Aleema zin didi. Bitɔ zin tugu nɔkɔ ka rok.”

²⁹ Maje bar eeti nici arɔɔɲ kititiny ele, ma bodo ajin niini Yesu anek nɛ, “Ɔneen dim ci kabaawona o?”

³⁰ Ma abedeke Yesu nɔɔnɔ anek nɛ, “Anyak baale eet ci aku Jerusalema aku ako kuture o kazi Jeriko. Ma ako zɛɛ ma gɔla urumtɔ kibeen ɔl ceen agoryak, ma aruk nɔɔnɔ, ma aama kaal ogin dook, ma adotek nɔɔnɔ ele looc kazalkan ɲinaante. ³¹ Maje iitene nice anyak alaan ci miliny ceze o Joowo onowa gɔl nico. Mazi aku acin niini eet ci azalkan noko, atayanun gɔl kabanyca, ma adicek. ³² Bodo buk ɲintimiliny nɔkɔ onowa eeti oman ceen Livayen ci gɔɔn alinɲin ceze o Joowo gɔl nico. Mazi aku akivek niini eet nico, atayanun buk niini gɔl kabanyca idiceya.

³³ Ma vurte ci eet nico iya eeti oman ceen Samariyen ci ɛɛɔn buk ano gɔl nico. Mazi aku akivek niini eet nico azalkan gɔla nɔkɔ, eteede ziniz. ³⁴ Iiyak ni niini nɔɔnɔ, ma aku amoor tobe ci ona aruwe noko, ma avuut maala. Ma acap jurun, ma adoɲek nɔɔnɔ zigir onin. Ma akɔyi zɛɛ been cez o gɔɔn atiken kernowa, ma ako amɔɔriz nɔɔnɔ jurun. ³⁵ Ma iitene ci ano gɔn o odoma guruc ceen ram, ma aruwek eet ci abek cez ci kernowu o, ma anek nɔɔnɔ nɛ, “Zooti eet nico jurun zɛɛ ma kabada tiɲeere. Mā anyak guruc cugun atirte nɔɔnɔ, ɲaan kaku karuwekin.”

³⁶ Ma anek Yesu nɔɔnɔ ne, “Inoko zin ɲaaton ole ceen iyyu noko, eet ɲaɲ ci abaawo kibeen eet ci baal aruk agoryawa noko?”

³⁷ Ma abedeke niini Yesu anek ne, “Eet ci abaawo ki nɔɔnɔ neen ci ateedi ziniz, ma atirit nɔɔnɔ o.”

Enek ni Yesu nɔɔnɔ ne, “Bitɔ zin buk niina tugu nɔko.”

Ako Yesu ɲaati Marta ki Meri

³⁸ Mazi awo Yesu kibeen nuyak ogin, ɔɔɔ zee ma gola idiirit kutur ci miliny abaayi ɲaa ci kazi Marta. Otowa ni Marta Yesu kiiyak kɔrɔk. ³⁹ Maje Marta anyak ɲɔɔni ci kazi Meri. Iiya buk Meri, ma aku aavek Yesu loota nɔko azii demziin onin. ⁴⁰ Maje Marta alinjliɲonek kernok ɔrɔɔt ele. Makacin iyyak niini Yesu, ma aku anek ne, “Manyi, alaɲ ri agano Meri ɲaati adotekan lijliɲon dook aneet doon. Anyek nɔɔnɔ kiiya kitiritan.”

⁴¹ Ma abedeke Yesu nɔɔnɔ anek ne, “Marta, Marta. Kacinin ineet abaaban kaal ci meelik ɔrɔɔt. ⁴² Bar zin anyak gi codoi ɲɔr nɔko ci titiny. Ojowa zin bar Meri gi ci titiny noko, ma akom bodo eet oma ci ka kaama nɔɔnɔ.”

Ademzek Yesu nuyak ɲaryiin

11 ¹ Ma iitene oman ook Yesu ɲaryiin ɲaaman. Mazi ako odotiz ɲaryiinta, enek eeti codoi nuyawe ogin nɔɔnɔ ne, “Manyi, demzeyet di buk ageeta ɲaryiin ci ka gɔɔn kanaruyoya kiyu baale ademz Jon o oonyi nuyak ogin e.”

² Ma anek Yesu nuyak ne, “Gɔɔn mā aɲaryinu, iziti ne, Baatinaaɲ o aave tamma, anyek ɔl kidiɲɲanit zaar ugun. Anyek baliin unun kiiya. ³ Nyet gɔɔn iinya dook dayiin o karooɲnya. ⁴ Toɲ baciinok ogaacak, kiyu kuɲna kaal o abac ɔl ɲaatinaaɲ o. Má anyet ageet kicinawet Loryenti.”

⁵ Enek ni bodo Yesu nɔɔɔ ne, “Inoko mā akunak eet oma ɲaatonooɲ kernoiti, ma akom dayiin ɔɔ, ma ako ole ci laɲotin baalin keɲa ka kook kijin nɔɔnɔ kenek nɔɔnɔ ne, Nyan di ɔɔken ceen iyyu. ⁶ Kanyei eet ceen laɲo ci akunakan keronna ona noko, ma akomnan dayiin ci kanye ka kanyek. ⁷ Ma abedeke laɲotine ci ceeza o anek ne, Má amilanan. Onyooge ceez, ma buk koota ki ɔɔl ooɲnyak. Alaɲaan bodo kanim kitiɲa ka kook kanyin gi ci arooɲ o.”

⁸ Enek ni Yesu nuyak ogin ne, “Anycaɲ zin kuduwayuɲ. Yo nuun ma alaɲ iɲaaz niini ka kanyek nɔɔnɔ ɔɔken giye o eene laɲotin, ako nuun zee iɲaaz, ma anyek nɔɔnɔ ɔɔken ci ona arɔɔɲ o giye o alaɲ anyayi niini alyaan, ma amena ilaleke nɔɔnɔ.

⁹ Didile kaduwakuɲ igeet, iɲinto, ɲaan anyononekuɲ. Ɔrɔɔɲto, ɲaan ajowanu. Eterenit karogi, ɲaan akolonekuɲ. ¹⁰ Eeci eeti ci ajine, anyononek. Ma eeti ci arooɲnyi, ajowa. Maje eeti ci ateren karogi, akolonek nɔɔnɔ. ¹¹ Ʋeneen inoko ɲaatonooɲ ci mā ajin ɲeerin kulugit, bar anyek kowat? ¹² Karabɔɲ ajin niini nɔɔnɔ iira, ma bar anyek kito? ¹³ Mayo nuun eeginu niiga gerze o, agayu kaal o abon anyeku ɔɔl ugoocok nɔko. Bar zin baatina o aavi tamma abon niini ɔrɔɔt kujukuɲ igeet, ma anyek niini Vɔɲiz onin ɔl o ajin nɔɔnɔ dook.”

¹⁴ Ma iitene oman aara Yesu miniɲit ci Loryento alagony eet oma aat. Mazi aduɲna miniɲiti nici ɔɔɔz eeti nici bodo labak, ma abiir ɔl dook ooti tet. ¹⁵ Ma bar ano ɔl ogene ɲaatineeɲ ne, “Anyek nɔɔnɔ ɔyiz ci aarane miniɲ noko alaani o loryenu kazi Baalziɔɔl.”

¹⁶ Maje ɔl ogene arɔɔɲ kicinta Yesu. Ma ajin niigi nɔɔnɔ kutugu gi ci ateed ɔl biye ci aku tammu tadena. ¹⁷ Maje Yesu aga baabaninok cigeec o nɔko, ma anek nɔɔɔ ne, “Gɔɔn mā aɲero ɔl ci looc codoi nɔko kiziti boryok, ma ɔɔɔ niigi maany, uulali lɔɔci nici. Buk mā aɲero ɔl ci tatok codoi, ma ayowo niigi maany, danydany tatok nici. ¹⁸ Zin buk koca mā aɲero baliin o Loryento, abil koca ku? Aziyu inoko niiga ne, Kaara naana miniɲ ci Loryento o ɔyize ci anyan Loryenti. ¹⁹ Mazi abil nɔko, ma ɔl ugooc gɔɔn buk aara miniɲ o Loryento o, ajowa niigi ɔyiz nico naa? Anycek di nɔɔɔ ele kabariɲteyɲ igeet ɔɔɔ nico. ²⁰ Bar zin mā kaara naana miniɲ ci Loryento o ɔyize o Joowo, iyyayuɲ zin ri koca igeet baliin o Joowo.

²¹ Gɔɔn mā ooɲek eeti ceen ole kɔrɔk cin dilanyai, eel kaala ci kɔrɔk cin o juruɲ kɔkɔm gi ci ger akunak. ²² Mazi akunak nɔɔnɔ eeti oman ci adɔi kujuk nɔɔnɔ, ma iya omogun nɔɔnɔ, aama nɔɔnɔ dilanya cigin gɔɔn abeyi ele o dook, ma ako aɲerek kaal ci ona aama nɔɔnɔ o dook ɔl ogin.

²³ Mazin eeti calaɲ aavi libire can, amarninan niini aneet. Buk eeti calaɲ atiritan niini aneet kolota aza ogan, azaan niini nɔɔɔ.

²⁴ Zin gɔɔn ma aduɲna miniɲiti o Loryento eete oman, awo ako balala ɲaati adɔyi akom maam ka kook kɔrɔɲ ɲinti ayubzi ɲinaante. Mazi alaɲ ajowa ɲinti ayubzi ɲinaante, anek ele maany ne, Nyan kimiire kook eete baal kooɲnei looc e. ²⁵ Mazi abada, aku ajowa eet nico abil kiyu ceez o aviilyai kitiliza, ma akom ririny keɲa o. ²⁶ Ma adun bodo niini ako bitaala, ma ako anyaa miniɲ ci Loryento oogi ceen torgerem ci ger ɔrɔɔt bar kujukit nɔɔnɔ, ma avu abaak eete nico. Ma uulali eeti nici kizi gerze ɔrɔɔt kujuk baale.”

Ɔl o amayuk Jooi

²⁷ Mazi ɲaan aduwa Yesu kaal nicoko nɔko, egereny ɲaa oman kɔle kɔrgena ɲina enek Yesu ne, “Amayuk bai Jooi momu o yaaton baal anyakin ineet e kibeen keezin ogin baal iroktanin ineet e.”

²⁸ Bar abedeke Yesu nɔɔnɔ anek ne, “Akom. Amayuk bar Jooi ɔl o azii ɔɔɔ onin, ma azooni.”

Zɔɔz ci ayabzonek Jona

²⁹ Mazi ɲaan aliya kɔle Yesu nɔko, enek niini nɔɔɔ ne, “Gerze ɔl ci ɔɔ nico noko ɔrɔɔt ele. Arɔɔɲ niigi kutuguwek naana nɔɔɔ gi ci ateed biye ka kagayan kakun Joowa. Akom zin gi oma ci kagoonei nɔɔɔ been neen. Dooke coma kagoonei nɔɔɔ gi ci abil kiyu baal agoononek nyakaan o kazi Jona. ³⁰ Zin kiyu buk baale Jona een bayen ci ɔl o Ninava e, buk tiɲeere naana Ʋeerti Eeto ɲaan keen bayen ci ayezonek ɔl ci ɔɔ nico noko. ³¹ Tiɲeere iitene ci roonnyo e iɲaaz ɲaa ween alaan baal agam looc o ako ki tenet e, ma akolak ɔl ci ɔɔ nico noko rooni giye baal itinawi niini, ma awoyi ɲinti wun ka kook kicin genyiz o alaan o kazi Solomon e. Bar zin inoko ɲina aromenu niiga ki eet ci adiɲɲiɲ kujuk Solomon. ³² Tiɲeere buk iitene ci roonnyo e iɲaaz ɔl o Ninava, ma akolak ɔl ci ɔɔ nico noko rooni Joowo, eeci baale niigi iziiyit uuwayi o Jona, ma abadit mony baciinowe ugeec. Bar zin inoko niiga ɲina aromenu ki eet ci adiɲɲiɲ ɔrɔɔt kujuk Jona.”

Vooritin ci alyo

³³ Ma azi Yesu bodo ne, “Akom gɔɔn laadun eet ci atokol lamba, ma arek ɲinti abiilene. Bar arek ceez kɔrgen ka kataaraan looc ka kicintɔi ɔl ci avunak ceez o juruɲ. ³⁴ Ma kebere tokolec ci alyo gi. Mā abon kebere cugune o, aavi buk ele cune o dook

vooritina. Mazi een ruben, buk ele cune o dook aavi muur. ³⁵ Egenyit zin ɔɔɔt. Gerze ɲaan ookci vooritin ci aavi eleetine cugooc o kizi muur. ³⁶ Mā adaala ele cun o dook vooritin kəkəm ɲinti miliny aavi muura, atokoli koca ele cune o dook juruɲ kiyo gɔɔn ataranet lamba vooritine onin o.”

Aduwak Yesu ɔl o Parici nɔɲ ci kol

³⁷ Mazi odotiz Yesu zɔɔza, otowo ɛeti ceen Pariciwen nɔɔnɔ ka kook kadaktɔ kibeen nɔɔnɔ ɔlo. Ook ni Yesu aavu loota ɔlo ɛrewa dayiin calaɲ oony azeen. ³⁸ Mazi akɔ acin ɛeti ceen Pariciwen noko Yesu adaki iɲaan kotoony azeen, ibiir nɔɔnɔ ɔɔ ɔɔɔt ele. ³⁹ Enek ni Manyi Yesu nɔɔnɔ ne, “Gɔɔn niiga ɔl ci Parici o uunyu diicit kibeen kodooce ugooc bawuci doon, maje bar igeet ele gerzete zinzeeti cugoocok o eecitɔ ɔɔɔt ele. ⁴⁰ Eeginu niiga aliyak. Alaɲ agayu ele bitaala kibeen ele eecitɔ ɛenyca dook Jooi o? ⁴¹ Anycek zin gɔɔn ɔl o amaati gi ci te olla anyaku, ka kitiliza kaala ugooc dook.

⁴² Izi nɔɲa cugoocok wole igeet ɔl o Parici. Gɔɔn niiga aruweku Jook lelen codoi lelene ween amɔtɔ yo nuun een kaale o celbez labak kiyo abutena kibeen ɲooru o kibeen buk kaal o celbez mana dook. Ma bar apezu ɲaati agoonu kaal keelit tɔp, ma buk apezu reezinet o Joowo. Abon zin waan buk agoonu kaal nicoko.

⁴³ Izi nɔɲa cugoocok wole igeet ɔl o Parici. Eeci gɔɔn areezu niiga ɲaati aavtiyu lecerene o titiny ceezine o lotento. Ma arooɲnyu buk kazaayun ɔl igeet titinyɔnta golowe dook. ⁴⁴ Izi nɔɲa cugoocok wole, eeci eelnu niiga kiyo looknya o adawin ɔl o adaai, ma abuɲe loota calaɲ ɔl acin, ma avu arɔc niigi ɲaati awɔyi labak o.”

⁴⁵ Ma anek ɛeti codoi ole o gɔɔn ademzek ɔl lotinok nɔɔnɔ ne, “Alaan o demziinto, zoowowe ci aduwa noko adomnyet ri buk ageeta.”

⁴⁶ Ma abedeke Yesu nɔɔnɔ anek ne, “ɲedet buk izi nɔɲa cugoocok wole igeet ɔl o ademzeku ɔl lotinok. Anyeku gɔɔn niiga ɔl kaal ci adiɲɲiɲ kitikit, ma alaɲ buk niiga alya eleetine ugooc atiritu nɔɔgo kaale ci adiɲɲiɲ anyak niigi o. ⁴⁷ Izi nɔɲa cugoocok wole igeet ɔl o ademzeku ɔl lotinok. Adimanu gɔɔn niiga looknya o nyakananet baal adaayitɔ e kitiliza bodo. Maje nyakananet nicoko ele jijiitugooce neen o aruk nɔɔgo kadaayitɔ. ⁴⁸ Mazin buk niiga alya eyelizawu gi o areezu kaal baal agɔɔn jijiitugooce giye baal aruyi niigi nyakananet kadaayitɔ e, maje bodo niiga inoko ɛenyceku nɔɔgo looknya. ⁴⁹ Ma zin giye nico azi Jooi genyize onin ne, Kitoonei tiɲeere nɔɔgo nyakananet ki toonnyak nɔkɔ, ma avɔ aruk niigi oogi ɲaatineen kadaayitɔ, maje coko agit. ⁵⁰ Akeebonek zin tiɲeere ɔl ci ɔɔ nico noko biyeta o nyakananetu baal aduuti ɲinbaal ɛenycaan lɔɔci e zee been inoko o. ⁵¹ Akanai biyete o Abel zee been biye o Zakeriya baal amony ɔl nɔɔnɔ ceeza tɔ ɲaao aɲɛɔn ɲino taabinto been ɲino Joowo alile e. Didile kaduwakuɲ igeet, akeebonek ɔl ci ɔɔ nico noko biyeta ci ɔl nicoko dook.

⁵² Izi nɔɲa cugoocok wole igeet ɔl o ademzeku ɔl lotinok. Anyozeyun genyizi o Joowo igeet, ma bar alaɲ arooɲnyu niiga alya agamta, ma buk aranɲanenu ɔl o arɔɔɲ kagaac gɔl o Joowo calaɲ avu.”

^{53–54} Mazi odotiz Yesu kaale nicoko, odomta ɔl o Parici kibeen ɔl o gɔɔn ademzek ɔl lotinok o Joowo otoɲomit nɔɔnɔ gerze. Ma ajin niigi nɔɔnɔ kaal ci meel ger, eeci arɔɔɲ niigi kalabta nɔɔnɔ ka mā aduwa zɔɔz ci ger ka kojokta gɔl ci agami.

Ilot Yesu nuyak

12 ¹ Ma enice ele olotak kɔle ci meel ger Yesu kook zee ma ajuko. Ma arayek Yesu nuyak ogin gi ci anek ne, “Edeya eleeti ole o Parici, eeci gɔɔn niigi alaba ɔl giye o anyeke eleeti kizi ɔl ci abon, maje ɲaato gerze. ² Ma kaala o inoko abuɲe dook katin akɔlyai. Buk kaala o inoko aɲɔmte dook katin ayelzai kiziikte. ³ Ma zin kaala o aduwanu niiga muura katin aziɲɲe vooritina. Buk kaala o aɲɔmteku niiga ɔl ceezine eecitɔ katin abɔryai ɔl dook kebereca.”

ɲeneen ci abon kaɲole?

⁴ Ma anek Yesu nuyak ne, “Laɲotigan, má aɲolinu ɔl o arukuɲ adaayit, ma bar vurte ci adaaktu, ɔkɔma bodo gi oma ci agɔɔn. ⁵ Bar zin kilotuɲ igeet. Otoɲole Jook o aruk ɔl kadaayitɔ, ma bodo vurta anyak dɔyiz ci ajukeke nɔɔgo goo o abil been neen. Kaduwakuɲ igeet, abon aɲolinu nɔɔnɔ doon.

⁶ Kaga naaga kibaali ceen zoot kaal ci labak, ma anim ɛeti kataala ci een tur ɲaatineen giricete ceen ram nɔkɔ. Ma akɔm zoote nicoko codoi tɔr ɲaatineen ci areyek Jook. ⁷ Má zin anyaku ɲoliin, eeci niiga adiɲɲiɲnyu ɲume o Joowo ɔɔɔt ujukit zoot ci meelik ger. Mayo nuun een im cugooc oowu noko ele akeep Jooi, ma aga dook.”

ɔl ci atu Yesu kibeen ɔl ci abor nɔɔnɔ

⁸ Ma anek Yesu nɔɔgo bodo ne, “Didile kaduwakuɲ igeet, ma ɛeti ci abɔra tuwen onin ɔl kebereca, tiɲeere buk naana ɲɛerti Eeto kabɔra tuwen onin toonnyak o Joowo kebereca. ⁹ Maje ɛeti ci adanɲyan aneet ɔl kebereca, buk tiɲeere naana ɲɛerti Eeto kadaɲ nɔɔnɔ toonnyak o Joowo kebereca.

¹⁰ Mā anyak eet ci azoozan aneeta ɲɛerti Eeto gerze, aara Jooi ɲaatin oɲec nico labak. Mazi bar aduwak ɛeti zɔɔz ci ger Vɔɲiz o Joowo, alaɲ Jooi aara ɲaatin oɲec nico been neen.”

¹¹ Ma anek Yesu nɔɔgo bodo ne, “Mā akɔlakun ɔl rooni, ma avoyun ole o ka kɔɔt kapaktun igeet ceezine o lotento, karabɔɲ een alaate o adikir akumawo, má anyaki ɲoliin giye ci akati zoozok ci ka abarzek niiga nɔɔgo. ¹² Eeci Vɔɲizi o Joowo iiten nico ele ayelzakun igeet zoozok ci ka abarzek nɔɔgo.”

Yabziin ci eet ceen aroi tarbal

¹³ Ma anek ɛeti oman kɔla tɔ Yesu ne, “Alaan o demziinto, duwak da gɔtɔna ween abuu ka keɲereyan buk aneeta kaal o oonɲaket baatinaaɲ.”

¹⁴ Ma abedeke Yesu nɔɔnɔ anek ne, “Ineet logoz, ɲeneen ci anyan aneet dɔyiz ci ka keɲerekuɲ ineet ki gotonu kaal o?”

¹⁵ Ma anek niini nɔɔgo dook kɔla ne, “Egenyit zinzeeti appinzeta, eeci rogeti ween didi eete ci deer alaɲ abilna kaale ci meel arozketu.”

¹⁶ Uduwak ni Yesu nɔɔgo yabziin ci anek ne, “Anyak baale eet ceen aroi ɛeva mana ɲaati abon akuvkuv, ma abiir juruɲ.

¹⁷ Abaabanun ni niini doon gi ci azi ne, Mayo akɔmnan piimane ci ka keteedek labi cigan noko o ka yo kutugu ku? ¹⁸ Ma vurta abaaban izi ne, Abon kooyoi piimane ci miliny baal reen noko ka keteenya piimane ci adikir ka keteedek labi, ma buk kiyane kaal cigan noko dook. ¹⁹ Ka zin kenek ele maany ne, Ize mer aroi. Anyawu kaalyan ci meel eel piimanen ci adicanɛ irkitok ci meel ger.

Inoko zin yubuz, olla dawo, wode. Anyek ziniz katalo. ²⁰ Enewun ni Jooi noono ne, “Ineet aliyai nico. Inoko tedec baaline nico niina adaai. Mazin yo tedec kaala cugune eene aroi noko akati heneen?”

²¹ Ma azi Yesu ne, “Zin yabziin nici akati ol o goon adez kaal ci ka kizitai arak, maje bar hume o Jooi alaj eegin arak.”

Má iionu kaal ci aroonnyu

²² Ma anek Yesu nuyak ogin ne, “Inoko zin kanekuñ ne, Má iionu dayiin ci ka orogti, karabon een rumane ci ka uburucek. ²³ Eeci rogeti adiññiñ oroot kujuk dayiin. Mā anyin Jooi ineet roget, anyin buk dayiin. Buk ele adiññiñ kujuk rumane. Mā anyin Jooi ele, anyin buk rumane. ²⁴ Icinit di walaaknya. Alaj goon niigi adowe, ma akom buk noogo labi ci ka keteedit. Alaj anyak niigi piimane ci ka kiyaññi labi. Bar olla adayiz noogo Jooi doon. Bar zin niiga eeginu titinye oroot ujukit kibaali. ²⁵ Heneen inoko haatunoon ci anim kazaac roget cin kizi wun kidicilim inonnya? ²⁶ Mazin mā alaj animnyu utuguz gi ci miliny kiyo nici noko, anyeku zin zinzeeti kiionit kaal oogi naa?”

²⁷ Icinit di koroboli o too. Alaj niigi aliññiñ, ma alaj buk alolak eleeti rumane. Kanekuñ zin ne, Mayo nuun een alaan baal kazi Solomon e diññiñonte onin, haan kanyak rumane ci alina kiyo goon koroboli o. ²⁸ Jook zin neen o alinatan koroboli o too o aduñna waanico, ma tiñeere bar araabajai, ma atoozi gooya. Inoko zin ma alinatan Jooi noogo nooko o, ma zin bar koca igeet o eeginu titinye ujukit koroboli, alaj amalikuñ niini igeet rumanen buk? Kidic zin igeet tuwen oroot. ²⁹ Má zin goon iionu kaal ci ka adayit, karabon een kaal ci ka owoedit. ³⁰ Eeci nici dook kaal o goon iion ol o loocu alaj atuwe neen. Mazin baatunoon o aavi tammu tadena aga kaal o aroonnyu niiga dook. ³¹ Bar zin rak cowa anyek zinzeeti baliin o Joowo doon, haan kaala nici dook anyononekuñ igeet buk.

Arakzet o tammu tadenu

³² Nuyak ogan, má anyaku holiin gaga, eeci baatunoon o aavi tamma anyuñ igeet baliin onin talniinta. ³³ Inoko ototo ataaltai kaal ugooc anyaku dook, ka odomta guruc ci ataalanu o itiriti ol o amaata, ka orootak niiga eleeti arakzet o abil kodot, iyañtek eleeti arakzet tammu tadena haao eelni calaj akoloni. Eeci hinaante akom agoryai ci ka kogoroz, ma akom buk zizaac ci ka kadayit.

³⁴ Eeci hino iyañin arakzet unoon, hino buk aavtiye zinzeeti ugooc neen.

Iziti vilile

³⁵⁻³⁶ Iziti vilile tup giye ci te olla akunakuñ igeet. Uburucek rumane. Aapta toolit akatek katalanyit. Eelit kiyo gabara o are alaan uneen ka kabada keronna o, ka ma aku niini, ma ateren karogi, akolek niigi noono karogi enico ele o. ³⁷ Didile kaduwakuñ igeet, atalne koca niigi oroot ele haati akuni alaani uneen, ma amada noogo vilile areyi calaj oogin. Awa koca niini noogo, ma anyek kaavtiyo loota, ma anyek dayiin. ³⁸ Amayuwi zin niigi haati amadan alaani uneen noogo vililini, mayo nuun abada niini baalin keña karabon een oonjalizo. ³⁹ Abon aadanu gi ce. Goon kizi gi ci aga eeti ci korgu iiten ci ka kiiyake agoryaiti korok cin o, alaj koca oonjek korok looc ka kiiya kook agoryaiti ceeza gorziin. ⁴⁰ Iziti zin buk niiga vilile nooko, eeci iima naana Hjeerti Eeto katorobanuñ igeet calaj agawanu iiten ci kakune.”

Gabaren ci aliññiñ juruñ

⁴¹ Ma anek Pitōr Yesu ne, “Manyi, ma dim yabziin nici akanet ageeta doon, yo akati da buk ol dook?”

⁴² Ma abedeke Manyi Yesu noono anek ne, “Inoko haatun heneen ci een gabaren ci ageny aliññiñ juruñ o? Gabaren ci ageny neen o aña alaani onine noono kizi gabaren ci adikir ceeze onin, ka keñere gabara o miliny dayiin ugeec juruñ. ⁴³ Amayuwi zin gabarenti nici haati abadaan alaani onine keronna, ma amada noono agoon gi nico. ⁴⁴ Didile kaduwakuñ igeet, koca enico anyek alaani gabaren nico kagamek noono kaal ogin dook ka kozooti. ⁴⁵ Mazi bar abaaban niini gi ci azi ne, Amon rak tiñeere alaani onane hinaante hinti reen calaj abada kataman, ma adoma agit gabara ci miliny haatin o, ma adak dayiin dook niini doon, ma awode ma abaaki. ⁴⁶ Abada koca alaani cine o iitene calaj niini agawan kuni cin o, ma aku aruk noono, ma atook liññiñonte onin, ma apayek noono gerzitin ci ol o alaj atuwe.

⁴⁷ Ma gabarenti ci aga gi o aroonjek alaani onine noono kutugu, ma bar alaj aronñ niini kizi vilil kutugu eo aronñ alaani onine, arooki koca niini oroot ele. ⁴⁸ Maje gabarenti calaj aga gi o aroonjek alaani onine noono kutugu, ma bar buk agoon gi ci aganon niini ki rooyinet, arooki buk niini kidicilim. Ma eeti ci anyonek noono kaal ci meel, aroonnyu buk haatin kaal ci meel. Maje eeti ci anyonek noono kaal ci meel oroot ele, aroonnyu buk haatin kaal ci meel oroot ele.

Anyaa Yesu heron

⁴⁹ Kakun zin naana o ka kiiya kakatek looc goo. Bar zin abon waan liññiñni nici inoko akatai odota. ⁵⁰ Anyak piryakzet ci appe oroot akunakan aneet. Kanyonei zin tiñeere naaga piryakzet nico nooko zee ma kadica imin. ⁵¹ Bar bon niiga abaabanu kizik kanyaai naana looc ganon? Alaj zin kanyaai looc ganon, bar kanyaai looc heriin. ⁵² Akatai zin bar inoko o ele, ma een ol ceeza tur, aña ceen iyyu amarnin gonogi ceen ram o. Adoma ceen ram o amarnin gonogi ceen iyyu o. ⁵³ Maje goon eeti tiñeere amarnin herin. Buk logoti amarnin baatin. Maje ha tiñeere amarnin beenyin. Buk dole amarnin yaatin. Maje inyik tiñeere amarnin alawan onin. Buk alawani amarnin inyik.”

Arizet hoota been diizwani

⁵⁴ Ma anek Yesu bodo ol ne, “Goon mā acinu diizoc libire ci jenu o anonu ne, Atiil tedec tammu. Ma didi atiil. ⁵⁵ Buk mā akola hooti ci libir ci jenu o, anonu ne, Abur tiñeere looci. Ma didi abur. ⁵⁶ Izitu mer niiga ol ci abuuku eleeti. Acinu goon niiga looc kibeen tammu taden, ma aganeke haati aduwanu keñti ci kaal cigeec. Mazin buk alaj agayu keñti ci kaal ci agooni inoko o naa?”

⁵⁷ Alaj zin añeraku eleeti kaal ci abon ka utuguz naa? ⁵⁸ Mā anyak eet ci akolakin rooni, abon ako haatin ka ot idica ki noono zoz nico ihaan urumit alaan o roonnyo. Gerze haan apayekin alaani ineet cabiin, ma avo ajukekin takirnya sijn. ⁵⁹ Didile kaduwakuñ igeet, alaj koca aduñna niina hinaante kataman, ma aave nooko zee ma arui guruc o apawonekin ineet dook.”

Mā alaŋ eeti ateedine baciinok, adaai

13 ¹Ma iitene nice ele ivita uduktak ol ogen Yesu gi ci akati ol o Galili baal aruk alaani o kazi Pailat kadaayito iitene baal ataabi niigi Jook e. ²Ma abedeke Yesu nōōgo anek ne, “Yo abaabanu niiga anyiye ne, Adaai ol ci Galili neke o giye ci da anyayi niigi oŋe ɔrɔɔt kujukit ol ci Galili ŋaan arogi noko dook?” ³Akōm kina! Didile kaduwakuŋ igeet, mā alaŋ niiga ateedinu oŋe ugooc, adaanŋu buk tiŋeere niiga dook kiyo baale adaai niigi e. ⁴Aada di buk zɔɔz ci ol ween amonki turge baal iinak nōōgo ceez ŋaao kazi Siloom, ma aruk nōōgo kadaayito e. Abaabanu niigi kizik iinak baale nōōgo ceez kuruk kadaayito o, eeci gerze niigi doon kujukit ol o abaak Jerusalema dook? ⁵Akōm kina! Bar zin kaduwakuŋ igeet, ma alaŋ ateedinu niiga oŋe ugooc, adaanŋu buk koca tiŋeere niiga dook kiyo baale niigi e.”

Yabziin ci ayabzonek moneec calaŋ abiir

⁶Enico uduwak Yesu nōōgo yabziin ci anek ne, “Baale anyak eeti oman keet ceen moneec mane cin. Ma iitene oman ook niini arɔɔŋ ka kook kodoca, mā anyak monen ci abiirna. Mazi ako arum keet, bar ajowa akōm kebere ci abiirna kina. ⁷Enek ni niini eet o goon abeyek nōōnɔ mana ne, “Cin di! Kanyei irkitok iyyu ci goon kakunake keet nico ka waan kiiya kodoca kebere ci abiirna, ma bar akōm ci kajowa kina. Inoko zin teedak looc, eeci olla eŋ mana gaga, ma buk uulal tɔɔ ci ŋinti aave niini o kizi gerze.” ⁸Ma abedeke eeti o abeyek nōōnɔ mana anek ne, “Manyon, toŋo rak di labak kidica irkit nico doon, ka kōwɔlonɔ tɔɔ kocodek ɔlo coma akuvkuv. ⁹Mā zin te abiir irikite ci aku noko, abon ɔrɔɔt. Bar mā alaŋ abiir, ŋaan zin koca enice atedai looc.”

Arogoz Yesu ŋaa ci amɔr iitene ween Sabit

¹⁰Ma iitene oman ook Yesu edemez ol ceeze o lotento iitene o yubzento een Sabit. ¹¹Maje ŋinaante anyak ŋaa ci anyak miniŋit ci Loryento alya ci anyek nōōnɔ kōmɔr irkitok amonki turge. Makacin uduulun ŋaa karatot kogomgom calaŋ azolani kōtɔ tɔp. ¹²Mazi acin Yesu nōōnɔ, otowa, ma aku anek ne, “Ineeta ŋaa nico, urugu niina mōrize cun noko.” ¹³Ma ataadek nōōnɔ azeen. Enico ele ɔɔlane ŋaa karatot online ibil tɔp, ma anaat niini Jook ɔrɔɔt.

¹⁴Mazi acin alaani o ceez o lotento gi nico, otober nɔŋ, eeci arogoz Yesu ŋaa nico iitene ci yubzento een Sabit o. Ma azɔɔz niini anek ol ne, “Kanyak goon laadun naaga iinya torkonɔm ci agano ki liŋliŋon. Abon zin goon anyaanu niiga moorizok cugooc o iinyaye nicoko ŋaan avu arogzenu. Alaŋ abon ŋaati avunu iitene ceen Sabit o.”

¹⁵Ma abedeke Manyi Yesu nōōnɔ anek ne, “Izitu mer niiga ol ci abuuu looc. Inoko goon ŋaatonooŋ ŋeneen calaŋ aboroc taŋ cin karabonŋ een zigir cin ka kook kowodoz iitene ceen Sabit o? ¹⁶Inoko ŋaa nici dole ci dɔl o Ibrayim buk, ma acap Loryenti nōōnɔ irkitok ceen amonki turge noko dook. Mayo zin gerze ŋaati ɔɔgiane niini iitene ceen Sabit noko?” ¹⁷Mazi azi Yesu noko, aamun ol o amarnin nōōnɔ dook alyaani. Maje ol ceegi dook atalne kaale o abon agoon niini ŋinaante dook.

Zɔɔz ci ayabzonek kebereci ci motoŋtoco

¹⁸Ma ajin Yesu nōōgo anek ne, “Mayo baliin o Joowo atobo ki gitaz? Kayo kotobozek gi jaŋ? ¹⁹Atobo zin kibeen kebereci ci motoŋtoco aduŋna mana o. Ma iroktai zee makacin izi keet ci adikir ɔrɔɔt ele, ma eenyet kibaali ceezi keet nico otone.”

Zɔɔz ci ayabzonek nyigit ci nyaanu

²⁰Bodo ajin Yesu nōōgo anek ne, “Mayo baliin o Joowo atobo ki gitaz? Kayo ka kotobozek gi jaŋ? ²¹Atobo zin niini kibeen nyigit o telawu goon aduŋca ŋaa jayitote ci miliny ter, ma arurek tela, makacin etedewi tela we dook komokcar o.”

Tatok o lodoci

²²Ɔtɔ ni Yesu, ma ako azɔp kuturyok o adikir ki o miliny, ma ademez rak ol ŋinaante ŋaati akoyi ki Jerusalem. ²³Ma ajin eeti oman nōōnɔ anek ne, “Manyi, mayo bon katin ol ci aroge kidice ter?”

Ma abedeke Yesu nōōgo anek ne, ²⁴“Ooritnɔŋ ɔrɔɔt ka coma avoyu tatoge ci lodoci noko eecito. Didile kaduwakuŋ igeet, tiŋeere ol ci meel ger ataman gɔl ci arɔɔŋ kooti tatoge nico eecito, bar alaŋ anim kɔɔt noko been neen. ²⁵Eeci tiŋeere ŋaaz eeti o ceezu, ma anyook ceez. Mazi avu aruku niiga karogi, ma aneku nōōnɔ ne, Manyi, koleyet da ceez, bar abedekuŋ niini igeet anekuŋ ne, Alaŋ kagayuy. Ma niiga eeginu ol ci avunu ŋaadaŋ? ²⁶Maje bodo niiga aneku katin nōōnɔ ne, Ageeta baal goon kadake, ma kawode ki ineet e. Buk goon baale ademze niina kuturyowe ogaacak. ²⁷Abedekuŋ bodo katin niini igeet anekuŋ ne, Alaŋ kagayuy naana igeet. Avunu ŋaadaŋ? Enyekte ŋaatan niiga dook o agoonu oŋe. ²⁸Utuluzu ni katin niiga ɔrɔɔt ele zee ma adaku nyigit ŋaati acinu niiga Ibrayim, ki Aizak, ki Jakob, been nyakananet dook ŋaati aavtiz niigi baliinte o Joowo. Maje niiga atoowoneku bitaalin. ²⁹Alotai katin ol libire ci jenu e, kibeen libire ci nyagjo o, ma libire ci baatikeri o, kibeen libire ci tenetu o, ma avu aavtiz niigi dook loota baliinte o Joowo. Ma azol ki nōōnɔ dayiin ŋaatodoi. ³⁰Zin enice ol o inoko araki amiiri kiziti vurut. Maje ol o inoko eegin vurut, bar araki kiziti ɔɔ.”

Awucnek Yesu Jerusalem

³¹Ma iitene nice ele ivitak ol ogene ole o Parici Yesu, ma avu anek ne, “Tɔ ŋina. Bitɔ ŋaaman, eeci arɔɔŋ Erod kuruyin daak.”

³²Ma abedeke Yesu nōōgo anek ne, “Ɔtɔ enektek kireer nice ne, Kaara miniŋ o Loryento ɔla, ma buk karuguz ol moorizowe waanico kibeen tiŋeere. Ma iitene ceen iyyu e kidica naana liŋliŋon onan. ³³Maje rak waanico ki tiŋeere kibeen tiŋeere ece kazobi looc kagoon liŋliŋon onan, eeci alaŋ agano ŋaati aruwen nyakanani ŋaaman dooke coma aruwe Jerusalema.”

³⁴Izi ni Yesu ne, “Jerusalem, Jerusalem, uruwu niina nyakananet kadaayito, ma avacu buk ol o itonakin Jooi ineet biyene kadaayito. Lak ci meel ger ci karɔŋe goon kanyabotai ol ugun kiyo goon alotek toloci jɔɔ ogin keŋ o, bar zin niina ŋaan nyan kutugu noko. ³⁵Inoko zin tiŋeere ceez cune noko oononek looc kizi lik. Inoko zin kaduwakuŋ igeet, akatai waanico alaŋ bai bodo acinaŋ aneet zee been iiten ci kabadane e. Enice ŋaan aziyu ne, amayuk Jooi nōōnɔ o aku zaare ogin.”

Arogos Yesu eet ci amoor

14¹ Ma iitene ceen Sabit oman, ook Yesu korge ci alaan oma ci ol o Parici ka kook kadawo njinaante. ² Maje njinaante anyak eet ci iivez zonna kibeem azeen aavi noono keja noko. ³ Ma ajin Yesu alaat o goon ademzek ol lotinok o Joowo kibeem ol o Parici anek ne, “Mayo goon lotinowa ogaac aziikneket korogozit ol moorizowe iitene ceen Sabit o, yo akom da?”

⁴ Bar olla ajaki niigi tiv, kokom gi ci abariz. Orogoz ni Yesu eet ci amoor noko, ma anyek noono kotoo. ⁵ Ma anek Yesu noogo ne, “Inoko njaatunooj njeneen ci iinak dole cine look, karabonj een tanj cine iitene ceen Sabit, ma alanj eela kataman?”

⁶ Bodo buk ajaki niigi, kokom gi ci abariz.

Celbezitin ki Eezet

⁷ Mazi acin Yesu ol ci ona avunak dayiin o anjerak goon ceeni ele njinti abon aavuzito noko, uduwak noogo dook zozz ci anek ne, ⁸ “Goon ma awekuñ eeti oman igeet dayiin korge cin, ma rak avo aavtiyu vitenane o titiny goon aavtiye ol o adiñdiñ. Eeci alanj agayu karabonj tedec buk akunak eeti ci titiny oroot kujukin ineet njinito. ⁹ Ma aku anekin eeti ci ona awanin o ineet ne, “Tiña di anyek eet nico kiiya kaavu njina.” Itiña ni niina kaamin alyaani oroot, ma ako aave njaati celbez. ¹⁰ Bar zin goon ma awuyuj ol igeet korgine cigeece, abon avo aavtiyo vitenane ci celbez, ka ma acinuj eeti ci ona awuyuj o, ka kiiya keneyuj ne, Lanjo, tiña je. Ija aavu njaati abon ce. Ka zin jowa niina eezet ole ci ona avunak dayiin o dook. ¹¹ Eeci eeti ci atitiny ele, bar acelbezani. Maje eeti ci acelbezen ele onin, bar akunak noono titinyonti.”

¹² Enek ni Yesu eet ci ona awa noono o ne, “Goon ma arooj towek ol dayiin, ma awa ol ween lanjotugun, karabonj een gotonogu, karabonj een ol ween atenok, karabonj een ol o abaawonu een arok. Eeci ma awa niina ol nicoko doon, awekin buk koca iima bodo niigi ineet dayiin korgine ugeec. Zin gole nico urukteyin niigi ineet njabolo ci dayiin cugun baal adak niigi korge cun o. ¹³ Bar zin goon ma arooj towek ol dayiin, abon awa ol o amaat, kibeem ol o rebrebik, ki ol o njoolik, been ol o ruben. ¹⁴ Ka zin jowa niina mayuwenet Joowa, eeci niigi alanj anyak dayiin ci ka kurukteyin ineet. Bar zin njaan aruween ineet Jooi iitene ci katin ijaani ol o abon daayiza e.”

Zozz ci ayabzonek kole ci avunak dayiin

¹⁵ Mazi azii eeti codoi ole ci aavtiz loota o zozz nico, enewun Yesu ne, “Amayuwi katin oroot ol o azol dayiin njaatodoi baliinte o Joowo.”

¹⁶ Ma anek Yesu noono yabziinta ne, “Anyak baale eet ci aronj kotowak kole ci meelik dayiin korge cin. ¹⁷ Mazi ako acin niini kaal dook utuguze odota, itoonun gabaren cin ka kook kenek ol ne, “Ivita. Utuguze kaal dook odotita.” ¹⁸ Mazi bar ako aduwak gabarenti noogo noko, aduwa niigi dook njaatineej goon ceeni zozz ci alam noono. Azi eeti ci oowu o ne, “Alanj kanim kook njinaante, eeci kanyei mana ci jor kataala. Karoonj zin ka kook kicin. Eelawan ziiyeyan zozz ci kaduwakin noko.”

¹⁹ Azi bodo ceeni ne, “Kanyei arzen ceen amoto ci jor kataala ka goon keevto. Inoko zin karoonj kook kicinai keviin. Eelawan ziiyeyan zozz ci kaduwakin noko.”

²⁰ Maje ceeni azi ne, “Jor njaan karace. Alanj zin kanim kook njinaante.”

²¹ Abada ni gabarenti iya uduwak Manyi onin itoon noono e zozzok nicoko. Mazi azii Manyi onine itoon e zozzok nicoko, otobor nonj oroot ele, ma anek gabaren ne, “Dokony! Bito towa ol o amaat, ki ol o ruben, been ol o njoolik kivita.” ²² Kataman noko ook utugu gabarenti eci ona aduwaki Manyi onine noono o. Ma aku bodo anek niini Manyi onin ne, “Koowa kotowa noogo, bar zin njaan amaac ceez ol noko.”

²³ Ma anek bodo Manyi gabaren ne, “Bito golowe kutur bitaala. Anyek ol kivita ka coma abitiz ceez can noko. ²⁴ Didile kaduwakuñ igeet, akom bodo eet codoi tjr ole baal laadun kawo oowa e ci atar dayiin nicoko been neen.”

Alanj aboke njaati keegine nuyak ci Yesu

^{25–26} Ma iitene oman orkor kole ci appe kibeem Yesu. Ma gola ubuude niini, ma anek noogo ne, “Ma alam eet ci aronj konowan aneet, abon onj niini baatin, ki yaatin, ki nja onin, ki dol ogin, ki dol o yaatin dook. Ma abon buk areyek noono ele onine maany. ²⁷ Eeci eeti calanj aronj niini piryakzet njaati anuyan aneet, alanj een niini nuyai can.

²⁸ Goon ma aronj eeti ketenyaa ceez ci appe, aavi rak loota, ma akeep guruc ci ka ketenyai ceez o, karabonj aleeno kidica ceez nico teenyinta. ²⁹ Eeci ma aruwek niini ceez looc ijaan kekeep guruc ka kaga aleeno kibeem enyciin, ma bar aruwek ceez looc, ma alanj anim keteny kidica, ararni koca ol dook noono giye nico. ³⁰ Ano koca niigi ne, “Icinit di eet nico. Akana ceez teenyinta, ma bar okomek alanjaan adica.”

³¹ Inoko ma anyak alaani takirnya ci meel (10,000), ma aronj niini kooryo been alaan oma ci anyak takirnya ci meelik kujuk cigin o lak ram (20,000), aavi rak koca niini loota, ma abaaban zee ma aga gol ci ka kook kooryo kibeem alaan nice. ³² Mazi acin alanj anim koorto kibeem alaan nice, itoonek koca niini noono otok njinaante, ma ala noono ganon ijaan aavi niini reena o.”

³³ Ma atorneke Yesu zooze ci azi ne, “Zin akom njaatunooj eet codoi ci anim kizi nuyai can, dooke coma onj niini kaal ogin anyak dook giye can.”

Mele calanj amokcar

³⁴ Ma azi Yesu bodo ne, “Goon laadun mele abon njaati njaan amokcarni, bar mazi idicai mokcaronti, izi gerze, ma akom bodo gol ci kagooni komokcar. ³⁵ Ma bodo alanj agano njaati kagooni kaal oogi been neen, bar aganto njaati kajuokeki tuu. Ma alam zin njaatunooj eet ci anyak iin, abon aziijne juruj.”

Zozz ci ayabzonek azeet ci akoloni

15¹ Ma iitene oman ivitak Yesu ol o goon alot meeri kibeem ol o ger onjenu ka kivita kiziiyit niigi kaal o aduwa niini. ² Mazi avo acin ol o Parici kibeem ol o goon ademzek ol lotinok noogo njaati avunake Yesu noko, otongomto izito ne, “Icinit di eet nico njaati atalnan ol o onjenu, ma buk azolo ki noogo.” ³ Uduwak ni Yesu noogo yabziin ci anek ne, ⁴ “Njeneen inoko njaatunooj ci anyak aza ceen eet tur, mazi akoloni codoi njaatineej, alanj adotek ceen eet wec ki tiin torokoc o looc, ma ako aronj ona akoloni e zee ma ajowa? ^{5–6} Bar kane ako aronj nice zee mazi ajowa noko, atalne oroot ele, ma adonj inyaatine akoyi olo. Mazi ako arum korok noko,

awa lajotigin kibeem ol o abaawo kivita nyaatodoi, ma aku anak nongoo ne, “Inoko katalne joojot ele, eeci kojowa azeet onan baal akoloni e.”

⁷Ma anak Yesu nongoo ne, “Didile kaduwakuŋ igeet, ma abad eeti codoi mony oŋene ogin, ma abadaak Jook, appe buk koca talniin tammu tadena joojot ele eete nico, kujuk ol ceen eet wec ki tiin torok nyaan kabaca oŋe.”

Zooz ci ayabzonek gurucoc ci akoloni

⁸Bodo anak Yesu nongoo ne, “Inoko ma anyak nya guruc ceen ziik een amoto, ma akoloz codoi ceez keŋa aje ceez muur, agoon koca niini naagin? Bar kane atokol koca goo, ma aviil ceez kidicilim, ma arooŋnyi juruŋ ceez keŋa dook zee ma ajowa. ⁹Mazi ajowa noko, awa lajotigin kibeem ol o abaawo anak ne, “Katalne joojot ele, eeci kojowa gurucoc onan akoloni e.” ¹⁰Zin buk ma abad eeti codoi mony oŋene ogin, atalne koca toonnyawa tammu tadena noko.”

Zooz ci ayabzonek logo ci akoloni

¹¹Ma azi bodo Yesu ne, “Anyak baale eet ci anyak logoz ram. ¹²Ma anak logoti ci miliny o baatin ne, “Baaba, karoŋnyin nyaayan aneet kaal cigan inoko o.” Ejerok ni baatineŋ kaal nongoo dook ramantiya. ¹³Ma iinyaye ci miliny noko, ataaloi logoti ci miliny o kaal cigin o dook zee adoma ni guruc otowoi, ooyi looce oman reena many. Ma nyaante ook iminaŋi guruc cigin noko reecanzeta been kaale ogen. ¹⁴Mazi adicaŋi guruca dook, iya tarjo ci appe looce nice, maje nongoo okoma guruc ci anyak kina. ¹⁵Makacin ook ilinjijozek eet oma ole ci looc nice. Ma anyek eeti nici nongoo injinjooŋ ci oowawi kooocobanen. ¹⁶Ma giye o okomai eet ci ka kanyek nongoo dayiin ci abon, orooŋun niini ka nuun kook kozolit ki kooocobanen ayer.

¹⁷Ma vurtu abadaak niini ele maany abaaban izi ne, Goon gabara o baaba anyak dayiin ci adak zee ma apiyani, maje bar naana nya ka kakaran ki magiz. ¹⁸Abon kijaaz kamiironi baaba ka kook kenek ne, “Baaba, kabaca oŋec Joowo kibeem nyaatun buk. ¹⁹Alaŋ zin bodo kaganona nyaati awuyan niina aneet kizi nyaerun, bar olla nyaan kibil kiyo gabarenti o.”

²⁰Itiya ni niini otowoi imirozek baatin. Mazi nyaan awoya reena noko, icinun baatine nongoo, ma ateedi baatin biyeta, ma nyaaz adokony ako arumek nongoo gol. Ma ako atorkot nongoo azeene dook, ma acoco nyaalamoc, eeci awucnek nongoo nyaerun. ²¹Bar anak logoti nongoo ne, “Baaba, kabaca oŋec Joowa kibeem nyaatun buk. Alaŋ zin bodo kaganona nyaati awuyan niina aneet kizi nyaerun.” ²²Maje bar baatine awa gabara ogin, ma anak nongoo ne, “Anyakta rum ci abon ivita uburuceke nyaerun. Buk arteke nyapokodec aziit. Uburuceke buk caava zoo. ²³Mazi odot, otowoi icinta ariz ceen moor adii ka kivita kotodooŋit kadayit kataltoi. ²⁴Eeci baale nyaerun nici adaawa, bar zin inoko urugun bodo. Baale okoloze, ma inoko o, ojoyai bodo.” Ulute ni ol itene nice nyaatodoi, ma adake niigi dook talniinta.

²⁵Maje logoti ween abuu itene nice aavi mana. Mazi abadaak korok, bar azii ol abene, ma arogom. ²⁶Otowa ni niini gabaren codoi korok bawuca, ma aku ajin anak ne, “Mate micit taz nici?”

²⁷Ma abedeke gabarenti nongoo anak ne, “Abada uyene gotonu korok, ma atooŋdek baatune nongoo ariz ci nyaan een moor adii joojot, eeci abada niini korok kooom gi ci ger.”

²⁸Mazi azii logoti ceen abuu o gi nico, otobor nya joojot calaŋ arooŋ kiyak korok. Makacin iyyak baatine nongoo, ma ilalek ka kiyak korok. ²⁹Enek ni niini baatin ne, “Cin di! nyaan baal kalinjijonekin irkitok nicoko dook kiyo gabarenti o. Ma akom iiten codoi ci kajurane been neen. Gitaz ci anyan niina aneet? Ako zee ma akomnekin nyaati atooŋdekan bawot o colai otowoi ele ka waan kadakta ki lajotigan. ³⁰Mazi abada nyaerun ci baal ako adica kaal ugun waanyai noko, otodooŋozeyu ni bar nongoo.”

³¹Ma anak baatine nongoo ne, “Dole onan, karome naana been ineet nya iinya dook, ma kaala ci kanyei naana nya o dook kaal cugun. ³²Maje gotonu nici baale adaawa, ma bar inoko urugun bodo. Baale okoloze, bar waanico ojoyai bodo. Abon zin bar katalne naaga dook giye ci abadaket niini ageet o.”

Genyiz ci eet ci agamek gon ceen aroi kaal cigin

16¹Ma anak Yesu nuyak ogin ne, “Anyak baale eet ceen aroi ci anyak gon ci agamek nongoo kaal cigin, ma bar aminani eeti nici kaal. Ma itene oman uduyak nongoo zooz ci aminani eeti nici kaal cigin o. ²Otowa ni niini nongoo, ma aku anak ne, “Gitaz ci kazii agoon noko? Inoko nyaayan warage o gon ayeede kaal o agoon kibeem buk guruc ogan dook, eeci alaŋaan bodo alinjij nyaatan.”

³Enek ni eeti nici ele maany baabaninta ne, “Inoko manyi cane kalinjijonei noko orooŋun koooyan injinjooŋta. Kayo zin kutugu gitaz? Akomnan dooyi ci ka keevoi, ma bodo kanyei alyaan nyaati kalawine. ⁴Inoko kaga gi ci ka kutugu. Abon karooŋa lajotigan ci ka gon katalawan korgine cigeece.” ⁵Enico ele otowa niini ol baal gon anyayek manyi onin nyaolet e. Ma aku ajin eet ci oowu o anak ne, “Anyayei manyi onan nyaolet izok?”

⁶Ma abedeke eeti nici nongoo anak ne, “Kanyayei topiyet ci zeetu een eet tur (100).”

Ma anak niini nongoo ne, “Ore zin warage o nyaolet ugun ce. Inoko teyeeet kizi eet ram kamoto (50) noko.”

⁷Bodo ajin niini eet oma anak ne, “Anyei nyaolet izok?”

Ma abedeke niini nongoo anak ne, “Kanyei kaboot ci labinu een eet tur (100).”

Ma abedeke niini nongoo anak ne, “Ore teyeeet kizi eet wec (80) noko.”

⁸Mazi acin manyi onine nongoo ageny noko, ataana niini nongoo genyize cin noko joojot ele. Ageny zin ol ci loocu noko nyaati aromi zooz cineeŋ kujuk ol o aavtiz vooritine o Joowo. ⁹Didile kaduwakuŋ igeet, buk niiga o atuwenu abon anyaku genyiz ci arooŋaku eleeti lajotizet Joowa kaale ugooc anyaku loota nya, ka ma adicaŋi arokzet nya, atalanuŋ niini igeet korge onin aavtiz kodot.

¹⁰Ma eeti ci atu ol nongoo kaale ci miliny, atu buk ol nongoo kaale ci meel. Maje eeti calaŋ atu ol nongoo kaale ci miliny, alaŋ buk atu ol nongoo kaale ci meel. ¹¹Zin ma alaŋ atu ol bonat cunooŋ kaale ci loocu celbez noko, anyononekuŋ zin koca igeet katin arokzet ween didi Joowa ku? ¹²Buk ma alaŋ atuyuŋ ol igeet kaale ci eet oma, anyononekuŋ zin buk koca katin igeet kaal cugooc ku?

¹³Akom laadun eet ci alinjijonek alaŋ ram. Ma agoon noko, areez koca codoi nyaatineŋ joojot, ma amarnin codoi. Karooŋa nyaolet codoi, ma apez codoi. Zin gole nico alaŋ abon nyaati kalinjijoneke Jook, ma bodo kalinjij guruc.”

Kaal ci aduwak Yesu ol o Parici

¹⁴ Mazi azii ol o Parici zɔɔz nico dook, atararti niigi Yesu, eeci arɛɛz niigi guruc ɔɔɔt. ¹⁵ Ma anek Yesu nɔɔɔɔ ne, “Anyeku gɔɔn niiga eleeti cugooc o kobonta ɔla, maje Jooi aga kaal o eel zinzeetine ugooc dook nɔkɔ. Mazin kaala o atitiny ol o deer, Joowa gerze ɔɔɔt.”

¹⁶ Ma anek bodo Yesu nɔɔɔɔ ne, “Aliŋliŋi baale ol lotinok o Mosis kibeen zozok o ayɛet nyakananeta zɛɛ been iiten baal akuni Jɔn o oonyi e. Mazin iitene o iiyai niini e zɛɛ been inoko o kaviyawa o Joowo abon akati baliin onin uuwakte, makacin ol ci meel ivita iyizek eleeti gɔl nico eecito. ¹⁷ Bar zin katin aɔroneke tammu taden ki looc, maje lotinowa eel nɔkɔ kɔkɔm njintimiliny ter aarayi ŋaatineej been neen. ¹⁸ Mā atɔk ɛeti ŋaa cin, ma bodo arɔca ŋaa oma, adoma koca niini zozomaz. Buk mā arɔca ɛeti ŋaa ci aaryai eete oman, adoma buk niini zozomaz.”

Eet ceen aroi kibeen eet ci kazi Lazaros

¹⁹ Ma azi Yesu ne, “Anyak baale eet ceen aroi ci gɔɔn aborecek rumane ci ataalyai guruce ci meelik ɔɔɔt. Ma abaak niini baayiz ci amadi ɔɔɔt iinya dook. ²⁰⁻²¹ Maje buk ŋinaante anyak eet ci amaati kazi zaar cigin ne Lazaros ci anyak dɔkize alya. Anyaak gɔɔn ol nɔɔɔɔn aaraan ci kɔrɔk ci eet ceen aroi noko, ka kiiya kever zurzuryak ci iinak looc ŋaati adayin ɛeti ceen aroi noko. Ma araana ŋina bodo gɔɔn aduk orze nɔɔɔɔn dɔkize cigin noko. ²² Ma iitene oman adaak ɛeti ci amaati noko. Ivita ni toonnyawa o Joowo, ma avu avɔyi nɔɔɔɔn ŋaao aave Ibrayim tammu tadena. Bodo buk iitene oman adaawun ɛeti ceen aroi noko, ma avɔ ada ol nɔɔɔɔn. ²³ Mazi ako aara niini kebere, bar aavi gooye o ol o oŋenu, ma acin niini Ibrayim reena arome kibeen Lazaros. ²⁴ Otowo ni niini Ibrayim anek ne, “Baaba Ibrayim, eelawan da. Anyekan Lazaros koconeke komolit maam ka kiiya karekan aat, eeci kapirna ɔɔɔt ele gooye ci kaave noko.”

²⁵ Bar abedeke Ibrayim nɔɔɔɔn anek ne, “Ŋɛeran, baale irkitowe baal ŋaan arogne niina loota e, anyozeyin ineet kaala o abon dook. Maje Lazaros waanice ajowa kaal o ger dook. Inoko zin buk niini iya ojowa looc madiz ŋina. Maje niina apirna piyazket nico. ²⁶ Buk bodo ŋaati kanjerɔn naaga been igeet noko anyak ŋolol ci wun kal ci aŋeryet ageet, ka mā arɔɔŋ ɛeti ŋaatinaaŋ kavardaŋ kook ŋaatunooŋ, akɔm gɔl. Buk mā arɔɔŋ ɛeti ŋaatunooŋ kavardaŋa kiiyayet ageeta ŋaato, akɔm gɔl.”

²⁷ Ma abedeke niini Ibrayim anek ne, “Baaba Ibrayim, kilalekin zin da ka toon Lazaros kook korge o baaba loota. ²⁸ Eeci kanyei ŋinaante gɔtɔnɔga ceen tur. Anyek da nɔɔɔɔn kook kitilo nɔɔɔɔn keteedɔi oŋe ugeec ka calaŋ katin avunak niigi ŋinti nɔŋ ci kol kaave naana noko.”

²⁹ Ma anek Ibrayim nɔɔɔɔn ne, “Anyak gotonogu loota ŋinaante lotinok o Mosis been zozok o nyakananetu. Ŋaan ilot nɔɔɔɔ. Ŋaan zin azii gotonogu zozok niceke.”

³⁰ Ma abedeke niini Ibrayim anek ne, “Baaba Ibrayim, alaŋ niigi ooli been neen. Dooke coma iŋaaz ɛeti daayiza, ma ako aduwak nɔɔɔɔ zɔɔz can kapirnanɛ noko, o koca aziiknen niigi, ma ateedine oŋe ugeec dook neen.”

³¹ Ma anek Ibrayim nɔɔɔɔn ne, “Mā alaŋ arɔɔŋ kiziiyit niigi lotinok o Mosis kibeen zozok o nyakananetu, mayo nuun iŋaaz ɛeti daayiza korok bodo, ma ako ilot nɔɔɔɔ, alaŋ koca buk azii niigi nɔɔɔɔn been neen.”

Zɔɔz ci akati baciinok

17 ¹ Ma anek Yesu nuyak ogin ne, “Ma kaala ci anyek ol kabaca oŋe noko ŋedet avu nɔkɔ laadun, bar zin izi nɔŋa wole eete ci laadun anyaa kaal nicoko o. ² Agano waan ŋaati acaboneke nɔɔɔɔn golu inyaa, ma ajukoneke liil ka calaŋ anyek dɔl ci miliny noko kabaca oŋe. ³ Egenyit zin niiga alya eleetine ugooc.

Mā abacakin gotonu gi ci ger, gerenyek. Mazi eteedɔi niini gi nico, toŋ nɔɔɔɔn. ⁴ Mā abacakin niini ineet kaal ci ger lak torgerem iitene codoi, ma bodo buk aku anekin ineet lak torgerem ne, “Inoko o kabaci naana gi we,” abon buk uuŋ niina nɔɔɔɔn kɔkɔm gi ci ger agoonei.”

Zɔɔz ci akati tuwen

⁵ Ma anek toonnyawa Manyi Yesu ne, “Zaaceyet zin tuwen cinaaŋ o.”

⁶ Bar abedeke Yesu nɔɔɔɔn anek ne, “Inoko te anyayit nuun tuwen ci miliny ter kiyo kebereci o laŋiracoco o, animnyu waan enektek keet ceen moneec noko ne, Piya ele ageroi buk ŋina, bitɔ bil liil keŋa ŋaate, ma aziihnuŋ waan niini igeet.”

Liŋliŋon ci gabarento

⁷ Ma anek Yesu nɔɔɔɔn ne, “Inoko mā anyak ɛeti codoi ŋaatunooŋ gabaren ci eevonek, karabɔŋ oowawonek nɔɔɔɔn, mazi ako abada niini towawiinta, karabɔŋ een keevinta, anei koca niina nɔɔɔɔn ecodoi nɔkɔ ne, “Bitɔ dawo?” ⁸ Bar kanɛ anei rak koca nɔɔɔɔn ne, “Bitɔ tuguweyan dayiin zɛɛ mazi odot, borocek rum ci abon, ka nyaayan dayiin, ka ija rewan kadawo rak, ma kawode. Ŋaan ako adake niina tedec.” ⁹ Alaŋ zin anyek ɛeti gabaren zany giye o agɔɔni niini kaal o aduyak niini nɔɔɔɔn kutugu. ¹⁰ Abil zin buk ŋaatunooŋ nɔkɔ. Mā agoonu liŋliŋon o aduyakuŋ ka utuguz, iziti ne, “Keegina naaga gabara ci labak, olla kaliŋliŋnya naaga liŋliŋon onaŋ aduyaket doon.”

Arogoz Yesu ol ceen amɔtɔ amɔɔr mɔɔriz o gidan

¹¹ Mazi ŋaan awɔ Yesu gɔla ako Jerusalem nɔkɔ, ook ono niini viten ci aŋer looc o kazi Samariya kibeen looc o kazi Galili.

¹² Mazi ako awowonek kutur oma ŋinaante, urumɔ kibeen ol ceen amɔtɔ ci amɔɔr mɔɔriz o gidan. Avu niigi, ma eel reena kidicilim. ¹³ Ma agereny azii ne, “Yesu, Manyi, eelawet da!”

¹⁴ Ma abedeke Yesu nɔɔɔɔn anek ne, “ɔtɔ eyeltɛk eleeti alaati o ceez o Joowo ka kɔɔt kicintuŋ igeet maŋaan anyaku mɔɔriz.”

ɔtɔɔɔ ni ol nici. Mazi ŋaan awɔ gɔla nɔkɔ, obonta nɔɔɔɔn eleeti ugeecik orogita. ¹⁵ Mazi ako acin ɛeti codoi ŋaatineej ele onin nɔkɔ, abada niini, ma aku anyek Jook zany molowe ci appe. ¹⁶ Aku niini, ma aavek Yesu loota kopɔkpɔk, ma anyek nɔɔɔɔn zany talniinta. Maje niini laadun eet ci Samariya.

¹⁷ Ma anek Yesu ol ne, “Ma uyen eegin ol ci orogit mɔɔriza amɔtɔ. Ol tɔrkɔc ŋaadaŋ? ¹⁸ Ole oke dook akɔm ci abada ŋaatineej kiiya kanyek Jook zany zɛɛ ma bar abada ɛeti ceen miroi noko doon?” ¹⁹ Enek ni Yesu nɔɔɔɔn ne, “Tiŋa je, tɔ. Tuwen unun neen ci uruguzin ineet o.”

Kuni ci baliin o Joowo

²⁰ Mazi ajin ol o Parici Yesu iiten ci ka kiiyai baliin o Joowo. Ebedeke niini nɔɔɔ enek ne, “Baliin o Joowo alañ aku gole ci ka kicinti ol. ²¹ Akom katin eet ci ka kizi ne, “Icinit di nɔɔɔ ce,” karabɔŋ azi ne, “Nɔɔɔ ca,” eeci baliin o Joowo aavi zinzeetine ugooc.”

²² Ma anek Yesu nuyak ne, “Avu katin iinya ci arooŋnyarŋ niiga icintaŋ aneet Ɔjeerti Eeto, ka olla koromte been igeet nuun iiten codoi Ɔr nɔkɔ, bar alañ acinaŋ nɔkɔ been neen. ²³ Anyak katin ol ci anekuŋ ne, “Icinit di Ɔhinte! Aavi niini Ɔhinaante,” karabɔŋ azi ne, “Icinit di Ɔhinto! Aavi Ɔhina.” Bar zin eteedɔ zɔɔ. Má avɔ anuyu nɔɔɔɔ been neen. ²⁴ Eeci tiŋeere badaan cane aneet Ɔjeerti Eeto abil kiyo bɔɔɔye o Ɔɔɔn abadi kicinit ol looc dook o. ²⁵ Bar zin rak ɔɔwa abon kapirna kaale ci meelik, ma abornan ol ci ɔɔ nico noko.

²⁶ Zin kiyo baale agooni kaala iinyaye o Nowa e, abil buk katin iinya cigan aneet Ɔjeerti Eeto o nɔkɔle. ²⁷ Baale iinyaye niceke ol dook adake, ma awot nyaantane. Ma arɔɔɔ labak zee been iiten baal akɔyi Nowa kavoola e. Iiya ni otodot waanice tawani nɔɔɔɔ dook lai.

²⁸ Abil buk katin kiyo baale iinyaye o eet o kazi Lat e. Waanice adake ol, ma awot nyaantane, ma ataali, ma ataaline kaal, ma eevyi, ma eenyet ceezi labak. ²⁹ Ma iitene o aduŋni Lat kuture o kazi Sodom e, iita goo tamma, ma adak waanice nɔɔɔɔ dook lai.

³⁰ Abil zin buk katin iiteni ci kayelizyane naana Ɔjeerti Eeto e nɔkɔle.

³¹ Tiŋeere iitene nice eeti ci aavi ceez reerna alañ anim kook kaara kaal ogin ceeza eecitɔ. Maje eeti ci te aavi mana alañ bodo anim kiiyak kɔɔk ka kiiya kooyi kaal ogin. ³² Aada zɔɔz o Ɔaa o Lat baal abuudi Ɔla arɔɔŋ kimiurozek Sodom, ma waanice ook adaak e. ³³ Ma eeti ci arɔɔŋ korogoz ele onin, bar akoloz. Maje eeti ci akoloz ele onin, bar aroguz. ³⁴ Didile kaduwakuŋ igeet, katin baaline nice mā arome ol raman kuwena, aŋeryai codoi Ɔaatineeŋ, ma ooŋni codoi. ^{35–36} Buk mā areke Ɔaai raman golwa Ɔaatodoi, aŋeryai Ɔaatineeŋ codoi, maje codoi ooŋnonek looc.”

³⁷ Ma ajin nuyawa nɔɔɔɔ anek ne, “Manyi, akanai dim katin gi nici Ɔaadaŋ?”

Ma abedeke Yesu nɔɔɔɔ anek ne, “Zin Ɔɔɔn laadun mā alote kuduvaana Ɔaaman, anyak gi ci adaai tɔ Ɔhinaante.”

Zɔɔz ci ayabzonek Ɔaa ci boi

18 ¹ Uduwak ni Yesu nɔɔɔɔ yabziin ci ka kedemez nɔɔɔɔ ka kemedai kijinti Jook tup. ² Anek niini nɔɔɔɔ ne, “Anyak baale kuture oman alaan ci roonnyo calañ aŋole Jook, ma buk apez niini ol dook. ³ Maje buk kuture nice anyak Ɔaa ci boi ci Ɔɔɔn akunak nɔɔɔɔ iinya dook, ma aku ilalek ka kiroon zɔɔz cin kibeen eet oma ci amarnin nɔɔɔɔ. ^{4–5} Maje alaani nici lak ci meel alañ arɔɔŋ kitirit nɔɔɔɔ, ma vurma enek ele maany ne, “Yo nuun alañ naana kaŋole Jook, ma kapez ol o, abon kagoonei Ɔaa nico gi ci arɔɔŋ o, gerze Ɔaan aku aconanan tup zee ma arukan kadaak.”

⁶ Izi ne Manyi Yesu ne, “Iziyit zin di gi ci aduwa alaani ci gerze noko. ⁷ Bar zin mā aluwek Jook ol ogine waazin ki baalin ole o amarnin nɔɔɔɔ, apak koca niini zɔɔz nico. Alañ anyek nɔɔɔɔ kereyo Ɔhinti wun. ⁸ Didile kaduwakuŋ igeet, apayakuŋ koca niini igeet gi o arooŋnyu kataman nɔkɔ. Mayo zin tiŋeere ma kabadaai naana Ɔjeerti Eeto looc, kaku kajowa loota Ɔhina ol ci atuwe juruŋ tɔ?”

Zɔɔz ci ayabzonek eet ci Parici

⁹ Ma bodo aduwak Yesu yabziin co ol o Ɔɔɔn abaaban kizik niigi abona Ɔhume o Joowo, ma apez ol oogi. ¹⁰ Anek niini nɔɔɔɔ ne, “Anyak baale ol ceen ram avɔ Ɔharyiin ceenze o Joowo. Eeti codoi Ɔaatineeŋ Pariciwen. Maje codoi eet ci Ɔɔɔn alot meeri. ¹¹ Ma ako abil eeti ceen Pariciwen noko ceez Ɔaatin doon, ma aŋarye azi ne, “Jook, kanyin naana ineet zany, eeci aneet alañ appe ziniz, ma alañ kalaba ol, ma alañ kareeca kiyo ol dook o, ma buk alañ katobona ki eet ci Ɔɔɔn alot meeri co. ¹² Kuuŋ Ɔɔɔn naana dayiin lak ram iinyaye ween torgerem ka kidiŋdiŋanin ineet, ma kanyin ineet lelen codoi lelenete ween amɔtɔ kaale ogan kajowa dook.”

¹³ Maje eeti ci Ɔɔɔn alot meeri o, abil reena kidicilim, ma alañ buk adɔŋ ɔɔ ki taden, ma acelbezen ele onin ajin Jook azi ne, “Jook, kilalekin ineet, eeci naana kabaca oŋe ɔɔɔɔ.”

¹⁴ Izi ni Yesu ne, “Didile kaduwakuŋ igeet, ma eeti ci Ɔɔɔn alot meeri noko imiire niini ook ol Ɔhanti agaman Jooi nɔɔɔɔ, ma anyek nɔɔɔɔ kizi eet ci abona Ɔhume onin. Maje bar eet ci Parici noko akom gi ci agoonek Jooi nɔɔɔɔ kina. Eeci eeti ci adɔŋ ele, acelbezen Jooi nɔɔɔɔ. Maje bar eeti ci acelbezen ele onin, adɔŋ Jooi nɔɔɔɔ kizi titiny.”

Amayuk Yesu dɔl ci miliny

¹⁵ Enice anyaaktak ol ogen Yesu dɔl ci miliny ka kiiya kataadek niini nɔɔɔɔ azeen kamayuk. Mazi bar acin nuyawa ogine ol nicoko, egerenycek niigi nɔɔɔɔ. ¹⁶ Otowa ni Yesu dɔl, ma anek nuyak ne, “Anyek dɔl kivitayan. Má alamnyu nɔɔɔɔ, eeci baliin o Joowo abilnek ol ci anyek eleeti kiyo dɔlya ci miliny noko. ¹⁷ Didile kaduwakuŋ igeet, ma eeti calañ agama baliin o Joowo kiyo dole ci miliny o, alañ ako niini baliinte o Joowo been neen.”

Alaan ceen botoroc

¹⁸ Ma ajin alaani ci ol o Juz Yesu anek ne, “Gayoi o abon, mayo kutugu gitaz ka kojowa roget o abil been neen?”

¹⁹ Ma anek Yesu nɔɔɔɔ ne, “Ako ma awuyan kizi eet ci kabona o naa? Akom eet ci abon, bar abona Jooi doon. ²⁰ Inoko aga niina lotinok o azi ne, Má adoma zoocmaz. Má amuny eet ci deer. Má agɔɔze. Má avolon. Tɔŋɔle baatun ki yaatun.”

²¹ Ma abedeke alaani nici Yesu anek ne, “Kazoone lotinok nicoko dook nɔkɔ laadun Ɔhaan keen kidic e.”

²² Mazi azii Yesu zɔɔz nico, enek nɔɔɔɔ ne, “Anyak zin gi codoi ci Ɔhaan tugu. Bitɔ taalɔi kaal ugun dook zee anyek guruc ele ol o amaati. Ɔhaan ako jowa niina arɔkzet tammu tadena. Ija zin niina alya nowan aneet.” ²³ Bar mazi azii alaani nici zɔɔz nico, alaca ele calañ atalne, eeci een niini aroi ɔɔɔɔ.

²⁴ Mazi acin Yesu nɔɔɔɔ alaŋaan atalne nɔkɔ, izi ne, “Adoi kak ole ceen arɔk Ɔhanti avɔyi baliinte o Joowo. ²⁵ Adoi ɔɔɔɔ ele eete ceen aroi Ɔhanti akɔyi baliinte o Joowo, bar kizi maye nyakale Ɔhanti adunyoneke nyibira Ɔhino vɔlon o.”

²⁶ Ijinit ni ol o azii gi nico nɔɔɔɔ enektek ne, “Ka dim zin katin korok Ɔhene?”

²⁷ Ma abedeke Yesu nɔɔɔɔ anek ne, “Ma gi o alañ anim ol ci deer kutuguzo, aboke Joowa labak.”

²⁸ Enek ni Pitɔr Yesu ne, “Cin di, inoko naaga kotoŋta korogjok ogaacak, ma kivita kunuyin ineet. Mazin yo tiŋeere kajowana naa?”

^{29–30} Ma abedeke Yesu nɔɔɔgɔ anek ne, “Didile kaduwakuŋ igeet, ma eeti ci ooŋ korok onin, ki ŋaa onin, ki gɔtɔnɔgi ogin, ki baatin, ki yaatin, been dɔl ogin giye ci akati baliin o Joowo, ajowa tiŋeere niini kaal ci meelik loota ŋina kujuk kaal baal ooŋnek niini looc ole onin e. Ma bodo katin ajowa niini roget o abil been neen.”

Aduwak Yesu ɔl daayiz onin bodo

³¹ Otowa ni Yesu nuyak ogin een amɔto ram, ma anek ne, “Iziikto di, inoko kavɔ naaga Jerusalema. Avɔ zin tiŋeere ŋinaante agooni kaala baal ayeet nyakarjaneta akanan aneet Ŋeerti Eeto e dook. ³² Kako tiŋeere kanyononei naana takirnya o ɔl ween moden, ma avɔ ararnan niigi aneet, ma adomnyan, ma oortekan amot. ³³ Avɔ tiŋeere arukan niigi aneet nyaboyen, ma vurta ɔɔt ni uruktan kadaak. Bar zin iinyaye ceen iiyu, ŋaan kiŋaaz bodo daayiza.”

³⁴ Maje nuyawa ogine akom gi codoi aga kaale nicoko. Eeci keŋ ci zɔɔz ci azɔɔz Yesu noko aroodi ŋaatineeŋ, ma alaŋ aga niigi zɔɔz ci aduwa niini o akati gitaz.

Akol Yesu eet ci ruben kebere

³⁵ Mazi akɔ ajɔŋɔz Yesu kutur o kazi Jeriko, anyak eet ci ruben ci aavi gɔla alaye ŋinaante. ³⁶ Mazi azii niini kɔle ci awɔ o, ijin nɔɔɔgɔ enek ne, “Ma dim te anyak lɔɔci naa?”

³⁷ Ma abedeke ɔl nɔɔɔɔ anek ne, “Awɔ Yesu o Nazaret ŋina.”

³⁸ Egereny ni niini izi ne, “Yesu ŋeerti Devid, tiritan da.”

³⁹ Maje ɔl ci araki o agernyek nɔɔɔɔ kajawɔ. Bar enico egereny niini ɔɔɔt ele azi ne, “Ŋeerti Devid, tiritan da.”

^{40–41} Ibilun ni Yesu, ma aduwak ɔl kanyaaktak nɔɔɔɔ eet ci ruben noko. Mazi aku, ijinun Yesu nɔɔɔɔ anek ne, “Arooŋnyan kutuguweyin naa?”

Ma abedeke niini Yesu anek ne, “Manyi, karoŋnyin nyan kicinɔ bodo.”

⁴² Ma abedeke Yesu nɔɔɔɔ anek ne, “Cinɔ zin. Tuwen unun neen ci aruguzin ineet o.” ⁴³ Enico ele icinɔ niini didi, ma ano Yesu, ma adiŋɔŋan Jook ɔɔɔt ele giye nico. Mazi acin kɔle gi nico, atanaazɔ niigi dook Jook ɔɔɔt ele.

Yesu been Zakiyas

19 ^{1–2} Mazi akɔ arum Yesu kutur ci kazi Jeriko, anyak ŋinaante eet ceen aroi kazi Zakiyas. Niini alaan ci ɔl o gɔɔn alot meeri. ³ Ma arɔɔŋ niini kicin eet ci kazi Yesu o ɔɔɔt ele, bar akom gɔl ci ka kicin nɔɔɔɔ, eeci meele ɔl ɔɔɔt, maje niini alya eet ci kutur ter. ⁴ ɔɔɔkɔny ni niini araye ɔl ɔɔwa, ma akɔ atɔɔt keet ceen moneec ka kicin Yesu juruŋ ŋaati aku aduŋni ŋina. ⁵ Mazi aku arum Yesu ŋinito, ɔɔɔŋ ɔɔ, ma anek nɔɔɔɔ ne, “Zakiyas, duna taman. Kako tedec katike ole cun e waanico.”

⁶ Ma aduŋna niini kataman, ma atalna Yesu ɔɔɔt ele. ⁷ Maje ɔl dook o acin gi nico, aŋɔmtɔ anɔ ne, “Ma dim eeti nici akɔ ka kook katanu ole ci eet ci oŋenu o?”

⁸ Ma iŋaaz Zakiyas jena, ma anek Manyi Yesu ne, “Manyi, ziiyan di. Kako tiŋeere kaŋer kaal ogan kanyei dook kɔrgena, ma kanyi ɔl o amaati. Buk mā da gɔɔn anyak ɔl ci kadaye looc, karuwei tiŋeere nɔɔɔgɔ kaal ci arɔɔŋ niigi ŋaatan o lak wec.”

⁹ Ma anek Yesu nɔɔɔɔ ne, “Iiyak zin rogzen korok nico waanico. Buk eeti nici dole ci dɔl o Ibrayim. ¹⁰ Mazin naana Ŋeerti Eeto kakun ka kiiya korɔɔŋ ɔl o akoloni zee ma kajowa ka korogoz nɔɔɔgɔ.”

Zɔɔz ci ayabzonek guruc

¹¹ Mazi ŋaan azii ɔl zɔɔz nico nɔkɔ, uduwak niini nɔɔɔgɔ yabziin oma, eeci izi ajɔn Jerusalem. Abaabanit ni ɔl ci ɔrkɔr ki nɔɔɔɔ o izito ne, “Izi baliin o Joowo ajɔn ka kiiyak looc.”

Ma aduwak Yesu nɔɔɔgɔ yabziin ci anek ne, ¹² “Anyak baale eet ci titiny eerononek looc ci reen manyi, ka kook korɔnyca ɔl nɔɔɔɔ ŋinaante kizi alaan zee mazi odot, ka kabadaak niini looc onin. ¹³ Mazi ka kɔɔtɔ, otowa gabara cigin een amɔto, ma aku anyek codoi gɔɔn ŋaatineeŋ guruc ceen eet tur, ma anek nɔɔɔgɔ ne, “ɔto ilinliŋti rak guruc nicoko ŋinti ŋaan kazeene to o.”

¹⁴ Maje ɔl ci looc cin o abor niigi nɔɔɔɔ ɔɔɔt ele, ma itoon niigi otok kono nɔɔɔɔ vurta azi ne, “Alaŋ karoŋnya eet nico kizi alaan cinaaŋ.”

¹⁵ Maje bar ŋaati baal eerononek niini neke, anyozozek nɔɔɔɔ alaazet odota. Mazi akɔ abadaak niini korok, iya otowa gabara ogin baal anyek guruc e ka kiiya kicin guruc ci anyaa niigi guruce baal anyek niini nɔɔɔgɔ ka kemelŋenyit e.

¹⁶ Ma aku gabarenti ci oowu o, ma anek nɔɔɔɔ ne, “Manyi, kilinliŋa guruc eet tur lak amɔto (1,000) guruce baal anyan e.”

¹⁷ Ma abedeke niini nɔɔɔɔ anek ne, “Abon ɔɔɔt. Alinliŋ juruŋ. Een niina gabaren ci abonanin. Zin giye o ilinliŋaye guruc oogi guruce baal miliny ter e, kanyin tiŋeere ineet kuturyok amɔto ka bal niina izi alaan cineeŋ.”

¹⁸ Ma aku bodo gabarenti ci ano gɔn o, ma azi ne, “Manyi, kilinliŋa guruc ceen eet tur lak tur (500) guruce baal anyan e.”

¹⁹ Ma anek niini gabaren nico ne, “Kanyin tiŋeere ineet kuturyok tur bal izi alaan cineeŋ.”

²⁰ Ma aku bodo gabarenti ceeni, ma azi ne, “Manyi, guruc baal anyan e ce. Kacabi iiten baale ruma, ma kitarŋ karoodi.

²¹ Kaŋolinin ineet, eeci een niina eet ci adoŋnin aziiti. Adoma gɔɔn kaal culu, ma ateedi maneen calaŋ eeva niina.”

^{22–23} Ma anek alaani nɔɔɔɔ ne, “Een niina gabaren ci ger. Kacabjin tedec zozowe cugun aduwa noko ele. Mā da ma agayan keen eet ci adoŋnan aziiti, ma kadoma kaal culu, ma kateedi maneen calaŋ een cigan, alaŋ zin da amelŋeny guruc cigan o ka ma kakun kajowa azaace naa?”

²⁴ Enek ni alaani ɔl o arome kibeen nɔɔɔɔ ne, “Aamta nɔɔɔɔ guruc nicoko, anycek gabaren ona anyak guruc ween eet tur lak amɔto e (1,000).”

²⁵ Bar anek niigi nɔɔɔɔ ne, “Manyi, anyawun uyen niini laadun eet tur lak amɔto (1,000).”

²⁶ Ma abedeke niini nɔɔɔgɔ anek ne, “Kaduwakuŋ igeet, mā anyak eeti kaal ci meelik, bar anyonek nɔɔɔɔ ogen bodo kizi meele ɔɔɔt. Maje eeti ci akom gi ci anyak, mayo nuun anyak ci miliny ter, aamnyai bar ŋaatin nici kavu nɔkɔ. ²⁷ Inoko zin anyaaktayan ɔl baal amarninan aneet, ma alaŋ arooŋnyan kizi alaan cineeŋ e dook. Anyaakta ka ivita uruyit nɔɔɔgɔ kadaayito aneet ŋuma ŋina.”

Akunak Yesu Jerusalema

²⁸ Aduwa Yesu zɔɔz nico, ma vurta arawɔi ɔl ooyi Jerusalema. ²⁹ Mazi akɔ ajɔŋɔz ŋino kazi Bezpeja kibeen Bezani biye o kazi Kiŋiroc, itoonun niini nuyak ram karaktere.

³⁰ Ma anek rak nɔɔɔ ne, “Ɔɔto korgine ci igeet ɔɔwa neke. Ajowanu tedec ɔɔnaante zikir ceen jɔɔn ci ɔɔna laadun kɔɔɔt eeti oman acabje ɔɔnaante. Ɔɔto ɔɔkta ka anyaaktayan aneet ɔɔna. ³¹ Mā anyak eet ci ajinunj anekuɔ ne, Ɔɔganu zikir nico naa? Enektek ne, Arɔɔɔ Manyi nɔɔɔ.”

³² Ɔɔto ni niigi, ma avɔ ajowa kaal dook eona aduwake Yesu nɔɔɔ e. ³³ Mazi avɔ ɔɔga zikir, ijinit ɔl ci zigiro o nɔɔɔ enektek ne, “Ɔɔganu zikir cinaaj naa?”

³⁴ Ma abedeke niigi nɔɔɔ anek ne, “Arɔɔɔ Manyi nɔɔɔ.”

³⁵ Ooti ni niigi zikir ɔɔati Yesu. Ma avɔ areke nɔɔɔ rumanɔ bawuc, ma anyek Yesu kɔɔɔt. ³⁶ Mazi akɔ avɔ Yesu zigira, eteveteke ɔl nɔɔɔ rumanɔ ugeec gɔl.

³⁷ Mazi akɔ ajɔɔɔ niini Jerusalem ɔɔaɔ alocane gɔl biye o kazi Kijiroc, egerenyit nuyawa ogine dook kɔla ɔɔati anyeke Jook zany, ma anaati nɔɔɔ kaale o meel adiɔɔɔ acin niigi. ³⁸ Ma agereny niigi azi ne, “Amayuk Jooi alaan o aku zaare ogin. Abil ganɔni tamma, ma anyak titinyɔn Jooi o adiɔɔɔ.”

³⁹ Ma azɔɔɔ ɔl ogen ole o Parici kɔla tɔ anek Yesu ne, “Alaan o demziinto, gerenyek nuyak cuguno kajaktɔ.”

⁴⁰ Bar abedeke Yesu nɔɔɔ anek ne, “Kaduwakuɔ igeet, mayo nuun ajaki niigi, biyen alya agereny ni koca ɔɔɔt nɔɔɔ.”

Aluwek Yesu Jerusalem

^{41–42} Mazi awowonek Yesu Jerusalem, acin kutur, ma aluwek azi ne, “Mate nuun ga gɔl o ka jowai ganɔn iiten nico ele doon, abon koca. Bar zin inoko o alaj aga. ⁴³ Aku zin tiɔeere iiteni ci aliyaniin modena o amarninin ineet kabanyɔ dook, kɔkɔm ɔɔinti aduɔne. ⁴⁴ Oyokin tiɔeere niigi ineet kibeen ɔl cugun noko dook lai kɔkɔm tegeremoc codoi ɔɔr nɔɔɔ ataadonek gɔn. Agooni gi nici o, eeci ɔɔna ga niina iiten o iiyai Jooi niini alya ka kiiya kitiritin ineet.”

Akɔ Yesu ceeze o Joowo

⁴⁵ Enico ook Yesu ceeze o Joowo, ma akɔ atɔɔwak ɔl dook o ataaline kaal kaluwawa ɔɔnaante bitaalin. ⁴⁶ Ma anek niini nɔɔɔ ne, “Ayeedi waragewe o Joowo zɔɔɔ ci anɔ Jooi ne, Ceez cane o agayi kizi ceez ci ɔɔriiinto, maje bar niiga ivita utuguzu kizi ɔɔinti aroodine agoryawa.”

⁴⁷ Ma iinyaye niceke akɔ gɔɔn ademez Yesu ɔl ceeze o Joowo iinya dook. Maje alaata o ceez o Joowo, ki ɔl o demziinto, been alaata o ɔl o Juz arɔɔɔ kuruyit nɔɔɔ kadaak. ⁴⁸ Bar akɔm gɔl ci ka kurukti niigi nɔɔɔ, eeci ɔl dook gɔɔn alotak nɔɔɔ, ma avu azii zoosok ogin. Ma alaj arɔɔɔ niigi kobolozit zɔɔɔ codoi ɔɔr zoosowe ci aduwa niini noko.

Ajin ɔl o Juz alaazet ci Yesu o

20 ¹ Ma iitene oman ademzek Yesu ɔl kaviyak o Joowo abon ceeze o Joowo. Ivitak ni nɔɔɔ alaata o ceez o Joowo, ki ɔl o demziinto, been ɔl o adikir baayizo. ² Ma avu anek ne, “Duwayet di, ma ɔɔyiz ci agɔɔne kaal nicoko dook noko ajowa ɔɔa? Ɔɔneen ci anyin ineet ɔɔyiz nico o?”

^{3–4} Ma abedeke Yesu nɔɔɔ anek ne, “Anycaɔ zin di buk kijinunj naana igeet. Baale ɔɔyizi o Jɔn o oonyi aku Joowa, yo aku da eete ci deer?”

⁵ Ɔɔnaante adaɔtɔ niigi maany izitɔ ne, “Kayo kiziti ne? Mā kazi ne, Aku Joowa, azi koca ne, Alaj zin da baale atuyu Jɔn naa? ⁶ Bodo mā kazi ne, Aku ole ci deer, avacet koca kɔle nici dook ageet biyene zee ma kadaai, eeci atu niigi Jɔn anyek kizi nyakanan.”

⁷ Ebedeke ni niigi Yesu enektek ne, “Alaj kagaya ɔɔinti da akuni ɔɔyizi ci Jɔn o.”

⁸ Ma anek Yesu nɔɔɔ ne, “Alaj zin buk naana kaduwakuɔ igeet ɔɔyizi can kagɔɔne kaal nicoko dook o.”

Zɔɔɔ ci ayabzonek ɔl ci mano

⁹ Uduwak ni Yesu ɔl yabziin ci anek ne, “Anyak baale eet ci adowa keen ci amadi kebere ɔɔɔt ele. Ma anyek niini ɔl oogi keevit mana nico ka ma abiir, ka keɔerit niini been nɔɔɔ. Eɔɔn ni niini ook ɔɔati reɔn many. ¹⁰ Ma iinyaye o teedinto, itoonak niini gabaren cin ɔl o keevinto ka kiiya kooyeke nɔɔɔ kebere cigin. Bar ɔl ci keevinto noko uruyit gabaren nico, ma anyek nɔɔɔ kimiire nɔɔɔ kɔkɔm gi ci akɔyi. ¹¹ Bodo akɔ itoona niini gabaren oma, bar ɔl ci keevinto noko ɔɔna amena bodo aruk buk gabaren nico. Ma amomoz nɔɔɔ ɔɔɔt, ma anyek kimiire nɔɔɔ kɔkɔm gi ci akɔyi. ¹² Bodo aku itoonek niini nɔɔɔ gabaren oma, ma avu aruk niigi nico ɔɔɔt ele zee ma atooyek bitaalin.

¹³ Abaabanun ni eeti ci mano noko izi ne, “Kayo kutugu ku? Abon kitoonei nɔɔɔ ɔɔeran onan kareez ele. Kaga nɔɔɔ aɔole tiɔeere niigi nɔɔɔ.”

¹⁴ Bar mazi avɔ acin ɔl ci keevinto noko nɔɔɔ, izitɔ ne, “Niciini ɔɔerti eet o mano neɔn. Abon karuk nɔɔɔ kadaak ka kaala cigine o dook kizi cigaaɔ.” ¹⁵ Agamit ni niigi nɔɔɔ, ma avɔ aruk kadaak mana bawuca.”

Ma ajin Yesu nɔɔɔ anek ne, “Inoko zin tiɔeere eeti ci mano noko aku agoonek ɔl nicoko naa? ¹⁶ Bar kane aku tiɔeere niini, ma aku aruk ɔl ci keevinto noko kadaayitɔ, ma anyek mana ɔl oogi.”

Mazi azii ɔl yabziin nico, izitɔ ne, “Alaj ri bai abil nɔɔɔ.”

¹⁷ Egelem ni Yesu nɔɔɔ, ma anek ne, “Mazi yo zɔɔɔ o ayeedi waragewe o Joowo akati naa? Azi niini ne, Ma be o abor ɔl o gɔɔn eɔnyet ceezi biyene, ma apez kizi gi ci labak, bar be o titiny ɔɔɔt kujuk biyen o eenycinto dook neɔn. ¹⁸ Ma eeti ci iinak be nici aduuli yivyiv. Maje eeti ci iinak be nico nɔɔɔ uurti kututut.”

Meeri o aruwonek alaan o kazi Sizar

¹⁹ Ma arɔɔɔ ɔl o ademzek ɔl lotinok kibeɔn alaata o ceez o Joowo kagamit Yesu ziite nice, eeci aga niigi ariik niini nɔɔɔ zoosɔ nico, bar olla eeci aɔole niigi ɔl.

²⁰ Orooɔit ni gɔl ci ka kagamit nɔɔɔ. Ma avɔ atɔɔɔk ɔl oogi guruci, ka kɔɔt kedetit Yesu ɔɔati agɔɔni eleeti kizi ɔl ci abon, ka kalabta nɔɔɔ kijinit kaal genyiza zee mazi anyak gi ci ger aduwa, ka kooti nɔɔɔ rooni alaane o Rom. ²¹ Ma avu anek roote nici Yesu ne, “Alaan o demziinto, kagayin naaga ineet kaala ci aduwa niini, ma ademez o dook kaal ci alɔemnyai. Ma akɔmnin ineet tel, bar ademez ɔl gɔl o Joowo een didi. ²² Inoko zin di duwayet. Mayo agano ɔɔati karuweki alaan o Rom meeri, yo akɔm da?”

²³ Maje Yesu aga zɔɔɔ cineɔɔ adeti niigi nɔɔɔ o nɔɔɔ, ma anek nɔɔɔ ne, ²⁴ “Anycaɔ di gurucoc kicin. Ma riritɔni kibeɔn zaar ci anyak gurucoc nici o ci ɔɔne?”

²⁵ Ma abedeke niigi nɔɔɔ anek ne, “Ci Sizar.”

Enek ni Yesu nɔɔɔ ne, “Anycek zin Sizar kaal o akati nɔɔɔ. Maje Jook anycek kaal o akati nɔɔɔ.”

²⁶ Buk enico ɔkom zɔɔɔ ci ka kagamti niigi nɔɔɔ ɔl kɔrgena ɲina. Ma abiiir nɔɔɔ ooti zooze ci abarzek niini nɔɔɔ o, olla kapaɲante kɔkom gi ci aduwa.

Demziin ci akati ɲaazi daayiza

^{27–28} Ma avunak ɔl ogen ole o kazi Sajuzi Yesu. Niigi ɔl o gɔɔn adaɲnye azi ne, Alaɲ bodo ɔl iɲaaz daayiza. Ma avu ajin niigi Yesu anek ne, “Alaan o demziinto, ayeedeket baale Mosis lotinet ci azi ne, Mā adaai ɛeti ci ɔɔɔɔ maɲaan akom ɲaa cin o dɔl, abon gɔtɔɔnya ci ɲaan arogi o anyak ɲaa cin o ka kitirak nɔɔɔɔ dɔl. ^{29–30} Anyak zin baale ɔl ceen gɔtɔɔn een torgerem. ɔɔɔɔ ni ceen abuu o, ma adaai iɲaan kitira dole. Iiya ni anyawun gɔtɔɔnya ci anowɔ ki nɔɔɔɔ o ɲaa, ma adaai buk nici iɲaan kitirak ɲaa dole.

³¹ Ma bodo buk aku agɔɔn gɔtɔɔnya ceen kɔrgen o nɔkɔ. Ma akɔrkɔranɔn niigi dook ɲaa nɔkɔ zɛɛ been tir logote ceen tutur o. Ma adaai niigi dook kɔkom dɔl ci arita. ³² Ma vurta adaak buk ɲaa. ³³ Mayo zin tiɲeere ma iɲaaz ɔl daayiza, ɲaa nici akati ɲeneen giye o niigi dook torgerema anyakti ɲaa nico?”

³⁴ Ma abarzek Yesu nɔɔɔ anek ne, “Arɔɔɔ ɔl loota ɲina inoko o doon. ³⁵ Maje bar ɔl o tiɲeere iɲaaz daayiza, ma avɔ rogete o abil been neen, alaɲ bodo niigi arɔɔɔ. ³⁶ Ma alaɲ buk bodo niigi adaai, eeci otobto niigi ki toonnyak o Joowo. Iziti niigi dɔl ci Joowo giye o tiɲeere iɲaani niigi daayiza. ³⁷ Ma ɔl o adaai iɲaaz bodo tiɲeere niigi daayiza. Uduwa baale Mosis gi nico waragewe o Joowo ɲaabaal acini niini lugurgoc o alanyit e. Ma awo niini Jook azi ne, Jook o Ibrayim, ki Aizak, been Jakob. ³⁸ Ma keɲ ci zɔɔɔ nico akati gi o alaɲ ɛene Jooi Jook ci ɔl ci adaai, bar niini Jook ci ɔl ci arogi, eeci ɔl dook ɲaatin arogi.”

³⁹ Ma abekeke ɔl ogene ole o ademzek ɔl lotinok nɔɔɔɔ anek ne, “Alaan o demziinto, abarzeket gi ci abon.” ⁴⁰ Azi nɔkɔ o, eeci otogole niigi nɔɔɔ, ma alaɲaan arɔɔɲ kijinit niigi bodo nɔɔɔ gi oma.

Kiristo niini Manyi ci Devid

⁴¹ Ma ajin Yesu nɔɔɔ anek ne, “Ma dim gɔɔn niiga anonu ne, Kiristo niini katin dole ci dɔl o Devid o, ku? ^{42–43} Kajine o, eeci azi Devid alya waragewe onin beniinowu ne, Anek Jooi Manyi onan ne, Aavu libire can azo o zɛɛ ma kanyin ineet rocek modo ugun amarninin ineet looc zɔɔne. ⁴⁴ Mazi awo Devid niini alya Kiristo kizi Manyi cin o, ka zin bodo kizi dole ci dɔl cigin ku?”

Ilot Yesu nuyak kegenyit ole o demziinto

^{45–46} Mazi ɲaan azii ɔl dook zɔɔɔ nico nɔkɔ, enek Yesu nuyak ogin ne, “Egenyit ole o ademzek ɔl lotinok. Areez niigi gɔɔn ɲaati aborceki rumane ci alina, ma areez ɲaati azaawi ɔl nɔɔɔ titinyɔnta ɲaati awɔyi golowe, ma gɔɔn avɔ arayek niigi eleeti lecere o abon ceezine o lotento been vitenane o gɔɔn azɔli ɔl dayiin. ⁴⁷ Ma buk gɔɔn avɔ aavtiz niigi ki ɲaai o boi ka kadakti nɔɔɔ looc. Ma arɔɔt gerzitin uneɲ ɲaati ajini Jook ɲinti wun kal kole kɔrgena. Bar zin katin payiin cineɲ gerze ɔɔɔt kujuk ɔl dook.”

ɲaa ci boi anyek Jook guruc

21 ¹ Mazi akɔ Yesu ceenze o Joowo, acin ɔl ween arɔk ɲaati avu ajukeke guruc loidoɲ o ceezu. ² Ma acin buk niini ɲaa ci boi amaati ajukeke milinyane ceen ram loidoɲ nico. ³ Izi ni Yesu ne, “Kaduwakuj igeet, anyek ɲaa ci boye noko Jook guruc ci meel kujuk ɔl oke dook. ⁴ Eeci ɔl oke dook anyek Jook kaal ci anyigjai arozkete uneɲ. Maje bar niini amaati ɔɔɔt, ma anyek Jook guruc ogin ona anyak e dook.”

Liben ci ceez o Joowo

⁵ Maje nuyawa o Yesu ogen anaati linat o ceez o Joowo, eeci ɛenycai niini biyene ci alina, ma anyak kaal ci alina ɔɔɔt ɛle ci gɔɔn anyek ɔl Jook. ⁶ Bar anek Yesu nɔɔɔ ne, “Kaal ci acinu noko dook, anyak iiten oma ci aliben niigi dook lai kɔkom be codoi ɖɔr ataadonek gɔɔn tadena.”

⁷ Ijinit ni nuyawa Yesu enektek ne, “Alaan o demziinto, ma dim kaala nicigi akanai tiɲa? Ma katin ma izi iitene nica ajɔn, kagaya ku?”

Kaal o iina waanci ka koɖorei lɔɔci

⁸ Ma abedeke Yesu nɔɔɔ anek ne, “Iziti vilile! Má anyeku ɔl koogi kalabtawuj. Eeci iima avu ɔl ci meel zaare cigan, ma avu anekuj ne, Aneeta Kiristo neen ce. Inoko iiya iitene. Bar zin niiga má azziiɲnu zɔɔɔ cineɲ o been neen. ⁹ Mazi iziiktu oroonok kibeen looc yawyawitin, má rak aɲolinu looc gaga, eeci kaala nici ɲedet rak akanai ɔɔwa nɔkɔ, bar zin looc dican alaɲ ɔrkɔra ki kaal nicoko ecodoi nɔkɔ.”

¹⁰ Ma azi Yesu bodo ne, “Ɔɔɔɔ waanma modena olla yaka. Kuturi ce ki kutur co ɔɔɔ. Alaani ce ki alaan co ɔɔɔ. ¹¹ Ma amɔɔt waanma tɔdɔwa vitenane ogen kirakirak, ma anyak lɔɔci tarjo ki moorizok ci ger vitenane ci meelik, ma ayelzai tammu keɲa kaala ci anyek ɔl kanyayit ɲoliin ɔɔɔt.

¹² Zin maɲaan rak kakatai kaala nicigi, agamnyuj tiɲeere ɔl igeet, ma agiduj, ma akɔlakuj rooni, ma arekuj sijin, ma avoyuj alaate, eeci atuyaj niiga aneet. ¹³ Bar zin nici waji cunooɲ ka uduktake niigi nɔɔɔ kaviyak o Joowo abon. ¹⁴ Anycek zin niiga zinzeeti kalalit labak calaɲ abaabanu gi ci anyu ne, Kayo kɔɔɔ kuduktak nɔɔɔ naa? ¹⁵ Eeci tiɲeere iitene nice ɲaan kanyuj naana igeet zɔɔɔ ganiin ki dɔyiz ci ateezanu ɔl o amarninuj igeet dook kapaɲante, kɔkom gi ci aduwa. ¹⁶ Ma iinyaye niceke iirikuj tiɲeere baatugooc, ki yaatugooc ɛle, ki gotonogu, ki atenok ugooc, been laɲotugooc, ma aruk niigi oogi ɲaatonooɲ kadaayitɔ.

¹⁷ Amarninuj waanma ɔl dook igeet, eeci anuyaj aneet. ¹⁸ Bar zin akɔ ma akom ɲaatonooɲ imitat ci oowu adoi ɖɔr iina been neen.

¹⁹ Mā amezu piryakzet labak, ajowanu koca tiɲeere roget o abil been neen.”

Oyoyinet o Jerusalem

²⁰ Ma bodo anek Yesu nɔɔɔ ne, “Ma acinu takirnya ci moden oogi ivita ilikta Jerusalem, agaac niiga iiya liben onine izi ajɔn.

²¹ Abon zin ɔl o abaak Judiya adokonyonek biyen. Maje ɔl o abaak Jerusalem, abon aluuk ɲinaante. Ma ɔl o adeyai Jerusalem, abon aavtiz calaɲ avunak. ²² Eeci nicaga iinya o acacine Jooi neen, ka keleemnyai zozowa dook o aduyai waragewe o Joowo.

²³ Nɔɲ ci kol zin tiɲeere iinyaye niceke ɔɔɔt ɲaane o anyake been ɲaane o arokti. Eeci akunak tiɲeere liben ci appe ɔɔɔt looc nice

giye o aborneke Jooi ol niceke nɔɔ. ²⁴ Aruwe katin ogen dilanyai, ma agamnyi ogen kɔɔt kacabte loocowe ogen. Ma abal Jerusalem ele modena ogen zee ma ako adicai irkitowa ci baliin cineej o.”

Kuni o Ɗeerti Eeto

²⁵ Ma azi Yesu bodo ne, “Iiten ci akuni Ɗeerti Eeto e, anyak katin kaal ci ayeizai iwa, ki nyelowa, been monyonye. Maje loota njina apalpalani katin maama liilowe, ma amacuco ɔɔɔt ele keteede moden o loocu dook biyeta, ma akunak nɔɔgo ɲoliin ci appe ɔɔɔt ele. ²⁶ Aruk tiŋeere ol kulurkuluri katavalito ki ɲoliin ɲinti ɲaan rak arewi niigi kaal ci ger ka kakatai loota neke. Eeci tiŋeere kaala o eel tammu bɔbɔra amɔɔt, ma ookci. ²⁷ Keyelizai ni naana Ɗeerti Eeto ɲaati kakuni diizoca dɔyiza been diŋdiŋonte ci appe ɔɔɔt. ²⁸ Mazi akanai kaala nicigi, itingaz jena odoŋit ooti ki taden, eeci elyaan unooŋ izi aɲɔn.”

²⁹ Ma uduwak Yesu nɔɔgo yabziin ci anek ne, “Abaabanit di keet ween moneec kibeem buk keen oogi. ³⁰ Gɔɔn mā acinu bɔlɔk ugeec itilizit, agayu izi lɔlɔɲumi aɲɔn. ³¹ Buk zin gole nico ma acinu kaal nicoko akatai, agaac izi baliin o Joowo aɲɔn ka kiiya. ³² Didile kaduwakuŋ igeet, iina tiŋeere kaala nici dook ɲaan kidicai ol nicigi dook. ³³ Adicai katin tammu taden ki looc, maje zɔɔz cane o abil kelemnyai nɔkɔ zee been neen.

Iziti vilile

³⁴ Egenyit eleeetine ugooc ka calaŋ atalvanyanuŋ zinzeeti baayinet ci awudu nyaantane gil, kibeem gi ci anyeku zinzeeti kivirit kaale ci akati roget unooŋ looce nico zee makacin iyyayuŋ iiteni nica boyoŋyoŋ calaŋ agayu. ³⁵ Eeci atoroban tiŋeere iiteni nica ol loocok dook kerek nɔɔgo kiyo gɔɔn atoroban kelegit curi o. ³⁶ Egenyit zin ijinit Jook tup ka anyayit dɔyiz ci avardanyu kaalyan ci avunak looc neke dook zee ma avo arumnyan aneeta Ɗeerti Eeto.”

³⁷ Ma adica Yesu iinya niceke dook ademz ol waaz cezee o Joowo. Ma yomana awo ako ooŋnyak biye o kazi Kinjiroc. ³⁸ Ma avunak gɔɔn waanice ol dook ceez o Joowo ɲeere ririwɔna ka kivita kiziiyit niigi nɔɔn ɲaati ademzin.

Ooŋek ol Yesu

22 ^{1–2} Mazi ako aɲɔn iiteni o gɔɔn adayi ol o Juz dɔken o alaŋ amokcar o gɔɔn aadane niigi iiten baal avardaŋi toonnyaiti o Joowo ceezi ugeec looce o Masiro e, ivita alaata o ceez o Joowo been ol o gɔɔn ademzek ol lotinok oroŋit gɔl ci ka komonyci Yesu calaŋ ol aga, eeci aŋole niigi ol. ³ Enico ook Loryen zinize o Judaz o kazi Iskariyot ween nuyai codoi nuyawe o Yesu een amɔtɔ ram. ⁴ Ɔtɔɔ ni niini, ma ako azɔɔz ki alaata o ceez o Joowo been alaata o takirnya o abek ceez o Joowo gɔl ci ka kanyaake niini nɔɔgo Yesu. ⁵ Ataltɔ ni niigi ɔɔɔt ele, ma aterkedek niigi nɔɔn zɔɔz ci ka kanyeeke guruc. ⁶ Agama ni Judaz zɔɔz cineej o, ma ako arɔɔŋ gɔl ci ka kakatake nɔɔgo Yesu kɔkɔm eet ci aga.

Azɔl Yesu been nuyak dayiin

^{7–8} Mazi ako een iiten o gɔɔn adayi ol dɔken o alaŋ amokcar, ma atɔŋdi niigi mirkici o ɲaan miliny o aadane iiten o vardaŋinto, itoon Yesu Pitɔr ki Jon anek ne, “Ɔtɔ oroŋit ɲinti ka utuguzi dayiin cigaac kaadane iiten ci vardaŋinto o.”

⁹ Ma aɲɔn niigi nɔɔn anek ne, “Koota kutuguza ɲaadaŋ?”

^{10–11} Ma anek niini nɔɔgo ne, “Iziikto di juruŋ. Avoyu tedec zee ma kutura ɲinaante arumonu kibeem eet ci anyak iju ci maamu. Oneec zin nɔɔn zee been kɔrɔk ci akɔyi o. Ɔtɔ zin enektek eet ci ceez nico o ne, Anekin gayoiti ne, Abil ceez ci ka kiiya kadakta ki nuyak ogan dayiin o vardaŋinto ɲaadaŋ? ¹² Ɗaan zin ayelekuŋ tedec niini ceez ci alɔlani ci eenyici gɔɔn tadena, ma anyak kaal o ceezu dook, ka zin ɔtɔ utuguzi dayiin.”

¹³ Mazi avo niigi, ɔt didi ojokta kaal dook eona aduwake Yesu nɔɔgo e. Utuguzo ni dayiin.

¹⁴ Mazi izi ɲinti ka kadaktɔi, ivita Yesu kibeem toonnyak ogin oogi, ma avu aavtiz niigi dook loota ka kadaktɔ. ¹⁵ Ma anek niini nɔɔgo ne, “Ii baale laadun karooŋ naana iiten nico kiiya ka kozolit ki igeet dayiin ci vardaŋinto noko ɲaan kiiyayan piryakzet o.

¹⁶ Didile kaduwakuŋ igeet, alaŋ bodo kazɔl ki igeet dayiin ci eel kiyo nico noko zee ma kavɔ kazɔl dayiin o vardaŋinto een didi baliinte o Joowo.”

¹⁷ Odoma ni Yesu jayitot ci nyaanu, ma anyek Jook zany, ma azi ne, “Odomta jayitot nico iribanit niiga dook. ¹⁸ Eeci alaŋ bodo kazɔl naana ki igeet nyaan nɔkɔ zee ma aku baliin o Joowo.”

¹⁹ Bodo adoma dɔkoc, ma anyek Jook zany, ma ateet, ma anyek nɔɔgo kadayit, ma anek ne, “Nicini ele onan anyonekuŋ igeet neen. Utuguz zin gɔɔn nɔkɔ ɲaati aadanaj aneet.”

²⁰ Mazi adotiz dayiinta, anyek bodo Yesu nɔɔgo jayitot ci nyaanu ewe anek ne, “Ma jayitot nicini terkediin o colai o ka keelayuŋ Jooi igeet biyete ogan aduuti ɲaatonooŋ. ²¹ Mazin eeti o ka kook kiiriyen aneet, karomena ki aneet njina ele. ²² Maje naana Ɗeerti Eeto abon kadaai ebaal arek Jooi laadun, bar zin nɔŋ ci kol eete ci iirikan aneet o.”

²³ Mazi azii niigi gi nico, ijintɔ niigi maany izikto ne, “Ma dim ɲeneen ɲaatinai ci ka kook kutuguwek nɔɔn gi nico o?”

Daŋɔn ci akati dikirzet

²⁴ Ma akanai daŋɔn nuyawe maany giye ci akati ɲeneen ci adikir ɲaatineej. ²⁵ Ma anek Yesu nɔɔgo ne, “Gɔɔn alaata o loocu anyak dɔyiz ole ugeec abal. Ma awe niigi kizi ol ci titiny. ²⁶ Bar zin ɲaatonooŋ alaŋ abon ɲaati agoonu buk niiga nɔkɔ. Ma eeti ci adikir ɲaatonooŋ, abon niini abadaan ele kizi kidic. Maje eeti ci arayinuŋ igeet, abon anyek ele kibil kiyo gabarenti o. ²⁷ Yo gɔɔn adikir eeti jaŋ? Adikir eeti ci aavi loota olla are dayiin kanyaayai o, yo da adikir eeti ci anyaak nɔɔn dayiin o? Ma eeti ci aavi loota are dayiin o eet o adikir neen. Bar zin inoko naana ɲaatonooŋ njina kabil kiyo gabarenti o.

²⁸ Igeet neen o amenanu karome ki aneet iinya dook gidente onan. ²⁹ Kanyuŋ zin tiŋeere naana igeet alaazet kiyo buk anyan baaba aneet o. ³⁰ Kadake tiŋeere naana ki igeet, ma kawode ki igeet baliinte onan. Ma aavtiyu katin niiga lecerene o ka apakti boryok o Israyil een amɔtɔ ram.”

Aduwa Yesu daŋɔn o Pitɔr

³¹ Ma azi Manyi Yesu ne, “Saiman, Saiman, ziik di. Ojowa Loryen gɔl ci ka kitivanyuŋ igeet kiyo gɔɔn ivanyit ɲaa labi o.

³² Bar zin kijineyin naana ineet Jook ka calaŋ iina niina tuwente unun. Ka zin iitene ci abadakan niina aneet e, ka itiiir gotonogu o tuwento kodoyit.”

³³ Ma abedeke Pitör nōōō anek ne, “Manyi, kagama buk naana cabiin ci kacabin ki ineet, ma kadaai been ineet labak.”

³⁴ Bar abedeke Yesu nōōō anek ne, “Kaduwakin ineet Pitör, ako tija adañnyan niina aneet lak iyyu iñaan kōrōk toloci.”

³⁵ Enek ni Yesu nōōō ne, “Iiten baale mā kitoonuñ igeet kōkōm guruc, ki kaboot ci dayiino, been caava e, anyak gi ci ɔt atamaatu tɔ?”

Abedeke niigi nōōō anek ne, “Akōm kina.”

³⁶ Ma anek Yesu nōōō ne, “Inoko zin kaduwakuñ igeet, mā anyak ɛeti guruc karabōñ een kaboon ci dayiino, abon adoma kanyak. Mā akōm eet kabaz ci wun, abon ataalinē rum ka kataala kabaz. ³⁷ Kaduwakuñ igeet gi nico o, eeci iyya iiteni o ka keleemnyai gi baal akanan aneet baal aduwa nyakananeta waragewe o Joowo azi ne, “Akeebek katin ɔl nōōō ɔl ween libjok.” Mazin didi kaala dook o ayɛet nyakananeta akanan aneet avo zɛe iina.”

³⁸ Ma anek nuyawa nōōō ne, “Manyi, cin di. Kanyaka ñaato kabazwa ci wuntik ram.”

Abedeke Yesu nōōō anek ne, “Mɛɛle nicigi alya.”

Ajin Yesu Jook biye o kazi Kijiroc

³⁹ Ma iñaaaz Yesu kutura, ma ako biye o kazi Kijiroc eonin laadun. Ma ɔrkōr buk nuyawa ki nōōō. ⁴⁰ Mazi avo arum ñinite, enek Yesu nuyak ne, “Ijinit Jook ka calañ iinanu kaale o acinanuñ.”

⁴¹ Ma ooñnek niini nōōō looc, ma icak kidicilim, ma ako akani kozoñti looc ajin Jook azi ne, ⁴² “Baaba, nyeyi da piryakzet nico ñaatan. Mate arooñ, nyeyi. Bar zin alañ een giye ci karōñje naana, bar olla tugu eo arōñje niina.”

⁴³ Iiyak ni nōōō toonnyaiti ci Joowo, ma aku anyek nōōō dōyiz. ⁴⁴ Ma acirit nōōō ziniz ɔrōt ɛle, ma abedonek ñaryiin lak ci meel ger. Ma amolok kakat molowot tōdō kiyo biyeta o.

⁴⁵ Mazi adotiz ñaryiinta, itinja imirokez toonnyak, ma ako amōda nōōō bar oogin. Apirna niigi, eeci acirit nōōō zinzeeti ɔrōt giye ci aduwak Yesu nōōō o.

⁴⁶ Ma anek Yesu nōōō ne, “Ooginu naa? Itingaz ijinit Jook ka calañ iinanu kaale o acinanuñ.”

Gamiin o Yesu

⁴⁷ Mazi ñaan azōz Yesu nōōō, ivita kōle ci meelik. Arayan nōōō Judaz ween nuyai codoi nuyawe ween amōtō ram. Ma akunak niini Yesu, ma aku acoco nōōō ñalyamoc zaawinta.

⁴⁸ Ma ajin Yesu nōōō anek ne, “Judaz, aku iirikan niina aneet ñeerti Eeto ñaati acucuyan ñalyamoc?” ⁴⁹ Mazi acin nuyawa ogine gi ci ka kakatai noko, ijinit niigi nōōō enektek ne, “Manyi, ketenēda nōōō kabazwani labak?” ⁵⁰ Ma iñaaaz codoi ñaatineeñ, ma añedet gabaren ci alaan o adikir ceeze o Joowo ketēda itat ci azo o por.

⁵¹ Ma anek Yesu nōōō ne, “Bil di! Má ñaan bodo abedeke.” Ma uum niini eet nico itat, ma alal nōōō itati enico ɛle.

⁵² Ijin ni Yesu alaat o ceez o Joowo, ki alaat o takirnya o ceez o Joowo, been ɔl o adikir avu ka kivita kagamit nōōō anek ne, “Ako ma avunakañ kabazwani kibeen keeni kiyo avunaku libjoi o naa? ⁵³ Baalyo karome naana ki igeet ceeze ci Joowo noko tup nōōō, ma ñaan agamtañ. Inoko zin nici wañi cunooñ ajowanu niiga baliinte o Loryento.”

Adañ Pitör Yesu

⁵⁴ Agamit ni niigi Yesu, ma avōyi ole o alaan o adikir ceeze o Joowo. Maje Pitör ano nōōō vurta reena kidicilim. ⁵⁵ Maje kōrōk keña ñinaante anyak ɔl ci aavtiye goo. Iiya ni Pitör, ma aku aromonek nōōō aave buk goo.

⁵⁶ Mazi acin dole ceen gabaren ole nice Pitör aave goo nōōō, egelem niini nōōō, ma azi ne, “ɛeti nici buk gōō ɔrkōr ki Yesu.”

⁵⁷ Ma adañnyi Pitör azi ne, “Dole, alañ kaga eet nico been neen.”

⁵⁸ Bodo ñintimiliny nōōō iyeziz ɛeti oman nōōō, ma anek ne, “Een ri buk niina nuyai codoi nuyawe o eet nico.”

Abedeke bodo Pitör nōōō anek ne, “Akōm ñer, alañ keen nuyai cin.”

⁵⁹ Bodo ñintimiliny nōōō ebeeyɛ ɛeti oman ɔrōt ɛle azi ne, “ɛeti nici nuyai ci Yesu gi, eeci niini buk een eet ci Galili.”

⁶⁰ Ma abedeke Pitör nōōō anek ne, “Eet onaañ, alañ naana kaga zōz ci aduwa o.” Mazi ñaan azōz niini nōōō, ɔrōk toloci. ⁶¹ Ma abuudi Manyi Yesu, ma agelem nōōō. Aada ni Pitör zōz o Manyi Yesu baal aneki nōōō ne, “Adañnyan ñeere lak iyyu iñaan kōrōk toloci e.” ⁶² Ma adun Pitör ako kōrōk bawuca, ma aku alu ñinaante ɔrōt ɛle.

Amomoz takirnya Yesu

^{63–64} Maje ɔl ci baal abek Yesu o, amomoz nōōō. Abuñ niigi nōōō kebere, ma aruk, ma bodo ajin anek ne, “Duwayet di! ñeneen ci arukin o?” ⁶⁵ Ma aduwak buk niigi nōōō zoōzok ci meelik ɔrōt ci adōmi niigi nōōō.

Aavi Yesu roonnya

⁶⁶ Ma ñeere olotai ɔl o mayan baayizo, ki alaat o adikir ceeze o Joowo, been ɔl o ademzek ɔl lotinok. Anyaaktak ni ɔl nōōō Yesu.

⁶⁷ Ma ajin niigi nōōō anek ne, “Duwayet di, ma dim niina een Kiristo neen?”

Ma abedeke Yesu nōōō anek ne, “Mayo nuun inoko kaduwakuñ, alañ atuyañ been neen. ⁶⁸ Buk inoko mā kajinuñ naana igeet gi oma, alañ abarzekañ. ⁶⁹ Bar zin akatai waanico naana ñeerti Eeto ñaan kako kaavi aziite o Joowo azo.”

⁷⁰ Ma azi niigi dook ne, “Een zin bōñ niina ñeerti Joowo?”

Ma abedeke Yesu nōōō anek ne, “Neen ci aduwanu niiga o.”

⁷¹ Mazi azii niigi zōz nico, izito ne, “Alañaan bodo karōñ bacok, eeci kiziiyit naaga alya zoōzok ogin otoge onin ɛle.”

Anyaa ɔl Yesu alaan o kazi Pailat

23 ¹ Ma iñaaaz ɔl dook, ma avōyi Yesu alaane o kazi Pailat. ² Ma avo akana niigi kaal ci añanyi nōōō, azi ne, “Kajowana eet nico ademzek ɔl gōl ci ger. Anek niini ɔl ne, Má aruweku alaan o Rom adikir meeri. Ma bodo buk azi ne, Niini alya Kiristo neen. Anyek niini ɛle kizi alaan.”

³ Ma ajin Pailat nōōō anek ne, “Ma niina een alaan o Juz neen?”

Ma abedeke Yesu nōōō anek ne, “Neen ci aduwa niina o.”

⁴ Enek ni Pailat alaat o ceez o Joowo been kóle dook ne, “Akóm naana gi ci ger kajowa eete nico ka kapayek nókó.”

⁵ Mazi azi Pailat nókó, egerenyit niigi, bar ebéekte ɔ́ɔ́t ele azi ne, “Eet nico góon arumuz ɔ́l dook Judiya njina kóoyóktó demziinte onin. Akana iiten baale laadun Galiliya zée makacin inoko iiya urumet ageet njina.”

Anyaaƙ ɔ́l Yesu alaan o kazi Erod

⁶ Mazi azii Pailat gi nico, ijinun ɔ́l enek ne, “Ma dim eeti nici eet ci Galili?” ⁷ Mazi akó aga niini Yesu eet ci Galili, itoonek nókó Erod o abal looc nice. Maje buk waanice Erod alya aavi Jerusalem. ⁸ Mazi akó acin Erod Yesu, atalɔ́ ɔ́ɔ́t ele, eeci góon da azii niini kaviyak o akati Yesu reena, ma aróɔ́ɔ́ gól ci acini nókó ɔ́ɔ́t ele. Aróɔ́ɔ́ niini kicin Yesu njaaƙi agóoni kaal ci atéet ɔ́l biye keberene ogin ele. ⁹ Ijin ni niini Yesu kaal ci meel ɔ́ɔ́t. Maje bar Yesu akóm gi codoi ci abarzek nókó. ¹⁰ Ma ijaaz alaata o ceez o Joowo been ɔ́l o góon ademzek ɔ́l lotinok o Juz, ma aduwa kaal ci akani Yesu vólɔ́ɔ́. ¹¹ Omomozit ni Erod been takirnya ogin Yesu, ma aminanji nókó. Ma aborceke nókó rum ci alina momozenta, ma avóyi nókó bodo njaaƙi Pailat. ¹² Maje rak baale Pailat ki Erod amarnó. Ma iitene ci baal agami ɔ́l Yesu neke, izitó bodo lajoten.

Apayek ɔ́l Yesu daayiz

¹³ Otowa ni Pailat alaat o ceez o Joowo, ki ɔ́l o mayan baayizo, kibeen buk ɔ́l oogi njaaƙi. ¹⁴ Ma aku anak nókó ne, “Iiten baale rak anyaaƙan eet nico aniyu ne, Ademzek niini ɔ́l gól ci ger. Mazi ona kajin nókó igeet keberen njina noko, akóm gi ci ger kajowa njaaƙin ebaal aduwanu niiga e. ¹⁵ Ma buk Erod akóm gi ci ger ajowa njaaƙin giye ci abadaket niini nókó ageet njina o. Akóm zin eeti nici gi ci ger agóon ka kurukti naaga nókó kadaak. ¹⁶ Njaaƙin zin olla kanyi takirnya kuruyit nókó nyaboyen zée ka koboroc kóó.” ¹⁷ Maje góon laadun iitene o vardanjinto ɔ́ɔ́gak Pailat nókó eet codoi ole o acabje.

¹⁸ Mazi azii kóle zóɔ́z ci Pailat noko, egerenyit niigi dook azi ne, “Ruwo eet nico kadaak, bar ɔ́ɔ́gayet Barabas.” ¹⁹ Maje eeti ci kazi Barabas noko, acabji niini zooze ci da ayówón ɔ́l kutura, ma aruwen eeti oman kadaak.

²⁰ Maje Pailat aróɔ́ɔ́ kóok Yesu kóɔ́ɔ́. Ma ajin niini kóle bodo zóɔ́z ci ka kóogí Yesu. ²¹ Bar enico egerenyit niigi dook iziti ne, “Tóɔ́ nókó kadaak! Tóɔ́ nókó kadaak talakeca!”

²² Ma ajin Pailat nókó eecen lak iiyu o anak ne, “Agóon dim eeti nici gitaz ci gerze o? Akóm naana gi ci ger kajowa njaaƙin ka kapayeke nókó daayiz. Olla zin karóɔ́ɔ́ nókó kóɔ́ɔ́ye nyabowa doon zée ka kóogé kóɔ́ɔ́.”

^{23–24} Bar enico egerenyit niigi ɔ́ɔ́t ele kujuk we azi ne, “Tóɔ́ nókó talakeca!” Nókó zée makacin apawun Pailat Yesu eci aróɔ́ɔ́ niigi o. ²⁵ Ma ɔ́ɔ́gak nókó eet o aróɔ́ɔ́ niigi baal acabje yowonte o ayówón ɔ́l kutura, ma aruwen eeti oman kadaak e. Ma anyek niini nókó Yesu ka kóɔ́t kutuguzek niigi nókó gi o aróɔ́ɔ́ kutuguzek.

Adóɔ́ ɔ́l Yesu talakeca

²⁶ Ooti ni niigi Yesu. Mazi njaaƙin awo góla nókó, urumto ki eet ci kazi Saiman ci aluuga looce o kazi Sariin. Njaaƙin niini ɔ́l aróɔ́ɔ́ kiiyak Jerusalem. Agamit ni niigi nókó ɔ́ɔ́yiza, ma anyek kitik keet ceen talakec o konowi Yesu vurma.

²⁷ Ma ano kóle ci meel ger Yesu. Buk kole nico anyak njaaƙi ci ɔ́ɔ́kór ki nókó ci aluwék Yesu. ²⁸ Mazi azii Yesu njaaƙi nicoko alu nókó, ubuut niini nókó, ma anak ne, “Njaaƙi o Jerusalem, má aluwékan aneet, bar utuluzek eleeti cugooc o ki ɔ́l ugooc. ²⁹ Eeci avu waanma iinya ci ane ɔ́l ne, Amayuk bar da Jooi njaaƙi o awo koliin o njaaƙin laadun kanyayit ɔ́l. ³⁰ Ma buk azi tinjeere niigi iitene nice ne, Alaƙ kini iinaket biyen nici bar komonycet kóɔ́tó ɔ́l ni. ³¹ Eeci má agoononekan aneet kaal ci gerze noko, bar tinjeere igeet agoononekuj kaal ci gerze ɔ́ɔ́t kujuk can o.”

³² Mazin waanice avóyi niigi Yesu kibeen ɔ́l ceen agoryak een ram ka kóɔ́t kurukte buk niigi kadaayitó been nókó. ³³ Mazi avu arum njinti kazi Amen ci Oowu, otodeec niigi Yesu kibeen ɔ́l ceen ram noko njinaante. Adóɔ́ codoi Yesu libire ci azo o, maje codoi adóɔ́ nókó libire ci kaƙeto o. ³⁴ Ma anjarye Yesu azi ne, “Baaba, aara nókó oƙec nico labak, eeci alaƙ aga niigi gi ci agóon o.”

Ma anjerek takirnya eleeti rumané o Yesu njaaƙi agóoni niigi maadico. ³⁵ Maje kóle eel agelem kaal ci agooni noko dook. Maje bar ɔ́l o Juz adikir amomoz Yesu ano ne, “Arogóɔ́ ri góon niini ɔ́l oogi. Má een didi niini Kiristo o anjara Jooi neen, anyek zin di keela ele cin o maany.”

³⁶ Buk takirnya amomoz nókó. Anyaaƙ niigi nókó nyaan ci ger acanƙai, ma avu arike otok. ³⁷ Ma anak ne, “Má een didi alaan o Juz neen, eela di ele cun o.”

³⁸ Maje keet ceen talakec adodine Yesu o ayeedonek zóɔ́z ci azi ne, “Nici alaan o Juz.” ³⁹ Maje eeti codoi ole ween agoryak adóɔ́ ki Yesu e amomoz buk niini Yesu azi ne, “Alaƙ een niina Kiristo? Eela zin ri ele cun o kibeen buk ageeta.”

⁴⁰ Egerenyek ni góon ceeni nókó enek ne, “Alaƙ anjole Jook? Apawoneket ageet daayizi kiyo niini o. ⁴¹ Bar zin payiin cinai o aleemnyai kaale ogaac kagóon, maje eeti nici akóm gi ci ger agóon kina.”

⁴² Ma abuut niini Yesu, ma anak ne, “Má anyi kibiirin ɔ́. Aadawan buk tinjeere aneet iitene ci abadane aku eene alaan e.”

⁴³ Ma abedeke Yesu nókó anak ne, “Didile kaduwakin ineet, tedec waanico ele karome naana ki ineet njaaƙi rogeto.”

Daayiz o Yesu

⁴⁴ Ma waaz iilya idiite ii kalimik kizi lóɔ́ci dook muur gilinyik zée been ziiƙ ween iiyu yomana. ⁴⁵ Ma areeci rum o góon anjirin ceez o Joowo kórgena cac. ⁴⁶ Ma agerény Yesu ɔ́ɔ́t ele azi ne, “Baaba, karekin vóɔ́ɔ́ɔ́ onan aziit unun.” Aduwa zóɔ́z nico, ma atéet enico ele.

⁴⁷ Maje alaani ci takirnyawu aavi njinaante acin kaal nicoko nókó, ma anaat niini Jook azi ne, “Didile, eeti nici bar da eet ci abona ɔ́ɔ́t.”

⁴⁸ Mazi acin kóle ci ona aavtiz njinaante o dook kaal nicoko, imiirtozek korogjok ugeec njaaƙi agami ooti iinoni Yesu. ⁴⁹ Maje ɔ́l ween lajoten o Yesu dook, been njaaƙi baal anowa nókó Galiliya e, anjammek niigi dook kaal nicoko reena nókó.

Dawiin o Yesu

^{50–51} Maje waanice njinaante anyak eet ci kazi Josev ci abaak kuture o kazi Arimatiya abaaƙi ɔ́l o Juz. Niini eet ci abona ɔ́ɔ́t ele, ma are niini waanice kuni o baliin o Joowo. Buk niini alya alaan codoi ole o roonnyo. Bar zin waanice alaƙ aróɔ́ɔ́ niini kaal ci ger aróɔ́ɔ́ kutuguzek góɔ́ɔ́ɔ́ Yesu o. ⁵² Ook ni niini alaani o kazi Pailat, ma akó ajin nókó ka kanyek Yesu kook kada. ⁵³ Mazi akó aziiknek Pailat nókó kooyi Yesu, ook aara nókó keete ween talakec, ma aku amanocek rum ci abon zée ook ni arek bóɔ́t ci abil

biya ci ɗaan laadun akom eet ci adaai arek ol been neen. ⁵⁴ Maje waanice iiteni nica iiten ween jima ka tiɗeere kizi iiten ci ol o Juz yubzento kazi Sabit.

⁵⁵ Odomta ni ɗaai baal ɔrkɔra kibeen Yesu Galiliya e, orkorit buk ki Josev ɔt boɔta, ma avo acin ɗinti aronek Yesu o. ⁵⁶ Ma amiironok niigi korogjok, ma avo agoona karacenen ki karkaret ci ka koɔt kuvuudi ele o Yesu boɔta. Ma iitene ween Sabit ayubuz niigi eo aduwan lotinowa.

Ɗaazi o Yesu daayiza

24 ¹ Ma iitene o yubzento ririwɔna oloyit ɗaai ooti karacenen ki karkaret baal agoona e boɔta. ² Mazi avo arum niigi ɗinite, bar acin be baal abunji ol boɔt otok e aaryai boɔt otoga.

³ Mazi avo boɔta eecito, ajowa ele o Manyi Yesu iziito. ⁴ Ma abiir noɔgo ooti giye nico ɔɔt ele. Mazi ɗaan ele niigi apaɗani noɔko, bar acin ol ceen ram ci anyak rumanɛ ci woɔr per eelnek noɔgo libira. ⁵ Ma aloc ɗaai ooti, eeci aɗole ol nicoko ɔɔt ele. Ma anek ol nici noɔgo ne, “Avu arooɗnyu eet ci arogi ɗaati ol ci adaai o naa?” ⁶ Azee zin niini ɗina to. Itiɗa daayiza. Aada zɔɔz baal aduwakuɗ niini igeet iitene baal aave Galiliya e. ⁷ Waanice azi niini ne, Tiɗeere Ɗeerti Eeto anyononek azeeen ci ol o oɗenu, ma avo adodo niigi noɔko talakeca, ma iɗaaz niini bodo daayiza iinyaye ceen iyyu.”

⁸ Aada ni ɗaai didi zɔɔz onin baal aduwa e. ⁹ Imiirte ni niigi, ma avo aduwak kaal nicoko dook nuyak ween amoto codoi kibeen buk ol o arome ki noɔgo ɗinaante. ¹⁰ Ma ɗaai nicigi waanice awoyi Meri o looc o kazi Magdala, ki Jowana, ki Meri ween yaati Jemis. Ma avu aduwak niigi been buk ɗaai oogi toonnyak kaal nicoko. ¹¹ Maje toonnyawa bar apez gi ci aduwa ɗaai noko kizi gi ci labak, ma alaɗ arek niigi zinzeeti juruɗ. ¹² Itiɗa ni Pitor, ma adokony ako boɔta. Ma ɗinaante mazi ululi ka kegelem boɔt eecito, bar acin rumanɛ doon, akom bodo gi oma kina. Ma amiiri ako ɔlo kibiir ɔo giye nico tet.

Orkor Yesu ki ol ceen ram

¹³ Ma iitene nice ele itingazo nuyawa ceen ram ɔto kuture o kazi Emeyaz. Maje kuturi nica adewo ki Jerusalem kidicilim. ¹⁴ Ma gola imicit niigi ozoozit zɔɔz ci akati kaal ci baal agooni Jerusalema neke. ¹⁵ Mazi ɗaan azɔɔzo noɔko, iyya Yesu alya, ma aku ɔrkɔr kibeen noɔgo. ¹⁶ Acin ɗedet niigi noɔko ɗaati ɔrkɔri o noɔko, bar anyak gi ci agargaren noɔgo kebere calaɗ iyyez noɔko.

¹⁷ Ma anek Yesu noɔgo ne, “Ma dim gitaz ci azoosu gola ɗaan oke zee o?”

Ma eel niigi ɗaati anyorani ɗumti. ¹⁸ Ma ajin eeti codoi ɗaatineɗ ci kazi Kiliyopas noɔko anek ne, “Een eet ci aave Jerusalema manjaan da ga kaal ci baal agooni iinya nicoko noko niina doon noɔko?”

¹⁹ Ma abedeke niini noɔgo anek ne, “Kalakaz da ci utuguze o?”

Ma abedeke niigi noɔko anek ne, “Kaal baal agoononek Yesu o Nazaret e. Niini waanice nyakanan ci anyak doyi ci appe ɔɔt zɔɔza kibeen kaale o agoon buk, ma agayi niini Joowa kibeen ɔla buk. ²⁰ Ma bar ivita agamit noɔko alaata o ceez o Joowo been alaata ogaacak abal ol, ma avoyi noɔko rooni ka kapawozek noɔko daayizi zee makacin didi ɔt otodowit niigi noɔko keete ween talakec. ²¹ Maje naaga laadun kabaabana kaniya ne, Noɔko neen o ka kiyya keela ol o Israyil. Bar zin inoko ɔt iinya iyyon ci adaai. ^{22–23} Ma adoma ɗaai cigaacak ogen alowonek boɔt uyen ɗeere ririwɔna, ma avo ajowa ele onin iziito boɔta. Ma avu ateedet niigi ageeta biye giye ci azi ne, Acin niigi toonnyak ci Joowo, ma anek noɔgo ne, Yesu oroga. ²⁴ Bodo buk ivita ɔto ol cigaacak ogen boɔta. Mazi avo abada, avu azi ne, Abil didi eona aduwan ɗaai e. Ɗaan kicinit buk niigi ele o Yesu boɔta.”

²⁵ Enewun ni Yesu noɔgo ne, “Ma niiga eeginu tarbale, ma alaɗ atuyu kaal baal aduwa nyakananeta e taman noɔko been neen. ²⁶ Uduktak niigi baale laadun iziti ne, Kiristo abon rak apirna kaale nicoko dook iɗaan kook diɗiɗiɗonte onin.” ²⁷ Ma oobek Yesu noɔgo zoozok o akati noɔko aduyai waragenyaye o Joowo dook, akana waragewe o ayeet Mosis zee ma aɗorneke waragenyaye o ayeet nyakananeta dook.

²⁸ Mazi avo ajɗɗɔz niigi kutur ona laadun avoyi e, utugu Yesu ele kiyo eeti o arɔɗɗ kidicek o. ²⁹ Ma alam niigi noɔko anek ne, “Ma adicee! Taɗu ɗaatinaaɗ ɗina, eeci izi looci baalin.” Ook ni niini ka kataɗu ɗaatineɗ. ³⁰ Mazi avo aavtiz loota ka kadakt, odoma Yesu dokoc, ma anyek Jook zany, ma ateedet, ma anyek noɔgo. ³¹ Enico ele okole noɔgo kebere ugeecik, makacin agaac bar te nici Yesu neen. Ɗinaanto izi Yesu dim noɔgo keberen noɔko.

³² Ma ano ol nicigi ne, “Uyen laadun ma korɔra ki noɔko gola, ma oobeket niini zoozok o akati warage o Joowo e, akanet zɔɔz nica zinzeeti ɔɔt ele.” ³³ Ma iɗaaz niigi enico ele, ma amiironok Jerusalem, ma avo amoda nuyak ween amoto codoi been goɗgi ci tuwento oogi alote ɗaatodoi.

³⁴ Ma anek nuyawa noɔgo ne, “Itiɗa didi Manyi daayiza! Eyelewun ele Saiman.”

³⁵ Uduktak ni buk ol ci ona een ram o goɗgi kaal ona acin gola e, ki zɔɔz o agayi niigi Yesu ɗaa ona ateedeke niini noɔgo dokoc e.

Ayelzak Yesu ele nuyak ogin

³⁶ Mazi ɗaan oobek ol nici goɗgi zɔɔz noɔko, bar acin niigi Yesu ele ibil noɔgo korɗena. Ma azi ne, “Abonanu.”

³⁷ Ma ateedi noɔgo biyeta kanyayit ɗoliin ci appe ɔɔt ele, bar abaaban niigi anyek noɔko kizi miniɗit. ³⁸ Ma anek Yesu noɔgo ne, “Anyaku ɗoliin naa? Ma da niiga abaabanu kizik bar alaɗaan kiɗaaz daayiza korok bodo?” ³⁹ Egelemit zin di tobe ci kanyei azeeene ki zɔɔne o ka agayaɗ niiga didi nici aneeta ele neen. Uumtaɗ buk ka agayaɗ juruɗ, eeci miniɗiti alaɗ anyak ele ki ame kiyo acinaɗ kanyei naana o.”

⁴⁰ Azi noɔko, ma ayelek noɔgo azeeen ki zɔɔ. ⁴¹ Mazi ɗaan anyek niigi kizi lutet noɔko giye o aromi niigi talniin been ooti biirez, enek niini noɔgo ne, “Anyaku yo gi ci kadei to ɗina?” ⁴² Ma anyek niigi noɔko kulugit ci aaki. ⁴³ Ma adak noɔgo korɗena ɗina.

Zoosok o aɗorneke aduwak Yesu nuyak

⁴⁴ Enek ni niini noɔgo ne, “Iiten baal ɗaan korɔri ki igeet e, kuduwayuɗ kaal ci inoko ka kivita kutuguzozeyan aneet noko dook, eeci ka keleeemte zoosowa o akanan aneet ayeedi lotinowe o Mosis, ki zoosowe o ayeet nyakananeta, been waragenyaye o beniinowu.”

⁴⁵ Okol ni niini noɔgo ooti ka kagaac zoosok o aduwa waragenya o Joowo. ⁴⁶ Ma anek noɔgo ne, “Ayeedi zin baale gi ci azi ne, Kiristo abon rak agide zee ɗaan bodo iɗaaz daayiza iinyaye ceen iyyu. ⁴⁷ Ma abon uuwaki kaviyawa o ka kabadi ol mony oɗene ugeec, ka kaara Jooi noɔgo oɗe ugeec zaare ogin, ka kakatai Jerusalema zee ma ako adala moden dook. ⁴⁸ Eeginu zin niiga bacok

kaale nicoko dook. ⁴⁹Ŋaan zin kako kitoonakuŋ gi o aterket baaba ka kitoonayuŋ igeet. Abon zin rak arewinu Jerusalema ŋina zee ma akunakuŋ dɔyizi o Joowo.”

Odoŋozek Yesu tammo taden

⁵⁰Itiŋa ni Yesu Jerusalema arawɔi nɔɔgo ooyi ŋaati kazi Bezani. Ma ŋinaante ook odoŋun niini azeen, ma amayuk nɔɔgo dook. ⁵¹Mazi ŋaan amayuk niini nɔɔgo nɔkɔ, ɔdɔŋe niini ki tammu taden. Otoŋek nɔɔgo looc ook niini tamma. ⁵²Idiŋdiŋanit ni niigi nɔɔnɔ, ma abadaak Jerusalem talniinte ci appe ɔrɔɔt. ⁵³Ma aavtiz gɔɔn niigi waanice iinya dook ceeze o Joowo anyek Jook zany.